

欽定南史

卷六十一之六十七

卷之三

一、
二、
三、
四、

南史卷六十一

唐

李

延

壽

撰

列傳第五十一

陳伯之

陳慶之

子胥

隨欽

陳伯之濟陰睢陵人也年十三四好著獺皮冠帶刺刀候鄰里稻熟輒偷刈之嘗為田主所見呵之曰楚子莫動伯之曰君稻幸多取一擔何苦田主將執之因拔刀而進曰楚子定何如田主皆反走徐擔稻而歸及年長在鍾離數為劫盜嘗援面覘人船船人斫之獲其左耳後隨鄉人車騎將軍王廣之廣之愛其勇每夜臥下榻征伐常將自隨頻以戰功累遷驃騎司馬封魚復縣伯梁武起兵東昏假伯之節督前驅諸軍事豫州刺史轉江州據尋陽以拒梁武郢城平武帝使說伯之即以為江州刺史子虎牙為徐州刺史伯之雖受命猶懷兩端帝及其猶豫逼之伯之退保南湖然後歸附與眾軍俱下建康城未平每降人出伯之輒喚與耳語帝疑其復懷翻覆會東昏將鄭伯倫降帝使過伯之謂曰城中甚忿卿欲遣信誘卿須卿降當生割卿手脚卿若不降復欲遣刺客殺卿伯之大懼自是無異志矣城平封豐城縣公遣之鎮伯之不識書及還江州得文牒辭訟唯作大諾而已有事典鐵傳口語與奪決於主者伯之與豫章人鄧

縉承與人戴承忠並有舊縉經藏伯之息免禍伯之尤德之及在州用縉爲別駕承忠爲記室參軍河南
褚縉都下之薄行者武帝卽位頻造尙書范雲雲不好縉堅拒之縉益怒私語所知曰建武以後草澤底
下悉成貴人吾何罪而見棄今天下草創喪亂未可知陳伯之擁強兵在江州非代來臣有自疑之意且
復熒惑守南斗詎非爲我出今者一行事若無成入魏何減作河南郡於是投伯之書佐王思穆事之大
見親狎及伯之鄉人朱龍符爲長流參軍並乘伯之愚闇恣行姦險伯之子虎牙時爲直閣將軍武帝手
疏龍符罪親付虎牙虎牙封示伯之帝又遣代江州別駕鄧縉伯之並不受命曰龍符健兒鄧縉在事有
續臺所遣別駕請以爲中從事縉於是日夜說伯之云臺家府庫空竭無復器仗三倉無米此萬世一時
機不可失縉承忠等每贊成之伯之謂縉今段啟卿若復不得便與卿共下使反武帝敕部內一郡處縉
伯之於是集府州佐史謂曰奉齊建安王教率江北義勇十萬已次六合見使以江州見力運糧速下我
荷明帝厚恩誓以死報使縉詐爲蕭寶寅書以示僚佐於聽事前爲壇殺牲以盟伯之先歃長史以下次
第歃縉說伯之今舉大事宜引人望程元冲不與人同心臨川內史王觀僧虔之孫人身不惡可召爲長
史以代元冲伯之從之仍以縉爲尋陽太守承忠輔義將軍龍符豫州刺史豫章太守鄒伯倫起郡兵拒
守程元冲旣失職於家合率數百人使伯之典鐵呂孝通戴元則爲內應伯之每旦常作伎日晡輒臥左

右仗身皆休息元冲因其解弛從北門入徑至聽事前伯之聞叫自率出盪元冲力不能敵走逃廬山伯之遣使還報虎牙兄弟虎牙等走盱眙盱眙人徐文安莊興紹張顯明邀擊之不能禁反見殺武帝遣王茂討伯之敗走間道亡命出江北與子虎牙及褚縉俱入魏魏以伯之爲使持節散騎常侍都督淮南諸軍事平南將軍光祿大夫曲江縣侯天監四年詔太尉臨川王宏北侵宏命記室丘遲私與之書曰陳將軍足下無恙幸甚幸甚將軍勇冠三軍才爲世出棄燕雀之毛羽慕鴻鵠以高翔昔因機變化遭遇明主立功立事開國稱孤朱輪華轂擁旄萬里何其壯也如何一旦爲奔亡之虜聞鳴鏑而股戰對穹廬以屈膝又何劣邪尋君去就之際非有他故直以不能內審諸己外受流言沉迷猖蹶以至於此聖朝赦罪責功棄瑕錄用推赤心於天下安反側於萬物此將軍之所知非假僕一二談也昔朱鮪涉血於友于張繡剗刃於愛子漢主不以爲疑魏君待之若舊況將軍無昔人之罪而勳重於當代夫迷塗知反往昔是與不違而復先典攸高主上屈法申恩吞舟是漏將軍松柏不翦親戚安居高堂未傾愛妾尙在悠悠爾心亦何可言當今功臣名將厲行有序佩紫懷黃讚帷幄之謀乘輅建節奉疆場之任並刑馬作誓傳之子孫將軍獨覲顏借命驅馳氈裘之長窻不哀哉夫以慕容超之強身送東市姚泓之盛面縛西都故知霜露所均不育異類姬漢舊邦無取雜種北虜僭號中原多歷年所惡積禍盈理至焦爛況僞孽昏狡自相

夷獫狁落攜離會豪猜貳方當係頸蠻邸縣首藁街而將軍魚游於沸鼎之中燕巢於飛幕之上不亦惑乎暮春三月江南草長雜花生樹羣鷺亂飛見故國之旗鼓感生平於疇日撫紘登陴豈不愴恨所以廉公之思趙將吳子之泣西河人之情也將軍獨無情哉想早勵良規自求多福當今皇帝盛明天下安樂白環西獻檣矢東來夜郎滇池解辦請職朝鮮昌海蹶角受化唯北狄野心嘯強沙塞之間欲延歲月之命耳中軍臨川殿下明德茂親總茲戎重方弔民洛汭伐罪秦中若遂不改方思僕言聊布往懷君其詳之伯之得書乃於壽陽擁衆八千歸降虎牙爲魏人所殺伯之既至以爲平北將軍西豫州刺史永新縣侯未之任復爲驍騎將軍又爲太中大夫久之卒於家其子猶有在魏者褚縉在魏魏人欲用之魏元會縉戲爲詩曰帽上著籠冠袴上著朱衣不知是今是不知非昔非魏人怒出爲始平太守日日行獵墮馬而死

陳慶之字子雲義興國山人也幼隨從梁武帝性好禁每從夜至旦不輟等輩皆寐唯慶之不寢聞呼卽至甚見親賞從平建鄴稍爲主書散財聚士恆思立效除奉朝請普通中魏徐州刺史元法僧於彭城求入內附以慶之爲武威將軍與胡龍牙成景儻率諸軍應接還除宣猛將軍文德主帥仍率軍送豫章王綽入鎮徐州魏遣安豐王元延明臨淮王元彧率衆十萬來拒延明先遣其別將巨大千觀兵近境慶

之擊破之後豫章王棄軍奔魏慶之乃斬關夜退軍士獲全普通七年安西將軍元樹出征壽春除慶之假節總知軍事魏豫州刺史李憲遣其子長鈞別築兩城相拒慶之攻拔之憲力屈遂降慶之入據其城轉東宮直閣大通元年隸領軍曹仲宗伐渦陽魏遣常山王元昭等東援前軍至鮑澗去渦陽四十里韋放曰賊鋒必是輕銳戰捷不足爲功如不利沮我軍勢不如勿擊慶之曰魏人遠來皆已疲倦須挫其氣必無不敗之理於是與麾下五百騎奔擊破其前軍魏人震恐慶之遣共諸將連營西進據渦陽城與魏相持自春至冬各數十百戰師老氣衰魏之援兵復欲築壘於軍後仲宗等恐腹背受敵謀退慶之杖節軍門曰須虜圍合然後與戰若欲班師慶之別有密敕仲宗壯其計乃從之魏人犄角作十三城慶之陷其四壘九城兵甲猶盛乃陳其俘馘鼓譟攻之遂奔潰斬獲略盡渦水咽流詔以渦陽之地置西徐州衆軍乘勝前頓城父武帝嘉焉手詔慰勉之大通初魏北海王元顥來降武帝以慶之爲假節颯勇將軍送顥還北顥於渙水卽魏帝號授慶之前軍大都督自銍縣進遂至睢陽魏將巨大千有衆七萬分築九壘以拒慶之自旦至中攻陷其三大千乃退時魏濟陰王元徽業率羽林庶子二萬人來救梁宋進屯考城慶之攻陷其城禽徽業仍趣大梁顥進慶之徐州刺史武都郡王仍率衆而西魏左僕射楊昱等率御仗羽林宗子庶子衆七萬據滎陽拒顥兵強城固魏將元天穆大軍復將至先遣其驍騎將軍朱兆騎將

魯安等援楊昱又遣右僕射余朱世隆西荊州刺史王羆據虎牢時滎陽未拔士衆皆恐慶之乃解鞍秣

馬宣喻衆曰我等纔有七千賊衆四十餘萬今日之事義不圖存須平其城壘一鼓悉使登城壯士東陽

宋景休義興魚大愨踰堞而入遂剋之俄而魏陣外合慶之率精兵三千大破之魯安於陣乞降天穆兆

單騎獲免進赴虎牢余朱世隆棄城走魏孝莊出居河北其臨淮王彧安豐王延明率百僚備法駕迎顯

入洛陽宮御前殿改元大赦顯以慶之爲車騎大將軍魏上黨王元天穆又攻拔大梁分遣王老生竇穆

據虎牢刁宣刁雙入梁宋慶之隨方掩襲並降天穆與十餘騎北度河慶之麾下悉著白袍所向披靡先

是洛中謠曰名軍大將莫自牢千兵萬馬避白袍自發銍縣至洛陽十四旬平三十二城四十七戰所向

無前初魏莊帝單騎度河宮衛嬪侍無改於常顯既得志荒于酒色不復視事與安豐臨淮計將背梁以

時事未安且資慶之力用慶之心知之乃說顯曰今遠來至此未伏尙多宜啟天子更請精兵并勒諸州

有南人沒此者悉須部送顯欲從之元延明說顯曰慶之兵不出數千已自難制今更增其衆寧肯爲用

魏之宗社於斯而滅顯由是疑慶之乃密啟武帝停軍洛下南人不一萬魏人十倍軍副馬佛念言於

慶之曰勳高不賞震主身危二事既有將軍豈得無慮今將軍威震中原聲動河塞屠顯據洛則千載一

時慶之不從顯前以慶之爲徐州刺史因求之鎮顯心憚之遂不遣魏將余朱榮余朱世隆元天穆余朱

兆等衆號百萬挾魏帝夾攻顓頊據洛陽六十五日凡所得城一時歸魏慶之度河守北中郎城三日十
一戰傷殺甚衆榮將退還時有善天文人劉靈助謂榮曰不出十日河南大定榮乃爲棧濟自碻石與顓
戰於河橋顓大敗走至臨潁被禽洛陽復入魏慶之馬步數千結陣東反榮親自來追軍人死散慶之乃
落鬚髮爲沙門間行至豫州州人程道雍等潛送出汝陰至都仍以功除右衛將軍封永興侯出爲北兗
州刺史都督緣淮諸軍事會有祆賊沙門僧強自稱爲帝土豪蔡伯寵起兵應之攻陷北徐州詔慶之討
焉慶之斬伯寵僧強傳其首中大通二年除南北司二州刺史加都督慶之至鎮遂圍縣瓠破魏潁州刺
史婁起揚州刺史是立寶於溱水又破行臺孫騰豫州刺史堯雄梁州刺史司馬恭於楚城罷義陽鎮兵
停水陸轉遊江湘諸州並得休息開田六千頃二年之後倉廩充實又表省南司州復安陸郡置上明郡
大同二年魏遣將侯景攻下楚州執刺史桓和景仍進軍淮上慶之破之時大寒雪景棄輜重走是歲豫
州饑慶之開倉振給多所全濟州人李昇等八百人表求樹碑頌德詔許焉五年卒諡曰武慶之性祇慎
每奉詔敕必洗沐拜受儉素不衣紈綺不好絲竹射不穿札馬非所便而善撫軍士能得其死力長子詔
嗣梁世寒門達者唯慶之與兪藥藥初爲武帝左右帝謂曰兪氏無先賢世人云兪錢非君子所宜改姓
喻藥曰當令姓自於臣歷位雲旗將軍安州刺史

慶之第五子昕字君章七歲能騎射十二隨父入洛適疾還都詣鴻臚卿朱异訪北閭事昕聚土畫城指麾分別异甚奇之慶之在縣瓠魏驍將堯雄子寶樂特爲敢勇求單騎校戰昕躍馬直趣寶樂雄卽潰散後爲臨川太守太清二年侯景圍歷陽敕召昕還昕啟云採石急須重鎮王質水軍輕弱恐虜必濟乃板昕爲雲騎將軍代質未及下渚景已度江爲景所禽令收集部曲將用之昕誓而不許景使其儀同范桃棒嚴禁之昕因說桃棒令率所領歸降襲殺王偉宋子仙桃棒許之遂立盟射城中遣昕夜縋而入武帝大喜敕卽受降簡文遲疑累日不決外事泄昕弗之知猶依期而下景邀得之逼昕令更射書城中云桃棒且輕將數十人先入景欲裹甲隨之昕不從遂見害

少弟暄學不師受文才俊逸尤嗜酒無節操徧歷王公門沉酒譴講過差非度其兄子秀常憂之致書於暄友人何胥冀以諷諫暄聞之與秀書曰且見汝書與孝典陳吾飲酒過差吾有此好五十餘年昔吳國張長公亦稱耽嗜吾見張時伊已六十自言引滿大勝少年時吾今所進亦多於往日老而彌篤唯吾與張季舒耳吾方與此子交歡於地下汝欲笑吾所志邪昔阮咸阮籍同遊竹林宣子不聞斯言王湛能玄言巧騎武子呼爲癡叔何陳留之風不嗣太原之氣歸然翻成可怪吾旣寂寞當世朽病殘年產不異於顛原名未動於卿相若不日飲醇酒復欲安歸汝以飲酒爲非吾以不飲酒爲過昔周伯仁度江唯三日

醒吾不以爲少鄭康成一飲三百盃吾不以爲多然洪醉之後有得有失成厥養之志是其得也使次公之狂是其失也吾常譬酒之猶水亦可以濟舟亦可以覆舟故江諮議有言酒猶兵也兵可千日而不用不可一日而不備酒可千日而不飲不可一飲而不醉美哉江公可與共論酒矣汝驚吾墮馬侍中之門陷池武陵之第徧布朝野自言焦棟也幸苟有過人必知之吾生平所願身沒之後題吾墓云陳故酒徒陳君之神道若斯志意豈避南征之不復賈誼之慟哭者哉何水曹眼不識孟鑄吾口不離瓢杓汝盜與何同日而醒與吾同日而醉乎政言其醒可及其醉不可及也速營糟丘吾將老焉爾無多言非爾所及暄以落魄不爲中正所品久不得調陳太康中徐陵爲吏部尙書精簡人物縉紳之士皆嚮慕焉暄以玉帽簪插髻紅絲布裹頭襍拂蹀躞至膝不陳爵里直上陵坐陵不之識命吏持下暄徐步而出舉止自若竟無忤容作書謗陵甚痛之後主之在東宮引爲學士及卽位遷通直散騎常侍與義陽王叔達尙書孔範度支尙書袁權侍中王琰金紫光祿大夫陳襲御史中丞沈攸散騎常侍王儀等恆入禁中陪侍游宴謂爲狎客暄素通脫以俳優自居文章諧謔語言不節後主甚親昵而輕侮之嘗倒縣于梁臨之以刃命使作賦仍限以晷刻暄援筆卽成不以爲病而傲弄轉甚後主稍不能容後遂擢艾爲帽加于其首火以熱之然及於髮垂泣求哀聲聞于外而弗之釋會衛尉卿柳莊在坐遽起撥之拜謝曰陳暄無罪臣

慈陛下有翫人之失輒矯赦之造次之愆伏待刑憲後主素重莊意稍解赦引暄出命莊就坐經數日暄發悖而死

蘭欽字休明中昌魏人也幼而果決趨捷過人宋未隨父子雲在洛陽恆於市驅豪馳後子雲還南梁天監中以軍功至冀州刺史欽兼文德主帥征南中五郡諸洞反者所至皆平欽有謀略勇決善戰步行日二百里勇武過人善撫馭得人死力以軍功封安懷縣男累遷都督梁南秦二州刺史進爵爲侯征梁漢事平進號智武將軍改授都督衡州刺史未及赴職會西魏攻圍南鄭梁州刺史杜懷瑋來請救欽乃大破魏軍追入斜谷斬獲略盡魏相安定公遣致馬二千疋請結鄰好欽百日之中再破魏軍威振鄰國詔加散騎常侍仍令赴職經廣州因破俚帥陳文徹兄弟並禽之至衡州進號平南將軍改封曲江縣公在州有惠政吏人詣闕請立碑頌德詔許焉後爲廣州刺史前刺史新渝侯映之薨南安侯恬權行州事冀得卽真及聞欽至饋厚貨廚人塗刀以毒削瓜進之欽及愛妾俱死帝聞大怒檻車收恬削爵土欽子夏禮侯景至厯陽率其部曲邀景兵敗死之

論曰陳伯之雖輕狡爲心而勇勁自立其累至爵位蓋有由焉及喪亂旣平去就不已卒得其死亦爲幸哉慶之初同鸞雀之游終懷鳩鵠之志及乎一見任長驅伊洛前無強陣攻靡堅城雖南風不競晚致

傾覆其所剋捷亦足稱之爾欽哉有先鳴位非盛受終逢鳩毒唯命也夫

南史卷六十一

南史卷六十一考證

陳伯之傳張繡劊刃於愛子○劊監手作手今从閣本

自旦至中攻陷其三大千乃退○梁書中作申退作降

顛由是疑慶之乃密啟武帝○疑監本訛陳今改正又梁書云顛由是致疑稍成疎貳慮慶之密啟乃表
高祖與此小異

破魏潁州刺史婁起揚州刺史是立寶於溱水○立魏書作云

南史卷六十一考證

唐

李

延

壽

撰

列傳第五十二

賀瑒

子革

司馬襲

朱昇

顧協

徐摛

子儉

陵子儉

弟孝克

鮑泉

鮑行卿

行卿弟客卿

賀瑒字德璉會稽山陰人晉司空循之玄孫也世以儒術顯伯祖道養工卜筮經遇工歌女人病死為筮之曰此非死也天帝召之歌耳乃以土塊加其心上俄頃而蘇祖道力善三禮有盛名仕宋為尚書三公郎建康令父損亦傳家業瑒少聰敏齊時沛國劉瓛為會稽府丞見瑒深器異之嘗與俱造吳郡張融指瑒謂曰此生將來為儒者宗矣薦之為國子生舉明經後為太學博士梁天監初為太常丞有司舉脩賓禮召見說禮義武帝異之詔朝朔望預華林講四年初開五館以瑒兼五經博士別詔為皇太子定禮撰五經義時武帝方創定禮樂瑒所建議多見施行七年拜步兵校尉領五經博士卒于館所著禮易老莊講疏朝廷博士議數百篇賓禮儀注一百四十五卷瑒於禮尤精館中生徒常數百弟子明經對策至數十人二子革季弟子琛並傳瑒業

革字文明少以家貧躬耕供養年二十始輟耒就文受業精力不怠有六尺方牀思義未達則橫臥其上

不盡其義終不肯食通三禮及長徧治孝經論語毛詩左傳爲兼太學博士長七尺八寸雍容都雅吐納蘊藉敕於永福省爲邵陵湘東武陵三王講禮後爲國子博士於學講授生徒常數百人出爲西中郎湘東王諮議參軍帶江陵令王於州置學以革領儒林祭酒講三禮荆楚衣冠聽者甚衆前後再監南平郡爲人吏所懷尋兼平西長史南郡太守革至孝常恨食祿代耕不及爲養在荊州歷爲郡縣所得俸秩不及妻孥專擬還鄉造寺以申感恩子徽美風儀能談吐深爲革愛先革卒革哭之因遭疾而卒季亦明三禮位中書黃門郎兼著作

琛字國寶幼孤伯父瑒授其經業一聞便通義理瑒異之常曰此兒當以明經致貴瑒卒後琛家貧常往還諸暨販粟以養母雖自執舟楫閑則習業尤精三禮年二十餘瑒之門徒稍從問道初瑒於鄉里聚徒教授四方受業者三千餘人瑒天監中亡至是復集琛乃築至郊郭之際茅茨數間年將三十便事講授旣世習禮學究其精微古迹先儒吐言辯絮坐之聽授終日不疲湘東王幼年臨郡彭城到漑爲行事聞琛美名命駕相造會琛正講學侶滿筵旣聞上佐忽來莫不傾動琛說經無輟曾不降意漑下車欣然就席便申問難往復從容義理該贍漑嘆曰通儒碩學復見賀生今且還城尋當相屈琛了不酬答神用頽然漑言之王請補郡功曹史琛辭以母老終於固執俄遭母憂廬於墓所服闋猶未還舍生徒復從之琛

哀毀積年骨立而已未堪講授諸生營救稍稍習業普通中太尉臨川王宏臨州召補祭酒從事琛年已四十餘始應辟命武帝聞其有學術召見文德殿與語悅之謂僕射徐勉曰琛殊有門業仍補王國侍郎稍遷兼中書通事舍人參軍禮事累遷尚書左丞詔琛撰新諡法便卽施用時皇太子議大功之末可以冠子嫁女琛駭議曰今旨以大功之末可得冠子嫁女不自冠自嫁推以記文竊猶致惑案嫁冠之禮本是父之所成無父之人乃可自冠故記稱大功小功並以冠子嫁子爲文非關唯得爲子己身不得也小功之末旣得自娶而亦云冠子娶婦其義益明故先列二服每明冠子嫁子結於後句方顯自娶之義旣明小功自娶卽知大功自冠矣蓋是約言而見旨若謂緣父服大功子服小功小功服輕故得爲子冠嫁大功服重故不得自嫁自冠者則小功之末非明父子服殊不應復云冠子嫁子也若謂小功之文言己可娶大功之文不言己冠故知身有大功不得自行嘉禮但得爲子冠嫁竊謂有服不行嘉禮本爲吉凶不可相干子雖小功之末可得行冠嫁猶應須父得爲其冠嫁若父於大功之末可以冠子嫁子是於吉凶禮無礙吉凶禮無礙豈不得自冠自嫁若自冠自嫁於事有礙則冠子嫁子寧獨可通今許其冠子而塞其自冠是琛之所惑也又今旨推下殤小功不可娶婦則降服大功亦不得爲子冠嫁伏尋此旨若爲降服大功不可冠子嫁子則降服小功亦不可自冠自嫁是爲凡厥降服大功小功皆不得冠娶矣記文

應云降服則不可寧得唯稱下殤今不言降服的舉下殤實有其義夫出嫁後或有再降出後之身於本姊妹降爲大功若是大夫服士父又以尊降則成小功其於冠嫁義無以異所以然者出嫁則有受我出後則有傳重並欲使薄於此而厚於彼此服雖降彼服則隆昔實蕃親雖復再降猶依小功之禮可冠可娶若夫蕃降大功大功降爲小功止是一等降殺有倫服未嫁冠故無有異唯下殤之服特明不娶之義者蓋緣以幼弱之故天喪情深既無受厚他姓又異傳重彼宗嫌其年幼頓成殺略故特明不娶以示本重之恩是以凡厥降服冠嫁不殊唯在下殤乃明不娶其義若此則不得言大功之降服皆不冠嫁也且記云下殤小功言下殤則不得通於中上語小功又不兼於大功若實大功小功降服皆不冠嫁上中二殤亦不冠嫁者記不得直云下殤小功則不可恐非文意此又琛之所疑也遂從琛議加員外散騎常侍舊尙書南坐無貂貂自琛始也遷御史中丞參禮儀如先琛性貪嗇多受賕賂家產既豐買主第爲宅爲有司奏坐免官後爲通直散騎常侍領尙書左丞參禮儀事琛前後居職凡郊廟諸儀多所創定每進見武帝與語常移晷刻故省中語曰上殿不下有賀雅琛容止閑雅故時人呼之遷散騎常侍參禮儀如故時武帝年高任職者緣飾奸諂深害時政琛敢陳事條封奏大略其一曰今北邊稽服政是生聚教訓之時而天下戶口減落誠當今之急務國家之於關外賦稅蓋微乃至年常租調動致逋積而人失安居

盜非牧守之過其二事曰今天下宰守所以皆尙貪殘罕有廉白者良由風俗侈靡使之然也欲使人守廉隅吏尙清白安可得邪今誠宜嚴爲禁制導之以節儉貶黜雕飾糾奏浮華使衆皆知變其耳目改其好惡則易於反掌其三事曰斗筭之人詭競求進運挈瓶之智徼分外之求以深刻爲能以繩逐爲務長弊增奸寔由於此今誠願責其公平之効黜其殘愚之心則下安上謐無徼倖之患矣其四事曰自征伐北境帑藏空虛今天下無事而猶日不暇給良有以也夫國弊則省其事而息其費省事則養人費息則財聚若言小費不足害財則終年不息矣以小役不足妨人則終年不止矣書奏武帝大怒召主書於前口受敕責琛曰朕有天下四十餘年公車讜言日聞聽覽每苦倥傯更增惛惑卿珥貂紆組博問洽聞不宜同於鬪茸止取名字言我能上事恨朝廷不能受卿云今北邊稽服政是生聚教訓之時而人失安居牧守之過但大澤之中有龍有蛇縱不盡善不能皆惡卿可分明顯出其人卿云宜導之以節儉又云至道者必以淳素爲先此言大善夫子言其身正不令而行其身不正雖令不從朕絕房室三十餘年不與女人同屋而寢亦三十餘年於居處不過一牀之地雕飾之物不入於宮此亦人所共知受生不飲酒受生不好音聲所以朝中曲宴未嘗奏樂朕三更出理事隨事多少事或少中前得竟事多至日昃方得就食既常一食若晝若夜無有定時疾苦之日或亦再食昔腰過於十圍今之瘦削裁二尺餘舊帶猶存非

爲妄說爲誰爲之救物故也書云股肱惟人良臣惟聖向使朕有股肱可得中主今乃不免居九品之下不令而行徒虛言耳卿又云百司莫不奏事詭競求進今不許外人呈事於義可否以噎廢殮此之謂也若斷呈事誰尸其任專委之人云何可得是故古人云專聽生姦獨任成亂何者是宜具以奏聞琛奉敕但謝過而已不敢有所指斥太清二年爲中軍宣城王長史侯景陷城琛被創未死賊求得之輿至闕下求見僕射王克領軍朱異勸開城納賊克等讓之涕泣而止賊復輿送莊嚴寺療之明年臺城不守琛逃歸鄉里其年賊寇會稽復執琛送出都以爲金紫光祿大夫卒琛所撰三禮講疏五經滯義及諸儀注凡百餘篇子翊位巴山太守

司馬襲字元表河內溫人也曾祖純之晉大司農高密敬王祖讓之員外常侍父燮晉三禮仕齊位國子博士襲少傳家業強力專精手不釋卷沛國劉瓛爲儒者宗嘉其學深相賞好與樂安任昉善昉亦推重之梁天監初詔通儒定五禮有舉襲脩嘉禮除尙書祠部郎時創定禮樂襲所建議多見施行兼中書通事會人每吉凶禮當時名儒明山賓賀瑒等疑不能斷者皆取決焉累遷御史中丞十六年出爲宣毅南康王長史行府國并石頭戍軍事襲雖居外官有敕預文德武德二殿長名問訊不限日遷晉安王長史卒王命記室庾肩吾集其文爲十卷所撰嘉禮儀注一百一十二卷

朱昇字彥和吳郡錢塘人也祖昭之以學解稱於鄉叔父謙之字處光以義烈知名年數歲所生母亡昭之假葬於田側爲族人朱幼方燎火所焚同產姊密語之謙之雖小便哀感如持喪長不昏娶齊永明中手刃殺幼方詣獄自繫縣令申靈勗表上之齊武帝嘉其義慮相報復乃遣謙之隨曹武西行將發幼方子懌於津陽門伺殺謙之兄異之卽昇父也又刺殺懌有司以聞武帝曰此皆是義事不可問悉赦之吳興沈顛聞而歎曰弟死於孝兄殉於義孝友之節萃此一門異之字處林有志節著辯相論幼時顧歡見異之以女妻焉仕齊官至吳平令昇年數歲外祖顧歡撫之謂其祖昭之曰此兒非常器當成卿門戶年十餘好羣聚痛博頗爲鄉黨所患及長乃折節從師梁初開五館昇服膺於博士明山賓居貧以傭書自業寫畢便誦徧覽五經尤明禮易涉獵文史兼通雜藝博奕書算皆其所長年二十出都詣尙書令沈約面試之因戲昇曰卿年少何乃不廉昇逡巡未達其旨約乃曰天下唯有文義某書卿一時將去可謂不廉也尋上書言建康宜置獄司比廷尉敕付尙書詳議從之舊制年二十五方得釋褐時昇適二十一特敕擢爲揚州議曹從事史尋有詔求異能之士五經博士明山賓表薦昇年時尚少德備老成在獨無散逸之想處闇有對賓之色器字弘深神表峯峻金山萬丈緣陟未登玉海千尋窺映不測加以珪璋新琢錦組初構觸響鏗鏘遇采便發觀其信行非唯十室所稀若使負重遙途必有千里之用武帝召見使

說孝經周易義甚悅之謂左右曰朱昇實異後見明山賓曰卿所舉殊得人仍召直西省俄兼太學博士
其年帝自講孝經使昇執讀遷尙書儀曹郎入兼中書通事舍人後除中書郎時秋日始拜有飛蟬正集
昇武冠上時咸謂蟬珥之兆遷太子右衛率普通五年大舉北侵魏徐州刺史元法僧遣使請舉地內屬
詔有司議其虛實昇曰自王師北討尅獲相繼徐州地轉削弱咸願歸罪法僧懼禍其降必非僞也帝仍
遣昇報法僧并救衆軍應接受昇節度及至法僧遵承朝旨如昇策焉遷散騎常侍昇容貌魁梧能舉止
雖出自諸生甚閑軍國故實自周捨卒後昇代掌機密其軍旅謀謨方鎮改換朝儀國典詔誥敕書並典
掌之每四方表疏當局簿領諮詳請斷填委於前昇屬辭落紙覽事下議縱橫敏贍不暫停筆頃刻之間
諸事便了遷右衛將軍啟求於儀賢堂奉述武帝老子義敕許之及就講朝士及道俗聽者千餘人爲一
時之盛時城西又開士林館以延學士昇與左丞賀琛遞日述武帝禮記中庸義皇太子又召昇於玄圃
講易大同八年改加侍中昇博解多藝園基上品而貪財賈賄欺罔視聽以伺候人主意不肯進賢黜惡
四方餉饋曾無推拒故遠近莫不忿疾起宅東陂窮乎美麗晚朝來下酣飲其中每迫曠黃慮臺門將闔
乃引其鹵簿自宅至城使捉城門亭留管籥旣而聲勢所驅薰灼內外產與羊侃相埒好飲食極滋味聲
色之娛子鵝魚鱸不輟於口雖一帛必齋飴餌而輕傲朝賢不避貴戚人或誨之昇曰我寒士也

遭逢以至今日諸貴皆恃枯骨見輕我下之則爲蔑尤甚我是以先之自徐勉周捨卒後外朝則何敬容
內省則異敬容質慤無文以綱維爲己任異文華敏洽曲營世譽二人行異而俱見倖異在內省十餘年
未嘗被譴司農卿傅岐嘗謂異曰今聖上委政於君安得每事從旨頃者外聞殊有異論異曰政言我不
能諫爭耳當今天子聖明吾豈可以其所聞干忤天聽太清二年爲中領軍舍人如故初武帝夢中原盡
平舉朝稱慶甚悅以語異曰吾生平少夢夢必有實異曰此字內方一之徵及侯景降敕召羣臣廷議尙
書僕射謝舉等以爲不可許武帝欲納之未決嘗夙興至武德閣口獨言我國家猶若金甌無一傷缺承
平若此今便受地詎是事宜脫至紛紛悔無所及異探帝微旨答曰聖明御寓上應蒼立北土遺黎誰不
慕仰爲無機會未達其心今侯景分魏國大半遠歸聖朝若不容受恐絕後來之望帝深納異言又感前
夢遂納之及貞陽侯敗沒帝憂曰今乃作管家事乎尋而貞陽自魏遣使述魏相高澄欲申和陸敕有司
定議異又議以和爲允帝從之其年六月遣建康令謝挺通直郎徐陵使北通好時侯景鎮壽春疑懼累
啟請絕和及致書與異餉金二百兩又致書於制局監周石珍令具申聞異納其金而不停北使景遂反
初景謀反合州刺史鄱陽王範司州刺史羊鴉仁並累有啟聞異以景孤立寄命必不應爾乃謂使曰鄱
陽王遂不許國家有一客並不爲聞奏及賊至板橋使前壽州司馬徐思玉先至求見於上上召問之思

玉給稱反賊請閒陳事上將屏左右舍人高善寶曰思玉從賊中來情僞難測安可使其獨在殿上時昇侍坐乃曰徐思玉豈是刺客邪何言之僻善寶曰思玉已將臨賀入北詎可輕信言未卒思玉果出賊啟昇大慙賊遂以討昇及陸驗爲名及景至城下又射啟言朱昇等蔑弄朝權輕作威福臣爲讒臣所陷欲加屠戮陛下誅昇等臣歛轡北歸帝問簡文曰有是乎對曰然帝召有司將誅之簡文曰賊特以昇等爲名耳今日殺昇無救於急適足貽笑將來若祇氛旣息誅之未晚帝乃止之昇方倖在朝莫不側目雖皇太子亦不能平至是城內咸尤昇簡文爲四言愍亂詩曰愍彼阪田嗟斯氛霧謀之不臧蹇我王度又製圍城賦末章云彼高冠及厚履並鼎食而乘肥升紫霄之丹地排玉殿之金扉陳謀謨之敗沃宣政刑之福威四郊以之多壘萬邦以之未綏問豺狼其何者訪虺蜴之爲誰並以指昇又帝登南樓望賊顧謂昇曰四郊多壘誰之罪歟昇流汗不能對慙憤發病卒時年六十七詔贈尙書右僕射舊尙書官不以爲贈及昇卒武帝悼惜之方議贈事左右有善昇者乃啟曰昇生平所懷願得執法帝因其宿志特有此贈昇居權要三十餘年善承上旨故特被寵任歷官自員外常侍至侍中四官皆珥貂自右衛率至領軍四職並驅鹵簿近代未之有也昇及諸子自潮溝列宅至青溪其中有臺池翫好每暇日與賓客遊焉四方饋遺財貨充積性吝嗇未嘗有散施廚下珍羞恆腐爛每月常棄十數車雖諸子別房亦不分贖所撰禮易

講疏及儀注文集百餘篇子肅位國子博士次閩司徒掾並遇亂卒

顧協字正禮吳郡吳人晉司空和六世孫也幼孤隨母養於外氏外從祖右光祿大夫張永嘗攜內外孫姪游虎丘山協年數歲永撫之曰兒欲何戲協曰兒政欲枕石漱流永歎息曰顧氏興於此子及長好學以精力稱外氏諸張多賢達有識鑒內弟率尤推重焉初爲揚州議曹從事舉秀才尙書令沈約覽其策而歎曰江左以來未有斯作爲兼廷尉正太尉臨川王聞其名召掌書記仍侍西豐侯正德讀正德爲巴西梓潼郡協除所部新安令未至縣遭母憂刺史始興王厚資遣之送喪還於峽江遇風同旅皆漂溺唯協一舫觸石得泊焉咸謂精誠所致張率嘗薦之於帝問協年率言三十有五帝曰北方高涼四十強仕南方卑濕三十已衰如協便爲已老但其事親孝與友信亦不可遺於草澤卿便稱敕喚出於是以協爲兼太學博士累遷湘東王參軍兼記室普通中有詔舉士湘東王表薦之卽召拜通直散騎侍郎兼中書通事舍人大通三年靈擊大航華表然盡建康縣馳啟協以爲非吉祥未卽呈聞後帝知之曰靈之所擊一本罰惡龍二彰朕之有過協掩惡揚善非曰忠公由是見免後守鴻臚卿員外散騎常侍卿舍人並如故自爲近臣便繁幾密每有述製敕前示協時輩榮之卒官無衾以斂爲士子所矜歎武帝悼惜之爲舉哀贈散騎常侍諡曰溫子協少清介有志操初爲廷尉正冬服單薄寺卿蔡法度欲解襦與之憚其清嚴

不敢發口謂人曰我願解身上襦與顧郎顧郎難衣食者竟不敢以遺之及爲舍人同官者皆潤屋協在省十六載器服飲食不改於常有門生始來事協知其廉潔不敢厚餉止送錢二千協發怒杖二十因此事者絕於饋遺自丁艱憂遂終身布衣蔬食少時將娉舅息女未成昏而協母亡免喪後不復娶年六十餘此女猶未他適協義而迎之晚雖判合卒無盾嗣協博極羣書於文字及禽獸草木尤稱精詳撰異姓苑五卷瑣語十卷文集十卷並行於世

徐摛字士秀東海郟人也一字士纘祖憑道宋海陵太守父超之梁天監初位員外散騎常侍摛幼好學及長徧覽經史屬文好爲新變不拘舊體晉安王綱出戍石頭武帝謂周捨曰爲我求一人文學俱長兼有行者欲令與晉安游處捨曰臣外弟徐摛形質陋小若不勝衣而堪此選帝曰必有仲宣之扶亦不簡貌乃以摛爲侍讀大通初王總戎北侵以摛兼監蠻府長史多贊戎政教命軍書多自摛出王入爲皇太子轉家令兼管記尋帶領直摛文體既別春坊盡學之宮體之號自斯而始帝聞之怒召摛加誚責及見應對明敏辭義可觀乃意釋因問五經大義次問歷代史及百家雜記末論釋教摛商較從橫應答如響帝甚加歎異更被親狎寵遇日隆領軍朱异不悅謂所親曰徐叟出入兩宮漸來見逼我須早爲之所遂承聞白帝曰摛年老又愛泉石意在一郡自養帝謂摛欲之乃召摛曰新安大好山水任昉等並經爲之

卿爲我臨此郡中大通三年遂出爲新安太守爲政清靜教人禮義勸課農桑月風俗便改秩滿爲中
庶子時臨城公納夫人王氏卽簡文妃姪女晉宋以來初昏三日婦見舅姑衆賓皆列觀引春秋義云丁
丑夫人姜氏至戊寅公使大夫宗婦覲用幣戊寅卽丁丑之明日故禮官據此皆云宜依舊質簡文問摛
摛議曰儀禮云質明贊見婦於舅姑雜記又云婦見舅姑兄弟姊妹皆立於堂下政言婦是外宗未審嫺
令所以舅延外客姑率內賓堂下之儀以備盛禮近代婦於舅姑本有戚屬不相瞻者夫人乃妃姪女有
異他姻覲見之儀謂應可略簡文從其議除太子左衛率及侯景攻陷臺城時簡文居永福省賊衆奔入
侍衛走散莫有存者摛獨侍立不動徐謂景曰侯公當以禮見何得如此凶威遂折侯景乃拜由是常憚
摛簡文嗣位進授左衛將軍固辭不拜簡文被閉摛不獲朝謁因感氣疾而卒年七十八贈侍中太子詹
事諡貞子長子陵最知名

陵字孝穆母臧氏嘗夢五色雲化爲鳳集左肩上已而誕陵年數歲家人攜以候沙門釋寶誌寶誌摩其
頂曰天上石麒麟也光宅寺慧雲法師每嗟陵早就謂之顏回八歲屬文十三通莊老義及長博涉史籍
從橫有口辯父摛爲晉安王諮議王又引陵參寧蠻府軍事王立爲皇太子東宮置學士陵充其選稍遷
尚書度支郎出爲上虞令御史中丞劉孝儀與陵先有隙風聞劾陵在縣贓汚因坐免久之爲通直散騎

侍郎梁簡文在東宮撰長春殿義記使陵爲序又令於少傅府述今所製莊子義太清二年兼通直散騎
常侍使魏魏人授館宴賓是日甚熱其主客魏收譏陵曰今日之熱當由徐常侍來陵卽答曰昔王肅至
此爲魏始制禮儀今我來聘使卿復知寒暑收大慙齊文襄爲相以收失言囚之累日及侯景入寇陵父
攜先在圍城之內陵不奉家信便蔬食布衣若居哀恤會齊受魏禪梁元帝承制於江陵復通使於齊陵
累求復命終拘留不遣乃致書於僕射楊遵彥不報及魏平江陵齊送貞陽侯明爲梁嗣乃遣陵隨還太
尉王僧辯初拒境不納明往復致書皆陵辭也及明入僧辯得陵大喜以爲尙書吏部郎兼掌詔誥其年
陳武帝誅僧辯仍進討韋載而任約徐嗣徽乘虛襲石頭陵感僧辯舊恩往赴約約平武帝釋陵不問以
爲尙書左丞紹泰二年又使齊還除給事黃門侍郎祕書監陳受禪加散騎常侍天嘉四年爲五兵尙書
領大著作六年除散騎常侍御史中丞時安成王頊爲司空以帝弟之尊權傾朝野直兵鮑僧叡假王威
風抑塞辭訟大臣莫敢言陵乃奏彈之文帝見陵服章嚴肅若不可犯爲斂容正坐陵進讀奏狀時安成
王殿上侍立仰視文帝流汗失色陵遣殿中郎引王下殿自是朝廷肅然遷吏部尙書領大著作陵以梁
末以來選授多失其所於是提舉綱維綜覈名實時有冒進求官馳競不已者乃爲書宣示之曰永定之
時聖朝草創干戈未息尙無條序府庫空虛賞賜懸乏白銀難得黃札易營權以官階代於錢絹義在撫

接無計多少致令員外常侍路上比肩諮議參軍市中無數豈是朝章應其如此今衣冠禮樂日當年華何可猶作舊意非理望也所見諸君多踰本分猶言大屈未諭高懷若問梁朝朱領軍昇亦爲卿相此不踰其本分耶比是天子所拔非關選序梁武帝云世間人言有目色我特不目色范曄宋文帝亦云人豈無運命每有好官缺輒憶羊玄保此則清階顯職不由選也既忝衡流諸賢深明鄙意自是衆咸服焉時論比之毛玠及宣帝入輔謀黜異志者引陵預其議廢帝卽位封建昌縣侯太建中爲尙書左僕射抗表推周弘正王勵等帝召入內殿曰卿何爲固辭而舉人乎陵曰弘正舊藩長史王勵太平中相府長史張種帝鄉賢戚若選賢舊臣宜居後固辭累日乃奉詔及朝議北侵宣帝命舉元帥衆議在隋于量陵獨曰不然吳明徹家在淮左悉彼風俗將略人才當今無過者於是爭論數日不能決都官尙書裴忌曰臣同徐僕射陵應聲曰非但明徹良將忌卽良副也是日詔明徹爲大都督令忌監軍事遂剋淮南數十州地宣帝因置酒舉杯屬陵曰賞卿知人七年領國子祭酒以公事免侍中僕射尋加侍中給扶十二年爲中書監領太子詹事以年老累表求致事宣帝亦優禮之詔將作爲造大齋令陵就第攝事後主卽位遷左光祿大夫太子少傅至德元年卒年七十七詔贈特進初後主爲文示陵云他日所作陵嘆之曰都不成辭句後主銜之至是諡曰章僞侯陵器局深遠容止可觀性又清簡無所營樹俸祿與親族共之太建中

食建昌戶戶送米至水次親戚有貧匱者皆召令取焉數日便盡陵家尋致乏絕府寮怪問其故陵云我有車牛衣裳可賣餘家有可賣不其周給如此少而崇信釋教經論多有釋解後主在東宮令陵講大品經義學名僧自遠雲集每講筵商較四坐莫能與抗目有青精時人以爲聰慧之相也自陳創業文檄軍書及受禪詔策皆陵所製爲一代文宗亦不以矜物未嘗詆訶作者其於後進接引無倦文宣之時國家有大手筆必命陵草之其文頗變舊體緝裁巧密多有新意每一文出好事者已傳寫成誦遂傳于周齊家有其本後逢喪亂多散失存者三十卷陵有四子儉份儀傳

儉一名報幼而脩立勤學有志操汝南周弘直重其爲人妻之以女梁元帝召爲尚書金部郎中常侍宴賦詩元帝歎賞之曰徐氏之子復有文矣魏平江陵還建鄴累遷中書侍郎太建初廣州刺史歐陽紇舉兵反宣帝令儉持節喻旨紇見儉盛列仗衛言辭不恭儉曰呂嘉之事誠當已遠將軍獨不見周迪陳寶應乎紇默然不答懼儉沮衆不許入城置儉於孤園寺紇嘗出見儉儉謂曰將軍業已舉事儉須還報天子儉之性命雖在將軍將軍成敗不在於儉幸不見留紇於是遣儉從間道馳還宣帝乃命章昭達討紇以儉監昭達軍紇平爲兼中書通事舍人後主立累遷尋陽內史爲政嚴明盜賊靜息遷散騎常侍襲封建昌侯入爲御史中丞儉公平無所阿附尚書令江總望重一時爲儉所劾後主深委任焉禎明二年卒

份少有父風九歲爲夢賦陵見之謂所親曰吾幼屬文亦不加此爲海鹽令有政績入爲太子洗馬性孝弟陵嘗疾篤份燒香泣涕跪誦孝經日夜不息如是者三日陵疾豁然而愈親戚皆謂份孝感所致先陵卒

儀少聰警仕陳位尙書殿中郎陳亡隱于錢塘之藉山隋煬帝召爲學士尋除著作佐郎大業四年卒

陵弟孝克有口辯能談玄理性至孝遭父憂殆不勝喪事所生母陳氏盡就養之道梁末侯景寇亂孝克養母饘粥不能給妻東莞臧氏領軍將軍盾女也甚有容色孝克乃謂曰今饑荒如此供養交闕欲嫁卿與當世人望彼此俱濟於卿如何臧氏弗許之時有孔景行者爲侯景將多從左右逼而迎之臧氏涕泣而去所得穀帛悉以遺母孝克又剃髮爲沙門改名法整兼乞食以充給焉臧氏亦深念舊恩數致私饋餉故不乏絕後景行戰死臧氏伺孝克於途中累日乃見謂孝克曰往日之事非爲相負今旣得脫當歸

供養孝克嘿然無答於是歸俗更爲夫妻後東遊居錢塘之佳義里與諸僧討論釋典遂通三論每日二時講巨講佛經晚講禮傳道俗受業者數百人天嘉中除剡令非其好尋去職太建四年徵爲祕書丞不就乃蔬食長齋持菩薩戒晝夜講誦法華經宣帝甚嘉其操行後爲國子祭酒孝克每侍宴無所食噉至席散當其前膳羞損減帝密記以問中書舍人管斌斌自是伺之見孝克取珍果納紳帶中斌當時莫識

其意後尋訪方知其以遺母斌以啟宣帝嗟歎良久乃敕自今宴享孝克前饌並遣將還以餉其母時論美之至德中皇太子入學釋奠百司剖列孝克發孝經題後主詔皇太子北面致敬禎明元年入爲都官尙書自晉以來尙書官僚皆攜家屬居省省在臺城內下舍門中有閣道東西跨路通于朝堂其第一卽都官省西抵閣道年代久遠多有鬼怪每夜昏之際無故有聲光或見人著衣冠從井中出須臾復沒或門閣自然開閉居多死亡尙書周確卒於此省孝克代確便卽居之經兩載祆變皆息時人咸以爲貞正所致孝克性清素好施惠故不免飢寒後主敕以石頭津稅給之孝克悉用設齋寫經隨盡二年爲散騎常侍侍東宮陳亡隨例入長安家道壁立所生母患欲糲米爲粥不能常辦母亡後孝克遂常噉麥有遺糲米者孝克對而悲泣終身不復食焉開皇十二年長安疾疫隋文帝聞其名行召令於尙書都堂講金剛般若經尋授國子博士後侍東宮講禮傳十九年以疾卒年七十三臨終正坐念佛室內有非常香氣鄰里皆驚異之子萬載位太子洗馬

鮑泉字潤岳東海人也父幾字景玄家貧以母老詣吏部尙書王亮干祿亮一見嗟賞舉爲春陵令後爲明山賓所薦爲太常丞以外兄傅昭爲太常依制總服不得相臨改爲尙書郎終於湘東王諮議參軍泉美鬚髯善舉止身長八尺性甚警悟博涉史傳兼有文筆少事元帝爲國常侍早見擢任謂曰我文之外

無出卿者後爲通直侍郎常乘高幟車從數十左右繖蓋服玩甚精道逢國子祭酒王承承疑非舊貴遣訪之泉從者答曰鮑通直承怪焉復欲辱之遣通車問鮑通直復是何許人而得如此都下少年遂爲口實見尙豪華人相戲曰鮑通直復是何許人而得如此以爲笑謔及元帝承制累遷至信州刺史方等之敗元帝大怒泉與王僧辯討之僧辯曰計將安出泉曰事等沃雪何所多慮僧辯曰君言文士常談耳江東少有武幹非精兵一萬不可以往竟陵甲卒不久當至猶可重申欲與卿入言之泉許諾及僧辯如向言泉嘿然不繼元帝大怒於是械繫僧辯時人比泉爲酈寄泉旣專征長沙久而不克元帝乃數泉二十罪爲書責之曰面如冠玉還疑木偶鬚似蝟毛徒勞繞喙乃從獄中起王僧辯代泉爲都督使舍人羅重歡領齋仗三百人與僧辯往及至長沙遣通泉曰羅舍人被令送王竟陵來泉愕然顧左右曰得王竟陵助我經略賊不足平矣乃拂席坐而待之僧辯入乃背泉而坐曰鮑郎卿有罪令旨使我饒卿卿勿以故意見期命重歡出令示泉鏢之牀下泉顏色自若了無懼容曰稽緩王師罪乃甘分但恐後人更思鮑泉之憤憤耳僧辯色甚不平泉乃啟陳淹遲之罪元帝尋復其任令與僧辯等東逼邵陵王於鄧州鄧州平元帝以世子方諸爲刺史泉爲長史行州府事方諸見泉和弱每有諮陳未嘗用使泉伏牀騎背爲馬書其衣作其姓名由是州府盡相欺侯景密遣將宋子仙任約襲之方諸與泉不恤軍政唯蒲酒自樂云賊

何由得至既而傳告者衆始命闔門城陷賊執方諸及泉送之泉所後景攻王僧辯於巴陵不尅敗還乃殺泉於江夏沉其屍於黃鶴磯初泉夢著朱衣行水上及死舉身帶血而沉于江如其夢泉於儀禮尤明撰新儀三十卷行於世時又有鮑行卿以博學大才稱位後軍臨川王錄事兼中書舍人遷步兵校尉上玉璽銘武帝發詔褒賞好韻語及拜步兵面謝帝曰作舍人不免貧得五校實大校例皆如此有集二十卷撰皇室儀十三卷乘輿龍飛記二卷

弟客卿位南康太守客卿三子檢正至並才藝知名俱爲湘東王五佐正好交遊無日不適人人爲之語曰無處不逢烏噪無處不逢鮑佐正不爲湘東王所知獻書告退王恨之及建鄴城陷正爲尙書外兵郎病不能起景雜於死屍焚之王聞之曰忠非紀信利非象齒焚如棄如於是乎得君子以此知湘東王不仁檢爲湘東鎮西府中記室使蜀不屈於武陵王見害

論曰夏侯勝云士患不明經術經術明取青紫如拾地芥耳於贊揚賀琛朱异司馬懿其得之矣而异遂微寵倖任事居權不能以道佐時苟取容媚及延寇敗國實昇之由禍難旣彰不明其罪亦旣身死寵贈猶殊罰旣弗加賞亦斯濫夫太清之亂固其宜矣顧協清介足以追蹤古人徐摛貞正仁者信乎有勇孝穆聰明特達締構興王獻替謀猷亮直斯在泉本文房之士每處荷戈之任非材之責勝任不亦難乎

乾隆四年校刊

南史卷六十一列傳

十一

南史卷六十二

南史卷六十二考證

朱异傳起宅東坡窮乎美麗晚朝來下酣飲其中○朝一本作日

子鵝炮鮓不輟於口○鮓一本作鮓字書鮓音蘇與甦同若鮓恐非佳品疑有訛字

慙彼阪田○阪南本作陂

徐摛傳簡文被閉摛不獲朝謁○梁書閉字上有幽字

徐陵傳既忝衡流諸賢深明鄙意○忝監本誤余今改正又陳書云既忝衡流應須粉墨所望諸賢深明

鄙意較明白

弘正舊藩長史王勣太平中相府長史○陳書無中字

徐儉傳儉一名報○報陳書作衆

汝南周弘直重其爲人○直陳書作正

徐陵弟孝克傳欲嫁卿與當世人望彼此俱濟○當世陳書作富應改从之

鮑泉傳父幾○幾梁書作機

泉於儀禮尤明撰新儀三十卷行於世○三梁書作四

南史卷六十二考證

南史卷六十三

唐

李

延

壽

撰

列傳第五十三

王神念 子僧辯 羊侃 子球 鷓鴣 羊鴉仁

王神念太原祁人也少好儒術尤明內典仕魏位潁川太守與子僧辯據郡歸梁封南城縣侯歷安成武陽宣城內史皆著政績後為青冀二州刺史神念性剛正所更州郡必禁止淫祠時青州東北有石鹿山臨海先有神廟祆巫欺惑百姓遠近祈禱糜費極多及神念至便令毀撤風俗遂改後徵為右衛將軍卒於官諡曰莊及元帝初追贈侍中中書令改諡忠公神念少善騎射及老不衰嘗於武帝前手執二刀楯左右交度馭馬往來冠絕羣伍時復有楊華者能作驚軍騎亦一時妙捷帝深賞之華本名白花武都仇池人父大眼為魏名將華少有勇力容貌瓌偉魏胡太后逼幸之華懼禍及大眼死擁部曲載父屍改名華來降胡太后追思不已為作楊白花歌辭使宮人晝夜連臂蹋蹄歌之聲甚悽斷華後位太子左衛率卒於侯景軍中神念長子遵業位太僕卿次子僧辯

僧辯字君才學涉該博尤明左氏春秋言辭辯捷器宇肅然雖射不穿札而有陵雲之氣元帝後為江州

刺史僧辯隨府爲中兵參軍時有安成望族劉敬躬者田間得白蛆化爲金龜將銷之龜生光照室敬躬以爲神而禱之所請多驗無賴者多依之平生有德有怨者必報遂謀作亂遠近響應元帝命中直兵參軍曹子郢討之使僧辯襲安成子郢既破其軍敬躬走安成僧辯禽之又討平安州反蠻由是以勇略稱元帝除荊州僧辯爲貞毅府諮議參軍代柳仲禮爲竟陵太守及侯景反元帝命僧辯總督舟師一萬赴援及至臺城陷沒侯景悉收其軍實而厚加綏撫遣歸竟陵於是僭道兼行西就元帝元帝承制以爲領軍將軍及荆湘疑貳元帝令僧辯及鮑泉討之時僧辯以竟陵閭部下皆勁勇猶未盡來意欲待集然後上頓與泉俱入使泉先言之泉入不敢言元帝問僧辯僧辯以情對元帝性忌以爲遷延不去大怒厲聲曰卿憚行拒命欲同賊邪今唯死耳僧辯對曰今日就戮甘心但恨不見老母帝自斫之中其髀流血至地悶絕久之方蘇卽送廷尉并收其子姪並繫之其母脫簪珥待罪帝意解賜以良藥故不死會岳陽軍襲江陵人情搔擾元帝遣就獄出僧辯以爲城內都督俄而岳陽奔退而鮑泉力不能尅長沙帝命僧辯代之僧辯仍部分將帥并力攻圍遂平湘土還復領軍將軍侯景浮江西寇軍次夏首僧辯爲大都督軍次巴陵景既陷郢城將進寇荊州於是緣江屯戍望風請服僧辯並沉公私船於水分命衆軍乘城固守艦艇臥鼓安若無人翌日賊衆濟江輕騎至城下謂城中曰語王領軍何不早降僧辯使答曰大軍但向

荊州此城自當非礙僧辯百口在人掌握豈得便降景軍肉薄苦攻城內同時鼓譟矢石雨下賊乃引退
元帝又命平北將軍胡僧祐率兵援僧辯是日賊復攻城不尅又爲火艦燒柵風不便自焚而退有流星
墮其營中賊徒大駭相顧失色賊帥任約又爲陸法和所禽景乃燒營夜遁旋軍夏首元帝以僧辯爲征
東將軍開府儀同三司江州刺史封長寧縣公命卽率巴陵諸軍沿流討景攻拔魯山仍攻郢卽入羅城
又有大星如車輪墜賊營去地十丈變成火一時碎散有龍自城出五色光曜入城前鸚鵡洲水中景聞
之倍道歸建鄴賊帥宋子仙等困感求輸郢城身還就景僧辯僞許之子仙謂爲信然浮舟將發僧辯命
杜龕鼓譟掩至大破之禽子仙丁和等送江陵元帝命生釘和舌嚮殺之郢州旣平僧辯進師尋陽軍人
多夢周何二廟神云吾已助天子討賊自稱征討大將軍並乘朱航俄而反曰已殺景同夢者數十百焉
元帝加僧辯侍中尙書令征東大將軍僧辯頻表勸進並蒙優答於是發江州直指建鄴乃先命南兗州
刺史侯瑱襲南陵鸛頭等戍並尅之先是陳武帝率衆五萬出自南江前軍五千行至益口陳武名蓋僧
辯僧辯憚之旣至益口與僧辯會于白茅洲爲盟於是升壇歃血共讀盟文辭氣慷慨皆淚下霑衿及發
鸛頭中江而風浪師人咸懼僧辯再拜告天曰僧辯忠臣奉辭伐罪社稷中興當使風息若鼎命中淪請
從此逝言訖風止自此遂泛安流有羣魚躍水飛空引導賊望官軍上有五色雲雙龍挾艦行甚迅疾景

自出戰於石頭城北僧辯等大破之盧暉略聞景戰敗以石頭城降僧辯引軍入據之景走朱方僧辯命衆將入據臺城其夜軍人失火燒太極殿及東西堂僧辯雖有滅賊之功而馭下無法軍人鹵掠驅逼居人都下百姓父子兄弟相哭自石頭至于東城被執縛者男女裸露袒衣不免緣淮號叫翻思景焉僧辯命侯瑱裴之橫東追景僞行臺趙伯超自吳松江降侯瑱瑱送至僧辯僧辯謂曰卿荷國重恩遂復同逆今日之事將欲如何因命送江陵伯超既出僧辯顧坐客曰朝廷昔唯知有趙伯超豈識王僧辯乎社稷既傾爲我所復人之興廢亦復何常賓客皆前稱歎功德僧辯懼然乃謬答曰此乃聖上威德羣帥用命老夫雖濫居戎首何力之有焉於是逆寇悉平元帝卽位授鎮衛將軍司徒加班劍二十人改封永寧郡公侍中尙書令如故先是天監中沙門釋寶誌爲讖云太歲龍將無理蕭經霜草應死餘人散十八子時言蕭氏當滅李氏代興及湘州賊陸納等攻破衡州刺史丁道貴而李洪雅又自零陵稱助討納既而朝廷未達其心詔徵僧辯就宜豐侯循南征爲都督東上諸軍事以陳武帝爲都督西下諸軍事先是陳武讓都督於僧辯僧辯不受故元帝分爲東西都督而俱南討焉尋而洪雅降納納以爲應符於是共議拜洪雅爲大將軍尊事爲主洪雅乘平肩大輿繖蓋鼓吹羽儀悉備翼從入長沙城時納等據車輪夾岸爲城士卒皆百戰之餘器甲精嚴徒黨勇銳蒙衝鬪艦亘水陵山時天日清明初無雲翳軍發之際忽然風

爾時人謂爲泣軍百姓竊言知其敗也三月庚寅有兩龍自城西江中騰躍升天五色分明遙映江水百姓咸仰面目之父老咸聚而悲竊相謂曰地龍已去國其亡乎初納造大艦一名曰三王艦者邵陵王河東王桂陽嗣王三人並爲元帝所害故立其像於艦祭以大牢加其節蓋羽儀鼓吹每戰輒祭之以求福又造二艦一曰青龍艦一曰白虎艦皆衣以牛皮並高十五丈選其中尤勇健者乘之僧辯憚之稍作連城以逼焉賊不敢交鋒並懷懈怠僧辯因其無備親執旗鼓以誠進止羣賊大敗歸保長沙僧辯乃命築壘圍之而自出臨視賊知不設備其黨吳藏李賢明等蒙楯直進僧辯尙據胡牀不爲之動指麾勇敢遂斬賢明賊乃退歸初陸納作逆以王琳爲辭云若放琳則自服時衆軍未之許而武陵王紀擁衆上流內外駭懼元帝乃遣琳和解之湘州乃平因被詔會衆軍西討尋而武陵敗績是時齊遣郭元建謀襲建邺又遣其大將東方老等繼之陳武帝聞之馳報江陵元年卽詔僧辯急下赴援僧辯次姑孰卽留鎮焉先命豫州刺史侯瑱築壘於東關以拒北軍徵吳郡太守張彪吳興太守裴之橫會瑱而大敗之僧辯振旗歸建邺承聖三年二月詔以僧辯爲太尉車騎大將軍頃之丁母憂母姓魏氏性甚安和善於綏接家門內外莫不懷之初僧辯下獄母流淚徒行將入謝罪元帝不與相見時貞惠世子有寵母詣閣自陳無訓涕泗嗚咽衆並矜之及僧辯罪免母深相責厲辭色俱嚴雖尅復舊都功蓋宇宙母恒自謙損不以富貴

驅物朝野稱之謂爲明哲婦人及亡甚見愍悼且以僧辯勳重故喪禮加焉命侍中謁者監護喪事諡曰貞敬太夫人靈柩將歸建康又遣謁者至舟渚弔祭其年十月魏遣兵及梁王督合衆將襲江陵元帝徵僧辯於建鄴爲大都督荊州刺史未至而荊州已滅及敬帝初卽梁王位僧辯預援立功承制進驃騎大將軍中書監都督中外諸軍事錄尙書與陳武帝參謀討伐時齊文宣又納貞陽侯明以爲梁嗣與僧辯書并貞陽亦頻與僧辯書論還國繼統之事僧辯不納及貞陽與齊上黨王高渙至東關散騎常侍裴之橫軍敗僧辯遂謀納貞陽仍書定君臣之禮因遣第七子顯顯所生劉并弟子珍往充質遣左戶尙書周弘正至歷陽迎明又遣吏部尙書王通送啟因求以敬帝爲皇太子明報書許之僧辯遣使送質于鄴貞陽求度衛士三千僧辯慮其爲變止受散卒千人而已并遣龍舟法駕往迎貞陽濟江之日僧辯擁楫中流不敢就岸末乃同會于江寧浦明踐位授僧辯大司馬領太子太傅揚州牧餘如故陳武帝時爲司空南徐州刺史因自京口舉兵襲之僧辯常處石頭城是日視事軍人已踰城北而入南門又白有兵來僧辯與子顥遽走出閤計無所出乃據南門樓拜請求哀陳武縱火焚之方共顥下就執陳武謂曰我有何辜公欲與齊師賜討又曰何意全無防備僧辯曰委公北門何謂無備是夜及子顥俱被絞殺初僧辯平建鄴遣陳武守京口推以赤心結廉藹之分且爲第三子顥許娶陳武章后所生女未昏而僧辯母亡雖

然情好甚密其長子顓屢諫不聽至是會江淮人報云齊兵大舉至壽春僧辯謂齊軍必出江表因遣記室參軍江旰以事報陳武仍使整舟艦器械陳武宿有圖僧辯志及聞命留旰城中銜枚而進知謀者唯侯安都周文育而已外人但謂江旰徵兵扞建安都舟艦將趣石頭陳武控馬未進安都大懼乃追陳武罵曰今日作賊事勢已成生死須決在後欲何所望若敗俱死後期得免斫頭邪陳武曰安都曠我乃敢進遂剋之時壽春竟無齊軍又非陳武之譎殆天授也顓承聖初位侍中魏剋江陵隨王琳入齊爲竟陵郡守齊遣王琳鎮壽春將圖江左及陳平淮南殺琳顓聞之乃出郡城南登高冢上號哭一慟而絕顓弟頌少有志節恆隨梁元帝及荊州覆滅入于魏僧辯旣亡弟僧智得就在約約敗走僧智肥不能行又遇害僧智弟僧愔位譙州刺史征蕭勃及聞兄死引軍還時吳州刺史羊亮隸在僧愔下與僧愔不平密召侯瑱見禽僧愔以名義責瑱瑱乃委罪於將羊鯤斬之僧愔復得奔齊與徐嗣徽等挾齊軍攻陳軍敗竄逸荒野莫知所之仰天嘆曰讐耻不雪未欲自膏野草若精誠有感冒得道路誓不受辱人手拔刀將自刎聞空中催令急去僧愔異之勉力馳進行一里許顧向處已有陳人踰越江山僅得歸齊徐嗣徽高平人父雪伯自青都南歸位終新蔡太守侯景之亂嗣徽歸荊州元帝以爲羅州刺史及弟嗣宗並有武用嗣徽從征巴巳以功爲太子右衛率監南荊州徐州之亡任秦州刺史嗣產先在建鄴嗣宗自荊州滅亡

中逃得至都從弟嗣先卽僧辯之甥復爲比丘慧暹藏得脫俱還及僧辯見害兄弟抽刀裂眦志在立功俱逃就兄嗣徽密結南豫州刺史任約與僧辯故舊圖陳武帝帝遣江旰說之嗣徽執旰送鄴乞師爲齊文宣帝授爲儀同命將應赴及石頭敗退復請兵於齊與任約王曇首同心度江及戰敗嗣徽墮馬嗣宗援兄見害嗣產爲陳武軍所禽辭色不撓而死任約王曇首得北歸

羊侃字祖忻泰山梁父人也父祉北史有傳侃少而瓌偉身長七尺八寸雅愛文史弱冠隨父在梁州立功初爲尙書郎以力聞魏帝常謂曰郎官謂卿爲虎豈羊質虎皮乎試作虎狀侃因伏以手抉殿沒指魏帝壯之賜以珠劍正光中秦州羌莫折念生據州反仍遣其弟天生攻陷岐州寇雍州侃爲偏將隸蕭寶寅往討之射殺天生其衆卽潰以功爲征東大將軍東道行臺領泰山太守進爵鉅平侯初其父祉恆使侃南歸侃至是將舉濟河以成先志其從兄兗州刺史敦密知之據州拒侃侃乃率精兵三萬襲之不尅仍築十餘城以守之梁朝賞授一與元法僧同魏帝聞之使授侃驃騎大將軍司徒泰山郡公長爲兗州刺史侃斬其使魏人大駭令僕射于暉率衆十萬及高歡尢朱陽都等相繼而至柵中矢盡南軍不進乃夜潰圍而出一日一夜乃出魏境至渣口衆尙萬餘人馬二千匹將入南士卒竟夜悲歌侃乃謝曰卿等懷土寧適去留各拜辭而去侃以大通三年至建鄴授徐州刺史併其兄默及三弟忱給元皆拜刺史侃

封高昌縣侯累遷太子左衛率侍中車駕幸樂游苑侃預宴時少府奏新造兩刃稍成長一丈四尺圍一尺三寸帝因賜侃河南國紫駟令試之侃執稍上馬左右擊刺特盡其妙觀者登樹帝曰此樹必爲侍中折矣俄而果折因號此稍爲折樹稍北人降者唯侃是衣冠餘緒帝寵之踰於他者謂曰朕少時捉稍形勢似卿今失其舊體殊覺不奇上又製武宴詩三十韻示侃侃卽席上應詔帝覽曰吾聞仁者有勇今見勇者有仁可謂鄒魯遺風英賢不絕是日詔入直殿省啟尙方仗不堪用上大怒坐者非一及侯景作逆果弊於仗麤後遷都官尙書尙書令何敬容用事與之並省未嘗游造左衛蘭欽同侍宮宴詞色少交侃於坐折之曰小子汝以銅鼓賈朱异作父韋粲作兄何敢無宜適朱時在席後華林法會欽拜謝於省中王銓謂欽曰卿能屈膝廉公彌見盡美然羊公意猶未釋容能更置一拜欽從之宦者張僧胤嘗候侃侃曰我牀非闍人所坐竟不前之時論美其真正太清元年爲侍中會大舉北侵以侃爲冠軍將軍監作寒山堰事堰立侃勸元帥貞陽侯明乘水攻彭城不見納旣而魏援大至侃頻言乘其遠來可擊旦日又勸出戰並不從侃乃率所領頓堰上及衆軍敗侃結陣徐還二年復爲都官尙書侯景反攻陷歷陽帝問侃討景之策侃求以二千人急據采石令邵陵王襲取壽春使景進不得前退失巢窟烏合之衆自然瓦解議者謂景未敢便逼都遂寢其策令王質往侃曰今茲敗矣乃令侃率千餘騎頓望國門景至新林迫侃

入副宣城王都督城內諸軍事時景旣卒至百姓競入公私混亂無復次序侃乃區分防擬皆以宗室間之軍人爭入武庫自取器甲所司不能禁侃命斬數人方得止是時梁興四十七年境內無事公卿在位及閭里士大夫莫見兵甲賊至卒迫公私駭震時宿將已盡後進少年並出在外城中唯有侃及柳津韋黯津年老且疾黯懦而無謀軍旅指搗一決於侃膽力俱壯簡文深仗之及賊逼城衆皆兇懼侃僞稱得外射書云邵陵西昌侯已至近路衆皆少安賊攻東掖門縱火甚盛侃以水沃滅火射殺數人賊乃退加侍中軍師將軍有詔送金五千兩銀萬兩絹萬匹賜戰士侃辭不受部曲千餘人並私加賞賚賊爲尖項木驢攻城矢石所不能制侃作雉尾炬施鐵鏃以油灌之擲驢上焚之俄盡賊又東西起二土山以臨城中震駭侃命爲地道潛引其土山不能立賊又作登城樓高十餘丈欲臨射城中侃曰車高壑虛彼來必倒可臥而觀之及車動果倒衆皆服焉賊旣頻攻不捷乃築長圍朱异張綰議出擊之帝以問侃侃曰不可賊多日攻城旣不能下故立長圍欲引城中降者耳今擊之出人若少不足破賊若多則一旦失利門隘橋小必大致挫衄不從遂使千餘人出戰未及交鋒望風退走果以爭橋赴水死者大半初侃長子鷲爲景所獲執來城下示侃侃謂曰我傾宗報主猶恨不足豈復計此一子幸早殺之數日復持來侃謂鷲曰久以汝爲死猶在邪吾以身許國豈得乎陣歿不以爾而生進退因引弓射之賊以其忠義亦弗之

嘗景遺儀同傅士哲呼侃與語曰侯王遠來問訊天子何爲閉拒不時進納尙書國家大臣宜敢朝廷侃曰侯將軍奔亡之後歸命國家重鎮方城懸相任寄何所患苦忽致稱兵豈有人臣而至於此吾不能妄受浮說開門揖盜士哲曰在北之日久搥風猷願去戎服得一相見侃爲免胄士哲瞻望久之而去其爲北人所欽慕如此後大雨城內土山崩賊乘之垂入苦戰不能禁侃乃令多擲火爲火城以斷其路徐於城內築城賊不能進尋以疾卒於城內贈侍中護軍將軍子球嗣侃少雄勇旅力絕人所用弓至二十石馬上用六石弓嘗於兗州堯廟蹋壁直上至五尋橫行得七跡泗橋有數石人長八尺大十圍侃執以相擊悉皆破碎性豪侈善音律自造采蓮棹歌兩曲甚有新致姬妾列侍窮極奢靡有彈箏人陸大喜著鹿角爪長七寸儻人張淨腕腰圍一尺六寸時人咸推能掌上儻又有孫荆玉能反腰帖地銜得席上玉簪敬賚歌人王娥兒東宮亦賚歌者屈偶之並妙盡奇曲一時無對初赴衡州於兩艘將起三間通梁水齋飾以珠玉加之錦纈盛設帷屏列女樂乘潮解纜臨波置酒緣塘傍水觀者填咽大同中魏使陽斐與侃在北嘗同學有詔命侃延斐同宴賓客三百餘人食器皆金玉雜寶奏三部女樂至夕侍婢百餘人俱執金花燭侃不飲酒而好賓游終日獻酬同其醉醒性寬厚有器局嘗南還至漣口置酒有客張孺才者醉於船中失火延燒七十餘艘所燔金帛不可勝數侃聞聊不挂意命酒不輟孺才慙懼自逃侃慰喻使還

待之如舊第三子鵬字子鵬隨侃臺內城陷竄於陽平侯景以其妹爲小妻呼還待之甚厚以爲庫真都督及景敗鷓密圖之乃隨其東走景於松江戰敗惟餘三剗下海欲向蒙山會景晝寢鷓語海師此中何處有蒙山汝但聽我處分遂直向京口至胡豆洲景覺大驚問岸上云郭元建猶在廣陵景大喜將依之鷓拔刀叱海師使向京口鷓與王元禮謝答仁弟葳蕤並景之昵也三人謂景曰我等爲王百戰百勝自謂無敵卒至於此豈非天乎今就王乞頭以取富貴景欲透水鷓抽刀斫之景乃走入船中以小刀挾船鷓以稍入刺殺之景僕射索超世在別船葳蕤以景命召之斬于京口元帝以鷓爲青州刺史封昌國縣侯又領東陽太守征陸納加散騎常侍除西晉州刺史破郭元建於東關遷東晉州刺史承聖三年西魏圍江陵鷓赴援不及從王僧愔征蕭勃於嶺表聞僧辯敗乃還爲侯瑱所破遇害年一十八

羊鴉仁字孝穆太山鉅平人也少驍勇仕郡爲主簿普通中率兄弟自魏歸梁封廣晉侯征伐青齊間累有功績位至都督北司州刺史及侯景降詔鴉仁督土州刺史桓和之仁州刺史湛海珍等趨縣瓠應接景至仍爲都督司豫二州刺史鎮縣瓠會侯景敗於渦陽魏軍漸逼鴉仁恐糧運不繼遂還北司上表陳謝帝大怒鴉仁鴉仁懼頓軍入淮上及侯景反鴉仁率所部入援太清二年景旣背盟鴉仁乃與趙伯超及南康王會理共攻賊於東府城反爲賊敗臺城陷景以爲五兵尙書鴉仁常思奮發謂所親曰吾以凡

流受寵朝廷竟無報效以答重恩今若以此終沒有餘責因泣下見者傷焉三年出奔江西將赴江陵至東莞爲故北徐州刺史荀伯道子暑所害臨死以報效不終因而泣下後鴉仁兄子海珍知之掘暑父伯井祖及所生母合五喪各分其半骨共棺焚之半骨雜他骨作五袋盛之銘袋上曰荀暑祖父母某之骨鴉仁子亮侯景亂後移至吳州刺史隨王琳以名將子見禮甚隆爲人多酒無賴酒醉爲閹豎所殺論曰王神念羊侃羊鴉仁等自北徂南咸受寵任旣而侃及鴉仁晚遇屯剗侃則臨危不撓鴉仁則守義以殞古人所謂心同鐵石此之謂乎僧辯風格秀舉有文武奇才而逢茲酷濫幾致隕覆幸金首領卒樹奇功事人之道於斯爲得及時鍾交喪地居元宰內有奧主而外求君遂使尊卑易位親疎貿序旣同兒戲且類奕基延敵開讐實基於此喪國傾宗爲天下笑豈天將啟陳何斯人而斯謬也哀哉

南史卷六十三考證

王僧辯傳既至益口與僧辯會於白茅洲爲盟○陳書益作溢洲作灣
自石頭至于東城○監本缺于字今从閣本增入

南史卷六十三考證

唐

李

延

壽

撰

列傳第五十四

江子一

胡僧祐

徐文盛

陰子春

子鏗

杜崩

兄弟岸

弟幼安

王琳

張彪

江子一字元亮濟陽考城人晉散騎常侍統之七世孫也父法成奉朝請子一少慷慨有大志家貧以孝聞苦侍養多闕因終身蔬食仕梁起家為王國侍郎奉朝請上書言事為當軸所排乃拜表求入北為刺客武帝異之又啟求觀書祕閣武帝許之有敕直華林省其姑夫左衛將軍朱異權要當朝休下之日賓客輻湊異不為物議所歸欲引子一為助子一未嘗造門其高潔如此為遂昌曲阿令皆著美績後為南津校尉弟子四歷尚書金部郎大同初遷右丞兄弟性並剛烈子四自右丞上封事極言得失武帝甚善之詔曰屋漏在上知之在下其令尚書詳擇施於時政左戶郎沈炯少府丞顧瑱嘗奏事不允帝厲色呵責之子四乃趨前代炯等對對甚激切帝怒呼縛之子四乃據地不受帝怒亦歇乃釋之猶坐免職及侯景攻陷歷陽自橫江將度子一帥舟師千餘人於下流欲邀之其副董桃生走子一乃退還南洲收餘眾步赴建鄴見於文德殿帝怒之具以事對且曰臣以身許國常恐不得其死今日之事何所復惜不死闕

前終死闕後耳及城被圍開承明門出戰子一及弟尚書左丞子四東宮直殿主帥子五並力戰直前賊坐甲不起子一引稍撞之賊縱突騎衆並縮子一刺其騎騎倒稍折賊解其肩時年六十二弟曰與兄俱出何面獨旋乃免胄赴敵子四稍洞胸死子五傷脰還至塹一慟而絕賊義子一之勇歸之面如生詔贈子一給事黃門侍郎子四中書侍郎子五散騎侍郎侯景平元帝又追贈子一侍中諡義子子四黃門侍郎諡毅子子五中書侍郎諡烈子子一續黃圖及班固九品并辭賦文章數十篇行於世

胡僧祐字願果南陽冠軍人也少勇決有武幹仕魏位銀青光祿大夫以大通三年避尔朱氏之難歸梁頻上封事武帝器之拜文德主帥歸使戍項城魏尅項城因入北中大通元年陳慶之送魏北海王元顥入洛陽僧祐又歸梁除南天水天門二郡太守有善政性好讀書愛緝綴然文辭鄙野多被譏謔而自謂實工矜伐彌甚晚事梁元帝侯景之亂西沮蠻反元帝令僧祐討之使盡誅其渠帥僧祐諫忤旨下獄大寶二年景圍王僧辯於巴陵元帝乃引僧祐於獄拜爲假節武猛將軍封新市縣侯令援僧辯將發泣下謂其子玘曰汝可開朱白二門吾不捷則死吉則由朱凶則由白也元帝聞而壯之前至赤沙亭會陸法和至乃與并軍大敗景將任約軍禽約送江陵侯景聞之遂遁後拜領軍將軍厚自封殖以所加鼓吹恆置齋中對之自娛人曰此是羽儀公名望隆重不宜若此答曰我性愛之恆須見耳或出游亦以自隨人

士笑之承聖二年爲車騎將軍開府儀同三司及魏軍至以僧祐爲都督城東諸軍事俄中流矢卒城遂潰

徐文盛字道茂彭城人也家本魏將父慶之梁天監初自北歸南未至道卒文盛仍統其衆稍立功績大同末爲靈州刺史州在僻遠羣蠻劫竊相尋前後刺史莫能制文盛推心撫慰夷人感之風俗遂改太清二年聞國難乃召募得數萬人來赴元帝以爲秦州刺史加都督授以東討之略東下至武昌遇侯景將任約遂與相持元帝又命護軍將軍尹悅平東將軍杜幼安巴州刺史王徇等會之並受文盛節度大敗約於貝磯約退保西陽文盛進據蘆洲又與相持景聞之率大衆西上援約至西陽諸將咸曰景水軍輕進又甚飢疲擊之必大捷文盛不許文盛妻石氏先在建鄴至是景載以還之文盛深德景遂私通信使都無戰心衆咸憤怨杜幼安宋遵等乃率所領獨進大破景獲其舟艦以歸會景密遣騎間道襲陷郢州軍中懼遂大潰文盛奔還荊州元帝仍以爲城北面大都督又聚斂贓汗甚多元帝大怒下令數其十罪除其官爵文盛私懷怨望帝聞之乃以下獄時任約被禽與文盛同禁文盛謂約曰何不早降令我至此約曰門外不見卿馬跡使我何處得降文盛無以答遂死獄中

陰子春字幼文武威姑臧人也晉義熙末曾祖襲隨宋武帝南遷至南平因家焉父智伯與梁武帝鄰居

少相嘗嘗入帝臥內見有異光成五色因握帝手曰公後必大貴非人臣也天下方亂安蒼生者其在君乎帝曰幸勿多言於是情好轉密帝每有求如外府焉及帝踐阼官至梁秦二州刺史子春仕歷位胸山戍主東莞太守時青州石鹿山臨海先有神廟刺史王神念以百姓祈禱糜費毀神影壞屋舍當坐棟上有一大蛇長丈餘役夫打撲不禽得入海水爾夜子春夢見人通名詣子春云有人見苦破壞宅舍既無所託欽君厚德欲憇此境子春心密記之經二日而知之甚驚以爲前所夢神因辦牲醑請召安置一處數日復夢一朱衣人相聞辭謝云得君厚惠當以一州相報子春心喜供事彌勤經月餘魏欲襲胸山間諜前知子春設伏摧破之詔授南青州刺史鎮胸山又遷都督梁秦二州刺史子春雖無他才行臨人以廉潔稱閩門混雜而身服垢汙脚數年一洗言每洗則失財敗事云在梁州以洗足致梁州敗太清二年徵爲左衛將軍遷待中屬侯景亂元帝令子春隨王僧辯攻平邵陵王又與左衛將軍徐文盛東討景至貝磯與景遇子春力戰恆冠諸軍會郢州陷沒軍遂退卒於江陵子鏗

鏗字子堅博涉史傳尤善五言詩被當時所重爲梁湘東王法曹行參軍初鏗嘗與賓友宴飲見行觴者因回酒炙以授之衆坐皆笑鏗曰吾儕終日酣酒而執爵者不知其味非人情也及侯景之亂鏗當爲賊禽或救之獲免鏗問之乃前所行觴者陳天嘉中爲始興王中錄事參軍文帝嘗宴羣臣賦詩徐陵言之

帝即日召鑑預宴使賦新成安樂宮鏗援筆便就帝甚歎賞之累遷晉陵太守員外散騎常侍頃之卒有文集三卷行於世

杜勣京兆杜陵人也其先自北歸南居於雍州之襄陽子孫因家焉父懷瑤少有志節梁天監中累有軍功後又立功南鄭位梁秦二州刺史大同初魏軍復圍南鄭懷瑤命第三子嶷帥二百人與魏前鋒戰於光道寺溪矢中其目失馬敵人交稍將至嶷斬其一騎而上馳以歸嶷旅力絕人便馬善射一日中戰七八合所佩霜明朱弓四石餘力斑絲纏稍長二丈五同心敢死士百七十人每出殺傷數百人敵人憚之號爲杜彪懷瑤卒於州謚曰桓侯嶷位西荊州刺史時讖言獨梁之下有瞎天子元帝以嶷其人也會嶷改葬父祖帝敕圖墓者惡爲之逾年而嶷卒勣嶷弟也幼有志氣居鄉里以膽勇稱後爲新興太守太清三年隨岳陽王來襲荊州元帝與勣兄岸舊密書邀之勣乃與岸弟幼安兄子龔等夜歸元帝以爲武州刺史封枝江縣侯令隨領軍王僧辯東討侯景至巴陵景遁加侍中進爵爲公仍隨僧辯追景至石頭景敗勣入據臺城景平加散騎常侍江州刺史是月齊將郭元建攻秦州刺史嚴超達於秦郡王僧辯令勣赴援陳武帝亦自歐陽來會元建衆却勣因縱兵大破之元建遁時元帝執王琳於江陵琳長史陸納等於長沙反元帝徵勣與王僧辯討之及納等戰于車輪大敗之後納等降勣又與王僧辯西討平武陵王

於硤石旋鎮遣疾卒諡曰武崩兄弟九人兄嵩岑嶷嶷岸及弟從幼安並知名

岸字公衡太清中與崩隨岳陽王督攻荊州同歸元帝帝以爲北梁州刺史封江陵縣侯岸請以五百騎襲襄陽去城三十里城中覺之督夜知其師掩襄陽以岸等襄陽豪帥於是夜遁歸襄陽岸等知督至遂奔其兄南陽太守獻於廣平督遣將尹正薛暉等攻拔之獲獻岸等并其母妻子女並斬於襄陽北門督母龔保林歎岸於衆岸曰老婢教汝兒殺汝叔乃枉殺忠良督命拔其舌嚙殺而烹之盡誅諸杜宗族親者幼弱下蠶室又發其墳墓燒其骸骨灰而揚之并以爲漆髓及建鄴平崩兄弟發安寧陵焚之以報漆髓之酷元帝亦不責也

幼安性至孝寬厚雄勇過人與兄崩同歸元帝帝以爲西荊州刺史封華容縣侯與王僧辯討河東王譽於長沙平之又令助徐文盛東討侯景至貝磯大破景將任約斬其儀同叱羅子通湘州刺史趙威方等仍進軍大舉漢口別攻拔武昌景度蘆洲上流以壓文盛幼安與衆軍大敗之會景密遣騎襲陷郢州執刺史方諸人情大駭文盛由漢口遁歸衆軍大敗幼安降景景以其多反覆殺之

肅岑之子也少驍勇善用兵與諸父歸元帝帝以爲郢州刺史封中廬縣侯與王僧辯討平河東王譽又隨僧辯下繼徐文盛軍至巴陵聞侯景陷郢州西上將至乃與僧辯等守巴陵景至圍之數旬不尅而遁

遷太府卿定州刺史及眾軍至姑孰景將侯子鑿逆戰龔與陳武帝王琳等擊之大敗子鑿遂至石頭景親會戰龔與眾軍大破之論功爲最授東揚州刺史又與王僧辯降陸納平武陵王及魏平江陵後齊納貞陽侯明以紹梁嗣以龔爲震州刺史吳興太守遷南豫州刺史封溧陽縣侯又加散騎常侍鎮南大將軍龔僧辯婿也始爲吳興太守以陳武帝旣非素貴及爲之本郡以法繩其宗門無所縱捨武帝銜之切齒及僧辯敗龔乃據吳興以拒之頗敗陳文帝軍龔好飲酒終日恒醉勇而無略部將杜泰私通於文帝說龔降文帝龔然之其妻王氏曰霸先讎隙如此何可求和因出私財賞募復大敗文帝軍後杜泰降文帝龔尙醉不覺文帝遣人負出項王寺前斬之王氏因截髮出家杜氏一門覆矣

王琳字子珩會稽山陰人也本兵家元帝居藩琳姊妹並入後庭見幸琳由此未弱冠得在左右少好武遂爲將帥太清二年帝遣琳獻米萬石未至都城陷乃中江沉米輕舸還荆稍遷岳陽內史以軍功封建監縣侯侯景遣將宋子仙據郢州琳攻剋之禽子仙又隨王僧辯破景後拜湘州刺史琳果勁絕人又能傾身下士所得賞物不以入家麾下萬人多是江淮羣盜平景之勳與杜龔俱爲第一恃寵縱暴於建鄴王僧辯禁之不可懼將爲亂敢請誅之琳亦疑禍令長史陸納率部曲前赴湘州身徑上江陵陳謝將行謂納等曰吾若不反子將安之咸曰請死相泣而別及至帝以下吏而使廷尉卿黃羅漢太舟卿張載宣

喻琳軍陸納等及軍人並哭對使者莫肯受命乃繫黃羅漢殺張載載性刻爲帝所信荊州疾之如讎故納等因人之欲抽其腸繫馬脚使繞而走腸盡氣絕又縛割被五刑而斬之元帝遣王僧辯討納納等敗走長沙是時湘州未平武陵王兵下又甚盛江陵公私恐懼人有異圖納敗申琳無罪請復本位求爲奴婢元帝乃鎖琳送時納出兵方戰會琳至僧辯升諸樓車以示之納等投戈俱拜舉軍皆哭曰乞王郎入城卽出及放琳入納等乃降湘州平仍復琳本位使拒武陵王紀紀平授衡州刺史元帝性多忌以琳所部甚盛又得衆心故出之嶺外又授都督廣州刺史其友人主書李膺帝所任遇琳告之曰琳蒙拔擢常欲畢命以報國恩今天下未平遷琳嶺外如有萬一不虞安得琳力付官正疑琳耳琳分望有限可得與官爭爲帝乎何不以琳爲雍州刺史使鎮武寧琳自放兵作田爲國禦捍若警急動靜相知孰若遠棄嶺南相去萬里一日有變將欲如何琳非願長坐荆南政以國計如此耳膺然其言而不敢敗故遂率其衆鎮嶺南元帝爲魏圍逼乃徵琳赴援除湘州刺史琳師次長沙知魏平江陵已立梁王譽乃爲元帝舉哀三軍縞素遣別將侯平率舟師攻梁琳屯兵長沙傳檄諸方爲進趣之計時長沙蕃王蕭韶及上游諸將推琳主盟侯平雖不能度江頻破梁軍又以琳兵威不接翻更不受指麾琳遣將討之不尅又師老兵疲不能進乃遣使奉表詣齊并獻馴象又使獻款于魏求其妻子亦稱臣于梁陳武帝旣殺王僧辯推立敬

帝以待中司空徵琳不從命乃大營樓艦將圖義舉琳將張平宅乘一艦每將戰勝艦則有聲如野猪故琳戰艦以千數以野猪爲名陳武帝遣將侯安都周文育等討琳仍受梁禪安都歎曰我其敗乎師無名矣逆戰於沌口琳乘平輿執鉞而麾之禽安都文育其餘無所漏唯以周鐵武一人背恩斬之鎖安都文育置琳所坐艦中令一闔暨監守之琳乃移湘州軍府就郢城帶甲十萬練兵於白水浦琳巡軍而言曰可以爲勤王之師矣温太真何人哉南江渠帥熊曇朗周迪懷貳琳遣李孝欽樊猛與余孝頃同討之三將軍敗並爲迪所囚安都文育等盡逃還建鄴初魏剋江陵之時永嘉王莊年甫七歲逃匿人家後琳迎還湘中衛送東下及敬帝立出質于齊請納莊爲梁主齊文宣遣兵援送仍遣兼中書令李駟駮册拜琳爲梁丞相都督中外諸軍錄尙書事又遣中書舍人辛愨游詮之等齎璽書江表宣勞自琳以下皆有頒賜琳乃遣兄子叔寶率所部十州刺史子弟赴鄴奉莊纂梁祚於鄴州莊授琳侍中使持節大將軍中書監改封安成郡公其餘並依齊朝前命及陳文帝立琳乃輔莊次于濡須口齊遣揚州道行臺慕容儼率衆臨江爲其聲援陳遣安州刺史吳明徹江中夜上將襲盆城琳遣巴陵太守任忠大敗之明徹僅以身免琳兵因東下陳遣太尉侯瑱司空侯安都等拒之瑱等以琳軍方盛引軍入蕪湖避之時西南風至急琳謂得天道將直取揚州侯瑱等徐出蕪湖躡其後比及兵交西南風翻爲瑱用琳兵放火燧以擲瑱船

者皆反燒其船琳船艦潰亂兵士投水死者十二三其餘皆棄船上岸爲陳軍所殺殆盡初琳命左長史袁徽御史中丞劉仲威同典兵侍衛莊及軍敗泌遂降陳仲威以莊投歷陽又送壽陽琳尋與莊同入齊齊孝昭帝遣琳出合肥鳩集義故更圖進取琳乃繕艦分遣招募淮南僉楚皆願戮力陳合州刺史裴景暉琳兄珉之婿也請以私屬導引齊師孝昭委琳與行臺左丞盧潛率兵應赴沉吟不決景暉懼事泄挺身歸齊齊孝昭賜琳璽書令鎮壽陽其部下將帥悉聽以從乃除琳驃騎大將軍開府儀同三司揚州刺史封會稽郡公又增兵秩兼給鑊吹琳水陸戒嚴將觀釁而動屬陳氏結好於齊使琳更聽後圖琳在壽陽與行臺尙書盧潛不協更相是非被召還鄴齊武成置而不問除滄州刺史後以琳爲特進侍中所居屋脊無故剝破出赤蛆數升汁落地化爲血蠕動有龍出於門外之地雲霧起晝晦會陳將吳明徹寇齊齊帝敕領軍將軍尉破胡等出援秦州令琳共爲經略琳謂所親曰今太歲在東南歲星居牛斗分太白已高皆利爲客我將有喪又謂破胡曰吳兵甚銳宜長策制之慎勿輕鬪破胡不從戰軍大敗琳單馬突圍僅而獲免還至彭城齊令便赴壽陽并許召募又進封琳巴陵郡王陳將吳明徹進兵圍之堰肥水灌城而齊將皮景和等屯於淮西竟不赴救明徹晝夜攻擊城內水氣轉使人皆患腫死病相枕從七月至十月城陷被執百姓泣而從之吳明徹恐其爲變殺之城東北二十里時年四十八哭者聲如雷有一叟

以酒脯來至號盃盡哀收其血懷之而去傳首建康懸之於市琳故吏梁驃騎府倉曹參軍朱瑒致書陳
尚書僕射徐陵求琳首曰竊以朝市遷貿時傳骨鯁之風歷運推移間表忠貞之迹故典午將滅徐廣爲
晉家遺老當塗已謝馬孚稱魏室忠臣用能播美於前書垂名於後世梁故建寧公琳洛濱餘胄沂川舊
族立功代邸効績中朝當離亂之辰總藩伯之任爾乃輕躬殉主以身許國寔追蹤於往彥信躡武於前
脩而天厭梁德尙思匡繼徒蘊包胥之念終遵萇弘之胥洎王業光啟鼎祚有歸於是遠跡山東寄命河
北雖輕旅臣之歎猶懷客卿之禮感茲知己忘此捐軀至使身沒九泉頭行萬里誠復馬革裹屍遂其生
平之志原野暴骸會彼人臣之節然身首異處有足悲者封樹靡卜良可愴焉瑒早造未儻預參下席降
薛君之吐握荷魏公之知遇是用霑巾雨袂痛可識之顏回腸疾首切猶生之面伏惟聖恩博厚明詔爰
蠶赦王經之哭許田橫之葬瑒雖芻賤竊亦有心琳經蒞壽陽頗存遺愛曾游江右非無舊德比肩東閣
之吏繼踵西園之賓願歸彼境還修窀穸孤墳旣築或飛銜土之薦豐碑式樹時留墮淚之人近故舊
王綰等已有論牒仰蒙制議不遂所陳昔廉公告逝卽肥川而建營域叔孫云亡仍芍陂而植楸櫨由此
書之抑有其例不使壽春城下唯傳報葛之人滄洲島上獨有悲田之客昧死陳祈伏待刑憲陵嘉其志
節又明徹亦數夢琳求首並爲啟陳主而許之仍與開府主簿劉韶慧等持其首還于淮南權處八公山

側議故會葬者數千人場等乃間道北歸別議迎接尋有揚州人茅智勝等五人密送喪柩達于鄴贈十五州諸軍事揚州刺史侍中特進開府錄尚書事諡曰忠武王葬給輜輶車琳體貌閑雅立髮委地喜怒不形於色雖無學業而強記內敏軍府佐史千數皆識其姓名刑罰不濫輕財愛士得將卒之心少爲將帥屢經喪亂雅有忠義之節雖本圖不遂齊人亦以此重之待遇甚厚及敗爲陳軍所執吳明徹欲全之而其下將領多琳故吏爭來致請并相資給明徹由此忌之故及於難當時田夫野老知與不知莫不爲之歔歔流泣觀其誠信感物雖李將軍之恂恂善誘殆無以加焉琳十七子長子敬在齊襲王爵武平末通直常侍第九子衍隋開皇中開府儀同三司大業初卒於渝州刺史

張彪不知何許人自云家本襄陽或云左衛將軍衡州刺史蘭欽外弟也少亡命在若邪山爲盜頗有部曲臨城公大連出牧東揚州彪率所領客焉始爲防閤後爲中兵參軍禮遇甚厚及侯景將宋子仙攻下東揚州復爲子仙所知後去子仙還入若邪義舉征子仙不捷仍走向剡趙伯超兄子稜爲侯景山陰令去職從彪後懷異心僞就彪計請酒爲盟引刀子披心出血自敵彪信之亦取刀刺血報之刀始至心稜便以手案之望入彪心刀斜傷得不深稜重取刀刺彪頭面被傷頓絕稜謂已死因出外告彪諸將言已殺訖欲與求富貴彪左右韓武入視彪已蘇細聲謂曰我尙活可與手於是武遂誅稜彪不死復奉表元

帝帝甚嘉之及侯景平王僧辯遇之甚厚引爲爪牙與杜龕相似世謂之張杜貞陽侯踐位爲東揚州刺史并給鼓吹室富於財晝夜樂聲不息刻令王懷之不從彪自征之留長史謝岐居守會僧辯見害彪不自展拔時陳文帝已據震澤將及會稽彪乃遣沈泰吳寶真還州助岐保城彪後至泰等反與岐迎陳文帝入城彪因其未定踰城而入陳文帝遂走出彪復城守沈泰說陳文帝曰彪部曲家口並在香巖寺可往收取遂往盡獲之彪將申進密與泰相知因又叛彪彪復敗走不敢還城據城之西山樓子及暗得與弟崑崙妻楊氏去猶左右數人追隨彪疑之皆發遣唯常所養一犬名黃蒼在彪前後未曾捨離乃還入若邪山中沈泰說陳文帝遣章昭達領千兵重購之并圖其妻彪眠未覺黃蒼驚吠劫來便嚙一人中喉卽死彪拔刀逐之映火識之曰何忍舉惡卿須我者但可取頭誓不生見陳儻劫曰官不肯去請就平地彪知不免謂妻楊呼爲鄉里曰我不忍令鄉里落佗處今當先殺鄉里然後就死楊引頸受刀曾不辭憚彪不下刀便相隨下嶺到平處謂劫曰卿須我頭我身不去也呼妻與訣曰生死從此而別若見沈泰申進等爲語曰功名未立猶望鬼道相逢劫不能生得遂殺彪并弟致二首於昭達黃蒼號叫彪屍側宛轉血中若有哀狀昭達進軍迎彪妻便拜稱陳文帝教迎爲家主楊便改啼爲笑欣然意悅請昭達殯彪喪墳冢旣畢黃蒼又俯伏冢間號叫不肯離楊還經彪宅謂昭達曰婦人本在容貌辛苦日久請暫過宅莊

節昭達許之楊入屋便以刀割髮毀面哀哭慟絕誓不更行陳文帝聞之歎息不已遂許爲尼後陳武帝
軍人求取之楊投井決命時寒比出之垂死積火温煖乃蘇復起投於火彪始起於若邪興於若邪終於
若邪及妻犬皆爲時所重異楊氏天水人散騎常侍暉之女也有容貌先爲河東裴仁林妻因亂爲彪所
納彪友人吳中陸山才嗟泰等翻背刊吳昌門爲詩一絕曰田橫感義士韓王報主臣若爲留意氣持寄
禹川人

論曰忠義之道安有常哉善言者不必能行蹈之者恆在所忽江子一胡僧祐太清之季名宦蓋微江則
自致亡軀胡亦期之殞命然則貞勁之節歲寒自有性也文盛克終有鮮詩人得所誠焉子春戰乃先鳴
幽通有助及乎梁州之敗而以濯足爲尤杜氏終致覆亡亦云圖墓之咎吉凶之兆二者豈易知乎王琳
亂朝忠節志雪仇耻然天方相陳義難弘濟斯則大厦落構豈一木所能支也張彪一遇何懷死而後已
唯妻及犬義悉感人記傳所陳何以加此異乎

南史卷六十四考證

江子一傳字元亮○亮梁書作貞

帝怒亦歇○歇一本作止

胡僧祐傳以大通三年避余朱氏之難歸梁○梁書作以大通二年歸國

徐文盛傳文盛深德景遂私通信使都無戰心○私閣本作密

門外不見卿馬跡使我何處得降○處梁書作遠

杜蒯傳太清三年○三梁書作二

王琳傳有龍出於門外之地○地一本作池

張彪傳彪後至泰等反與岐迎陳文帝入城○迎監本誤後今改从陳書

南史卷六十四考證

唐

李

延

壽

撰

列傳第五十五

陳宗室諸王

永修侯擬

遂興侯詳

宜黃侯慧紀

衡陽獻王昌

子伯信

南康愍王曇朗

子方壽方慶

文帝諸子

宣帝諸子

後主諸子

永修侯擬字公正陳武帝之疎屬也少孤貧質直強記武帝南征交趾擬從焉梁紹泰二年除員外散騎常侍明威將軍以雍州刺史資監南徐州事武帝踐阼廣封宗室詔從子監南徐州擬封永修縣侯北徐州刺史瓌封鍾陵縣侯晃封建城縣侯晃封上饒縣侯從孫明威將軍鈔封虔化縣侯吉陽縣侯諱仍前封信威將軍肅封豫寧縣侯青州刺史詳封遂興縣侯貞威將軍慧紀封宜黃縣侯敬雅封寧都縣侯敬泰封平固縣侯文帝嗣位擬除丹陽尹坐事以白衣知郡尋復本職卒諡曰定天嘉二年配享武帝廟庭

子黨嗣

遂興侯詳字文幾少出家為沙門善書記談論清雅武帝討侯景召令還俗配以兵馬從定建鄴永定二

年封遂興縣侯天嘉三年累遷吳州刺史五年討周迪戰敗死之以所統失律無贈諡子正理嗣

宜黃侯慧紀字元方武帝之從孫也涉獵書史負材任氣從武帝平侯景及帝踐阼封宜黃縣侯除黃門侍郎太建十年吳明徹北侵敗績以慧紀爲緣江都督兗州刺史至德二年爲都督荊州刺史及梁安平王蕭巖晉熙王蕭瓛等詣慧紀請降慧紀以兵迎之以應接功位開府儀同三司禎明三年隋師濟江慧紀率將士三萬人船艦千餘乘沿江而下欲趣臺城遣南康太守呂肅將兵據巫峽以五條鐵鎖橫江肅竭其私財以充軍用隋將楊素奮兵擊之四十餘戰爭馬鞍山及磨刀澗守險隋軍死者五千餘人陳人盡取其鼻以求功賞旣而隋軍屢捷獲陳之士三縱之肅乃遁保延洲別帥廖世寵領大舫詐降欲燒隋艦更決一死戰於是有五黃龍備衆色各長十餘丈驥首連接順流而東風浪大起雲霧晦冥陳人震駭不覺火自焚隋軍乘高艦張大弩以射之陳軍大敗風浪應時頓息肅收餘衆東走慧紀時至漢口爲隋秦王俊拒不得進聞肅敗盡燒公安之儲備引兵東下因推湘州刺史晉熙王叔文爲盟主水軍都督周羅暉與鄂州刺史荀法尚守江夏及建鄴平隋晉王廣遣一使以慧紀子正業來喻又使樊毅喻羅暉其上流城戍悉解甲於是慧紀及巴州刺史畢寶並慟哭俱降慧紀入隋依例授儀同三司卒子正平頗有

衡陽獻王昌字敬業武帝第六子也梁太清末武帝南征李贲命昌與宣后隨沈恪還吳興及武帝東討侯景昌與宣后文帝並爲景囚景平拜長城國世子吳興太守時年十六昌容貌偉麗神情秀朗雅性聰辯明習政事武帝遣陳郡謝哲濟陽蔡景歷輔昌臨郡又遣吳郡杜之偉授昌以經昌讀書一覽便誦明於義理剖析如流尋與宣帝俱往荊州魏尅荊州又與宣帝俱遷長安武帝卽位頻遣使請宣帝及昌周人許而未遣及武帝崩乃遣之時王琳作梗中流昌不得還居于安陸王琳平後天嘉元年二月昌發自安陸由魯山濟江而巴陵王蕭沈等率百僚上表請以昌爲湘州牧封衡陽郡王詔曰可三月甲戌入境詔令主書舍人緣道迎接丙子濟江於中流殞之使以溺告四月庚寅喪柩至都上親臨哭乃下詔贈假黃鉞都督中外諸軍事太宰揚州牧葬送之儀一依漢東平憲王齊豫章文獻王故事謚曰獻無子文帝以第七皇子伯信嗣伯信字孚之位西衡州刺史及隋師濟江與臨汝侯方慶並爲東衡州刺史王勇所害

南康愍王曇朗武帝母弟忠壯王休先之子也休先少倜儻有大志梁簡文之在東宮深被知遇爲文德主帥頃之卒敬帝卽位追贈南徐州刺史封武康縣公武帝受禪贈司徒封南康郡王謚曰忠壯曇朗少孤尤爲武帝所愛有膽力善綏御侯景平後起家著作郎武帝誅王僧辯留曇朗鎮京口知留府事紹泰

元年除中書侍郎監南徐州二年齊兵攻逼建鄴因請和求武帝子姪爲質時四方州郡並多未賓本根虛弱糧運不繼在朝文武咸願與齊和親武帝難之而重違衆議乃決遣曇朗恐曇朗憚行或當奔竄乃自率步騎京口迎之使質於齊齊背約遣蕭軌等隨徐嗣徽度江武帝大破之虜蕭軌東方老等誅之齊人亦害曇朗于晉陽時陳與齊絕弗之知武帝踐阼猶以曇朗襲封南康郡王奉忠壯王祀禮秩一同皇子天嘉二年齊人結好始知其亡文帝詔贈開府儀同三司南徐州刺史諡曰愨乃遣兼中郎令隨聘使江德藻迎曇朗喪柩三年春至都初曇朗未質於齊生子方泰方慶及將適齊以二妾自隨在北又生二子方華方曠亦同得還

方泰少癯曠與諸惡少年羣聚游逸無度文帝以南康王故特寬宥之天嘉二年以爲南康王世子及聞曇朗薨於是襲爵南康王太建四年爲都督廣州刺史爲政殘暴爲有司奏免六年授豫章內史在郡不修政事秩滿之際廢放部曲爲劫又縱火延燒邑居因行暴掠驅錄富人徵求財賄代至又淹留不還至都以爲宗正卿未拜爲御史中丞宗元驍所劾免官以王還第十一年起爲監遠將軍直殿省尋加散騎常侍其年八月宣帝幸大壯觀因大閱武命都督任忠領步騎十萬陣於玄武湖都督陳景領樓艦五百出於瓜步江上登玄武門親宴羣臣以觀之因幸樂游苑設綵竹會仍重幸大壯觀集衆軍振放而還時

方秦當從敗稱所生母疾不行因與亡命楊鍾期等二十人微行往人間淫瀆于岑妻爲州長流所錄又率人仗抗拒傷損禁司爲有司所奏上大怒下方秦獄方秦初承行淫不承拒格禁司上曰不承則上測方秦乃投列承引於是兼御史中丞徐君整奏請解方秦所居官下宗正削爵土上可其奏禎明初爲侍中陳亡與後主俱入長安隋大業中爲掖縣令

方慶少清警涉獵書傳及長有幹略天嘉中封臨汝縣侯至德二年累遷智武將軍武州刺史初廣州刺史馬靖久居嶺表大得人心士馬強盛朝廷疑之以方慶爲廣州刺史以兵襲靖靖誅進號宣毅將軍方慶性清謹甚得人和禎明三年隋師濟江都督東衡州刺史王勇徵兵於方慶欲與赴援臺城時隋行軍總管韋洸帥兵度嶺宣隋文帝敕云若嶺南平定留勇與豐州刺史鄭萬頃且依舊職方慶聞之恐勇賣已且欲觀變乃不從勇使高州刺史戴智烈斬方慶於廣州而收其兵鄭萬頃滎陽人梁司州刺史紹叔之始族子也父曼梁末入魏萬頃通達有材幹周武帝時爲司城大夫出爲温州刺史至德中與司馬消難奔陳拜散騎常侍昭武將軍豐州刺史在州甚有惠政吏人表請立碑詔許焉初萬頃在州甚被隋文帝知遇及隋文帝踐阼常思還北及王勇殺方慶萬頃乃率州兵拒勇降隋授上儀同尋卒

文帝十三男沈皇后生廢帝始興王伯茂嚴淑媛生鄱陽王伯山晉安王伯恭潘容華生新安王伯固劉

昭華生衡陽王伯信王充華生廬陵王伯仁張修容生江夏王伯義韓修華生武陵王伯禮江貴妃生永陽王伯智孔貴妃生桂陽王伯謀二男早卒無名伯信出繼衡陽王昌

始興王伯茂字鬱之文帝第二子也初武帝兄始興昭烈王道談仕梁爲東宮直閣將軍侯景之亂授臺中流矢卒紹泰二年贈南兗州刺史封義興郡公諡曰昭烈武帝受禪重贈太傅改封始興郡王道談生文帝及宣帝宣帝以梁承聖末遷於長安至是武帝遙以宣帝襲封始興嗣王以奉昭烈王祀武帝崩文帝入篡帝位時宣帝在周末還文帝以本宗乏饗徙封宣帝爲安成王封伯茂爲始興王以奉昭烈王祀賜天下爲父後者爵一級舊制諸王受封未加戎號者不置佐使於是尙書八坐奏加伯茂寧遠將軍置佐使除揚州刺史伯茂性聰敏好學謙恭下士又以太子母弟文帝深愛重之時軍人於丹徒盜發晉郗曇墓大獲晉右將軍王羲之書及諸名賢遺跡事覺其書並沒縣官藏于祕府文帝以伯茂好古多以賜之由是伯茂大工草隸書甚得右軍法遷東揚州刺史鎮東將軍開府儀同三司廢帝時伯茂在都劉師知等矯詔出宣帝伯茂勸成之師知等誅後宣帝恐伯茂扇動朝廷乃進號中衛將軍令入居禁中專與廢帝游處時四海之望咸歸宣帝伯茂深不平數肆惡言宣帝以其無能不以爲意及建安人蔣裕與韓子高等謀反伯茂並陰豫其事光大二年皇太后令黜廢帝爲臨海王其日又下令降伯茂爲溫麻侯時

大門之外有別館以爲諸王冠昏之所名爲昏第至是命伯茂出居之宣帝遺盜殞之於車中年十八
鄱陽王伯山字靜之文帝第三子也偉容儀舉止閑雅喜愠不形於色武帝時天下草創諸王受封儀注
多闕及伯山受封文帝欲重其事天嘉元年七月丙辰尙書八坐奏封鄱陽郡王乃遣度支尙書蕭睿持
節兼太宰告于太廟又遣五兵尙書王質持節兼太宰告于太社其年十月上臨軒策命策訖令王公以
下並宴於王第六年爲緣江都督平北將軍南徐州刺史宣帝輔政不欲令伯山處邊光大元年徙爲東
揚州刺史累遷征南將軍護軍將軍加開府儀同三司給鼓吹并扶伯山性寬厚美風儀又於諸王最長
後主深敬重之每朝庭有冠昏饗宴恆使爲主及遭所生憂居喪以孝聞後主嘗幸吏部尙書蔡徵宅因
往弔之伯山號慟殆絕因起爲鎮衛將軍乃謂羣臣曰鄱陽王至性可嘉又是西第之長豫章已兼司空
其亦須遷太尉未及發詔禎明三年薨尋屬陳亡遂無贈諡長子君範未襲爵而隋師至時宗室王侯在
都者百餘人後主恐其爲變乃並召入屯朝堂使豫章王叔英總督之又陰爲之備大軍敗績相率出降
因從後主入長安隋文帝並配隴右及河西諸州各給田業以處之大業二年隋煬帝以後主第六女嫺
爲貴人絕愛幸因召陳氏子弟盡還京師隨才敘用由是並爲守宰徧於天下君範位溫縣令

新安王伯固字牢之文帝第五子也生而龜胸目通睛揚白形狀眇小而俊辯善言論天嘉六年立爲新

安郡王太建七年累遷都督南徐州刺史伯固性嗜酒不好積聚所得祿奉用度無節酣醉以後多所乞丐於諸王中最爲貧寔宣帝每矜之特加賞賜性輕率好行鞭捶在州不知政事日出田獵或乘輿輿至於草間輒呼人從游動至旬日所捕麀鹿多使生致宣帝頗知之遣使責讓者數矣十年爲國子祭酒頗知玄理而墮業無所通至於適句問難往往有奇意爲政嚴苛國學有墮游不修習者重加榎楚生徒懼焉由是學業頗進十三年爲都督揚州刺史後主初在東宮與伯固甚親狎伯固又善譎諛宣帝每宴集多引之叔陵在江州心害其寵陰求瑕疵將中以法及叔陵入朝伯固懼罪諂求其意乃共誣毀朝賢歷誣文武雖耆年高位皆面折無所畏忌伯固性好射雉叔陵又好開發冢墓出游田野必與偕行於是情好大協遂謀不軌伯固侍禁中每有密語必報叔陵及叔陵奔東府遣使告之伯固單馬馳赴助叔陵指麾知事不捷便欲走會四門已閉不得出因趣白楊道臺馬容至爲亂兵所殺尸於昌館門時年二十八詔特許以庶人禮葬子及所生王氏並特宥爲庶人國除

晉安王伯恭字肅之文帝第六子天嘉六年封尋爲吳郡太守時年十餘歲便留心政事官曹緝理歷位尙書左僕射後爲中衛將軍右光祿大夫陳亡入長安大業初爲成州刺史太常少卿

廬陵王伯仁字壽之文帝第八子天嘉六年立爲侍中國子祭酒領太子左庶子陳亡卒于長安

江夏王伯義字堅之文帝第九子天嘉六年封位金紫光祿大夫陳亡入長安遷於瓜州道卒

武陵王伯禮字用之文帝第十子天嘉六年立太建初為吳興太守在郡恣行暴掠後為有司所劾十一

年被代徵還遂遷延不發為御史中丞徐君整所劾免陳亡入長安太業中為臨洮太守

承陽王伯智字策之文帝第十二子少敦厚有器局博涉經史太建中立累遷尚書左僕射後為特進陳

亡入長安大業中為國子司業

桂陽王伯諱字深之文帝第十三子太建中立位散騎常侍薨子酆大業中為番禾令

宣帝四十二男柳皇后生後主彭貴人生始興王叔陵曹淑華生豫章王叔英何淑儀生長沙王叔堅宜

都王叔明魏昭華生建安王叔卿錢貴妃生河東王叔獻劉昭儀生新蔡王叔齊袁昭容生晉熙王叔文

義陽王叔建新會王叔坦王姬生淮南王叔彪巴山王叔雄吳姬生始興王叔重徐姬生尋陽王叔儼瀟

乎姬生岳陽王叔慎王修華生武昌王叔虞章修容生湘東王叔平施姬生臨賀王叔敖沅陵王叔興曾

姬生陽山王叔宣楊姬生西陽王叔穆申婕妤生南安王叔儉南郡王叔澄岳山王叔韶太原王叔匡袁

姬生新興王叔純吳姬生巴東王叔謨劉姬生臨海王叔顯秦姬生新寧王叔隆新昌王叔榮其皇子叔

敷叔忠叔泓叔毅叔訓叔武叔處叔封八人並及封三子早卒無名

始興王叔陵字子嵩宣帝之第二子也梁承聖中生於江陵魏剋江陵宣帝遷關右叔陵留饒城宣帝之
暹以後主及叔陵爲質天嘉三年隨後主暹朝封康樂縣侯叔陵少機辯徇聲名強梁無所推屈太建元
年封始興王奉昭烈王祀位都督江州刺史時年十六政自己出僚佐莫預焉性嚴刻部下憚懼諸公子
姪及罷縣令長皆逼令事己豫章內史錢法成詣府進謁卽配其子季卿將領馬仗季卿慙恥不時至叔
陵大怒侵辱法成法成憤怨自縊而死州縣非其部內亦微攝案之朝貴及下吏有乖忤者輒誣奏其罪
陷以重辟四年遷都督湘州刺史諸州鎮聞其至皆震恐股慄叔陵日益橫征伐夷獠所得皆入己絲毫
不以賞賜徵求役使無有紀極夜常不臥執燭達曉呼召賓客說人間細事戲謔無所不爲性不飲酒唯
多置餽餼晝夜食嗽而已自旦至中方始寢寐曹局文案非呼不得輒白管罪者皆繫獄動數年不省視
瀟湘以南皆逼爲左右廬里殆無遺者其中脫有逃竄輒殺其妻子州縣無敢上言宣帝弗之知九年除
都督揚州刺史十年至都加扶給油幢車叔陵居東府事務多關涉省閤執事之司承意順旨卽諷上進
用之微致違忤必抵大罪重者至殊死道路藉藉皆言其有非常志叔陵修飾虛名每入朝常於車中馬
上執卷讀書高聲長誦陽陽自若歸坐齋中或自執斧斤爲沐猴百戲又好游冢墓間遇有塋表主名可
知者輒命左右發掘取其石誌古器并骸骨肘脛持爲翫弄藏之府庫人間少妻處女微有色貌者並卽

遍納十一年丁所生母彭氏愛去職頃之起爲本職晉世王公貴人多葬梅嶺及彭氏卒叔陵啟求梅嶺葬之乃發故太傅謝安舊墓棄去安柩以葬其母初喪日僞爲哀毀自稱刺血寫涅槃經未及十旬乃日進甘膳又私召左右妻女與之姦合所作尤不軌浸淫上聞宣帝責御史中丞王政以不舉奏免政官又黜其典籤親事仍加鞭撻宣帝素愛叔陵不繩以法但責讓而已服闋又爲侍中中軍大將軍及宣帝不豫後主諸王並入侍疾叔陵陰有異志命典藥吏礪切藥刀及倉卒之際又命左右取劍左右不悟乃取朝服所佩木劍以進叔陵怒及翌日小斂後主哀頓俯伏叔陵以剗藥刀斫後主中項太后馳來救焉叔陵又斫太后數下後主乳媪樂安君吳氏時在太后側自後掣肘後主因得起叔陵仍持後主衣後主自奮得免長沙王叔堅以手搯叔陵奪去其刀仍牽就柱以其褶袖縛之棄池水中將殺之間後主曰卽盡之爲待也時吳媪巴扶後主避賊叔堅求後主所在將受命叔陵多力因奮得脫突出雲龍門馳車還東府呼其甲士斷清溪橋道放東城囚以充戰士又遣人往新林追所部兵馬仍自被甲著白帽登城西門招募百姓散金銀以賞賜外召諸王將帥無有應者唯新安王伯固聞而赴之叔陵聚兵僅得千人欲據城保守時衆軍並緣江防守臺內空虛叔堅白太后使太子舍人司馬申急召右衛將軍蕭摩訶將兵至府西門叔陵事急遣記室韋諒送鼓吹與摩訶謂曰事捷以公爲台鼎摩訶給報曰須王心齊節將自來

方敢從命叔陵既遣戴洳譚騏二人詣摩訶摩訶執以送臺斬於閣道下持其首徇東城仍懸於朱雀門叔陵自知不濟遂入沉其妃張氏及寵妾七人于井中叔陵有部下兵先在新林於是率人馬數百自小船度欲趣新林以舟繼入北行至白楊路爲臺軍所邀伯固見兵至旋避入巷叔陵拔刀追之伯固復還叔陵部下多棄甲潰散摩訶馬容陳智深迎刺叔陵闔豎王飛禽斫之數十下馬容陳仲華就斬首送臺自寅至巳乃定尙書八坐奏請依宋世故事流尸江中汙瀦其室并毀其所生彭氏墳廟還謝氏之坐後主從所奏叔陵諸子卽日並賜死

豫章王叔英字子烈宣帝第三子也寬厚仁愛太建元年封後位司空隋大業中位涪陵太守卒

長沙王叔堅字子成宣帝第四子也母本吳中酒家婢相者言當生貴子宣帝微時因飲通焉生叔堅及貴召拜淑儀叔堅少而嚴整又頗使酒兄弟憚之好數術卜筮風角鎔金琢玉並究其妙初封豐城侯太建元年封累遷丹陽尹初叔堅與始興王叔陵並招聚賓客各爭權寵甚不平每朝會鹵簿不肯爲先後必分道而趨左右或爭道而鬪至有死者及宣帝不豫叔堅與叔陵等並從後主侍疾叔陵陰有異志叔堅疑之微伺其所爲及行逆賴叔堅以免以功進驃騎將軍開府儀同三司揚州刺史尋遷司空將軍刺史如故時後主患創不能視事政無大小悉決于叔堅權傾朝廷後主由是疎忌之孔範管斌施文慶等

並東宮舊臣日夕陰持其短至德元年乃詔令卽本號用三司之儀出爲江州刺史未發尋以爲司空實欲奪其權又陰令人造其厭魅刻木爲偶人衣以道士服施機關能拜跪晝夜於星月下醮之祝詛於上又令人上書告其事案驗令實後主召叔堅囚于西省將黜之令近侍宣敕數之叔堅自陳爲佞人所構死且慙見叔陵後主感其前功乃赦之免所居官以王還第後位中軍大將軍開府儀同三司荊州刺史秩滿還都陳亡入隋遷于瓜州叔堅素貴不知家人生產至是與妃沈氏酣酒不以耕種爲事大業中爲遂寧郡太守卒

建安王叔卿字子弼宣帝第五子也性質直有材器容貌甚偉太建四年立位中書監陳亡入隋大業中爲都官郎上黨通守

宣都王叔明字子昭宣帝第六子也儀容美麗舉止和柔狀似婦人太建五年立位侍中陳亡入隋大業中爲鴻臚少卿

河東王叔獻字子恭宣帝第九子也性恭謹聰敏好學太建五年立位南徐州刺史薨贈司空謚康簡子孝寬嗣隋大業中爲汝城令

新蔡王叔齊字子肅宣帝第十一子也風采明贍博涉經史善屬文太建七年立位侍中陳亡入隋大業

中爲尙書主客郎

晉熙王叔文字子才宣帝第十二子也性輕險好虛譽頗涉書史太建七年立位都督湘州刺史徵爲侍中未還而隋軍濟江隋秦王至漢口時叔文自湘州還朝至巴州乃率巴州刺史畢寶等請降致書於秦王王遣使往巴州迎勞叔文叔文與畢寶荊州刺史陳慧紀及文武將吏赴漢口秦王並厚待之及至京隋文帝坐于廣陽門觀叔文從後主至朝堂文帝使內史令李德林宣旨責其君臣不能相弼以致喪亡後主與其羣臣並愧懼拜伏莫能仰視叔文獨欣然有自得志後上表陳在巴州先送款望異常例文帝嫌其不忠而方懷柔江表遂授開府宜州刺史

淮南王叔彪字子華宣帝第十三子也少聰慧善屬文太建八年立位侍中入隋卒于長安

始興王叔重字子厚宣帝第十四子也性質朴無伎藝宣帝崩始興王叔陵爲逆誅其年立叔重爲始興王以奉昭烈王後位江州刺史隋大業中爲太府少卿

尋陽王叔儼字子思宣帝第十五子也性凝重舉止方正後主卽位立位侍中入隋卒

岳陽王叔慎字子敬宣帝第十六子也少聰敏十歲能屬文太建十四年立至德中爲丹陽尹時後主尤愛文章叔慎與衡陽王伯信新蔡王叔齊等日夕陪侍賦詩恆被嗟賞禎明元年出爲湘州刺史加都督

及隋師濟江清和公楊素兵下荊州遣將龐暉略地至湘州州內將士尅日請降叔慎置酒會文武酒酣歎曰君臣之義盡於此乎長史謝基伏而流涕湘州助防遂興侯正理在坐起曰主辱臣死諸君獨非陳國臣乎縱其無成猶見臣節青門之外有死不能今日後應者斬衆咸許諾乃刑牲結盟遣人詐奉降書於龐暉叔慎伏甲待之暉入伏兵發縛暉等以徇皆斬之叔慎招士衆數日中兵至五千人隋遣內陽公薛胄爲湘州刺史聞龐暉死乃益請兵隋又遣行軍總管劉仁恩救之未至薛胄禽叔慎秦王斬之漢口義陽王叔達字子聰宣帝第十七子也太建十四年立位丹陽尹入隋大業中爲內史舍人絳郡通守武德中位侍中封江國公歷禮部尚書卒

巴山王叔雄字子猛宣帝第十八子也太建十四年立入隋卒于長安

武昌王叔虞字子安宣帝第十九子也太建十四年立入隋大業中爲高苑令

湘東王叔平字子康宣帝第二十子也至德元年立入隋大業中爲胡蘇令

臨賀王叔敖字子仁宣帝第二十一子也至德元年立入隋大業中位儀同三司

陽山王叔宣字子通宣帝第二十二子也至德元年立入隋大業中爲涇城令

西陽王叔穆字子和宣帝第二十三子也至德元年立入隋卒于長安

南安王叔儉字子約宣帝第二十四子也至德元年立入隋卒于長安

南郡王叔澄字子泉宣帝第二十五子也至德元年立入隋大業中爲靈武令

沅陵王叔興字子推宣帝第二十六子也至德元年立入隋大業中爲給事郎

岳山王叔韶字子欽宣帝第二十七子也至德元年立位丹陽尹入隋卒于長安

新興王叔純字子洪宣帝第二十八子也至德元年立入隋大業中爲河北令

巴東王叔謨字子軌宣帝第二十九子也至德四年立入隋大業中爲汧陽令

臨海王叔顯字子亮宣帝第三十子也至德四年立入隋大業中爲鵠觚令

新會王叔坦字子開宣帝第三十一子也至德四年立入隋大業中爲涉縣令

新寧王叔隆字子遠宣帝第三十二子也至德四年立入隋卒于長安

新昌王叔榮字子徹宣帝第三十三子也禎明三年立入隋大業中爲內黃令

太原王叔匡字子佐宣帝三十四子也禎明二年立入隋大業中爲壽光令

後主二十二男張貴妃生太子深會稽王莊孫姬生吳興王曄高昭儀生南平王嶷呂淑媛生永嘉王彥

邵陵王兢龔貴嬪生南海王虔錢塘王恬張淑華生信義王祗徐淑儀生東陽王恮孔貴人生吳郡王藩

其皇子總觀明綱統沖洽緝緯威辯十一人並未及封

太子深字承源後主第四子也少聰慧有志操容止儼然左右近侍未嘗見其喜愠以母張貴妃故特爲後主所愛至德元年封始安王位揚州刺史禎明二年皇太子崩廢後主乃立深爲皇太子隋師濟江隋將韓擒虎自南掖門入百寮奔散深時年十餘歲閉閣而坐舍人孔伯魚侍隋軍排閣入深使宣令勞之曰軍旅在道不乃勞也軍人咸致敬焉隋大業中爲枹罕太守武德初爲祕書丞卒官

吳興王暕字承業後主長子也太建五年二月乙丑生於東宮母孫姬因產卒沈皇后哀而養之以爲己子後主年長未有嗣宣帝命以爲嫡孫詔爲父後者賜爵一級十年封永康公後主卽位爲皇太子暕性聰敏好學執經肄業終日不倦博通大義兼善屬文時張貴妃孔貴嬪並愛幸沈皇后無寵日夜構成后及太子之短孔範之徒又於外合成其事禎明二年廢爲吳興王加侍中衛將軍入隋卒于長安

南平王嶷字承岳後主第二子也方正有器局年數歲風采舉動有若成人至德元年立位揚州刺史遷都督郢州刺史入隋卒于長安

永嘉王彥字承懿後主第三子也至德元年立位都督江州刺史入隋大業中爲襄武令

南海王虔字承恪後主第五子也至德元年立位南徐州刺史入隋大業中爲涿令

信義王祗字承敬後主第六子也至德元年立位琅邪彭城二郡太守入隋大業中爲通議郎

邵陵王暉字承檢後主第七子也禎明元年立入隋大業中爲國子監丞

會稽王莊字承肅後主第八子也容貌褻陋性嚴酷數歲時左右有不如意輒剗刺其面或加燒熱性嗜酒愛博以母張貴妃寵後主甚愛之至德元年立位揚州刺史入隋大業中爲昌隆令

東陽王恠字承厚後主第九子也禎明二年立入隋大業中爲通議郎

吳郡王藩字承廣後主第十子也禎明二年封隋大業中爲任城令

錢唐王恬字承煥後主第十一子也禎明二年封入隋卒于長安

江左承西晉諸王開國並以戶數相差爲大小三品大國置上中下三將軍又置司馬一人次國置中下二將軍小國置將軍一人餘官亦準此爲差武帝受命自永定訖于禎明唯衡陽王昌特加禮命至五千戶自餘大國不過二千小國則千戶云

論曰有陳受命雖疆土日感然封建之典無革先王永修等並以疎屬列居蕃屏慧紀始終之迹其殆優乎衡陽南康地皆懿戚提攜以殞惟命也夫文宣二帝諸子不一邵陽岳陽風迹可紀古所謂維城盤石叔慎其近之乎

乾隆四年校刊

南史卷六十五列傳

十

南史卷六十五

遂興侯詳傳少出家爲沙門○沙陳書作桑

衡陽獻王昌傳並爲東衡州刺史王勇所害○監本脫王字今从陳書增入

南康愍王曇朗傳武帝母弟忠壯王休先之子也○先監本訛光今改从陳書

子方泰傳上登玄武門親宴羣臣以觀之○親監本訛觀今改正

上曰不承則上測○測陳書作刑

始興王伯茂傳舊制諸王受封未加戎號者不置佐使○使据陳書應作史今各本俱同仍之

新安王伯固傳目通睛揚白○睛陳書作精

因趣白楊道臺馬容至爲亂兵所殺尸於昌館門○陳書容作客應改从之又昌館門上有東字

晉安王伯恭傳年十餘歲便留心政事官曹緝理○官閣本作宮今从陳書以監本爲是

始興王叔陵傳命典藥吏礪切藥刀○刀監本訛乃今改从閣本

叔陵有部下兵生在新林○林監本作安殆因新安王伯固而訛也上文云放東城囚以充戰士又遣人

往新林追所部兵馬則爲林字之誤無疑矣

湘東王叔平傳大業中爲胡蘇令○胡應从陳書作湖

會稽王莊傳隋大業中爲昌隆令○昌隆陳書作會昌

吳郡王藩傳爲任城令○任陳書作涪

南史卷六十六

唐

李

延

壽

撰

列傳第五十六

杜僧明

周文育

子實安

侯瑱

侯安都

歐陽頎

子紇

黃法甌

淳于量

章昭達

吳明徹

裴子烈

杜僧明字弘照廣陵臨澤人也形貌眇小而有膽氣善騎射梁大同中盧安興為廣州刺史南江督護僧

明與兄天合及周文育並為安興所啟請與俱行頻征徼獠有功為新州助防天合亦有材幹預在征伐

安興死僧明復副其子子雄及交州豪士李賁反逐刺史蕭諮諮奔廣州臺遣子雄與高州刺史孫瓘討

賁時春草已生瘴癘方起子雄請待秋討之廣州刺史新渝侯蕭映不聽蕭諮又促之子雄等不得已遂

行至合浦死者十六七眾並憚役潰散禁之不可乃引其餘兵退還蕭諮啟子雄及瓘與賊交通逗遛不

進梁武帝敕於廣州賜死子雄弟子略子烈並豪俠家屬在南江天合謀於眾曰盧公累葉待遇我等亦

甚厚矣今見枉死而不能為報非丈夫也我弟僧明萬人之敵若圍州城召百姓誰敢不從城破斬二侯

然後待臺使至束手詣廷尉死猶勝生縱其不捷亦無恨矣眾咸忼慨曰是所願也唯足下命之乃與周

文育等率衆結盟奉子雄弟子略爲主以攻刺史蕭映子略頓城南天合頓城北僧明文育分據東西吏人並應之一日之中衆至數萬陳武帝時在高要聞事起率衆來討大破之殺天合禽僧明及文育等並釋之引爲主帥武帝征交趾及討元景仲僧明文育並有功侯景之亂俱隨武帝入援建鄴武帝於始興破蘭裕僧明爲前鋒斬裕又與蔡路養戰於南野僧明馬被傷武帝馳救之以所乘馬授僧明僧明上馬復進殺數十人因而乘之大敗路養高州刺史李遷任又據大阜入巖石以逼武帝武帝遣周文育爲前軍與僧明擊走之遷任與寧都人劉孝尙并力將襲南康陳武又令僧明與文育等拒之相持連戰百餘日卒禽遷任送于武帝及帝下南康留僧明頓西昌督安城廬陵二郡軍事梁元帝承制授新州刺史臨江縣子侯景遣于慶等寇南江武帝頓豫章命僧明爲前驅所向剋捷武帝表僧明爲長史仍隨東討軍至蔡洲僧明率麾下燒賊水門大艦及景平除南兗州刺史進爵爲侯仍領晉陵太守及荊州覆亡武帝使僧明率吳明徹等隨侯瑱西援於江州病卒贈散騎常侍諡曰威陳文帝卽位追贈開府儀同三司配享武帝廟庭子晉嗣

周文育字景德義興陽羨人也少孤貧本居新安壽昌縣姓項氏名猛奴年十一能反覆游水中數里跳高六尺與羣兒聚戲衆莫能及義興人周蒼爲壽昌浦口戍主見而奇之因召與語文育對曰母老家貧

兄弟姊並長大困於賦役蒼哀之乃隨文育至家就其母請文育養爲己子母遂與之及蒼秩滿與文育還都見太子詹事周捨請制名字捨因爲立名爲文育字景德命兄子弘讓教之書計弘讓善隸書寫蔡邕勸學及古詩以遺之文育不之省謂弘讓曰誰能學此取富貴但有大槩耳弘讓壯之教之騎射文育大悅司州刺史陳慶之與蒼同郡素相善啟蒼爲前軍主慶之使蒼將五百人往新蔡懸瓠慰勞白水蠻蠻謀執蒼以入魏事覺蒼與文育拒之時賊徒甚盛一日中戰數十合文育前鋒陷陣勇冠軍中蒼於陣戰死文育馳取其尸賊不敢逼及夕各引去文育身被九創創愈辭請還葬慶之壯其節厚加贈遺而遣之葬訖會盧安興爲南江督護啟文育同行累征有功除南海令安興死後文育與杜僧明攻廣州爲陳武帝所敗帝赦之後監州王勵以文育爲長流深被委任勵被代文育欲與勵俱下至大庾嶺詣卜者卜者曰君北下不過作令長南入則爲公侯文育曰足錢便可誰望公侯卜人又曰君須與當暴得銀至二千兩若不見信以此爲驗其夕宿逆旅有賈人求與文育博文育勝之得銀二千兩且辭勵問其故文育以告勵乃遣之武帝聞其還大喜分麾下配爲武帝之討侯景文育與杜僧明爲前軍寇蘭裕援歐陽顛皆有功武帝破蔡路養於南野文育爲路養所圍四面數重矢石雨下所乘馬死文育右手搏戰左手解鞍潰圍而出與杜僧明等相得并力復進遂大敗之武帝乃表文育爲府司馬李遷仕之據大鼻遣其

將軍杜平虜入瀘石魚梁作城武帝命文育擊之平虜棄城走文育據其城遷仕聞平虜敗留老弱於大
舉悉選精兵自將以攻文育文育與戰遷仕稍却相持未解會武帝遣杜僧明來援別破遷仕水軍遷仕
衆潰不敢過大阜直走新淦梁元帝授文育義州刺史遷仕又與劉孝尚謀拒義軍武帝遣文育與侯安
都杜僧明徐度杜稜築城於白口拒之文育頻出與戰遂禽遷仕武帝發自南康遣文育將兵五千開通
江路侯景將王伯醜據豫章文育擊走之遂據其城累功封東遷縣侯武帝軍至白茅灣命文育與杜僧
明常爲軍鋒及至姑熟與侯景將侯子鑿戰破之景平改封南移縣侯累遷散騎常侍武帝誅王僧辯令
文育督衆軍會文帝於吳興圍剋杜龕又濟江襲會稽太守張彪得其郡城及文帝爲彪所襲文育時頓
城北香巖寺文帝夜往趨之彪又來攻文育苦戰遂破平彪武帝以侯瑱擁據江州命文育討之仍除南
豫州刺史率兵襲益城未剋徐嗣徽引齊人度江據蕪湖詔徵文育還都嗣徽等乃列艦於青墩至于七
嶺以斷文育歸路及夕文育鼓譟而發嗣徽等不能制至旦反攻嗣徽嗣徽驍將鮑碎獨以小艦殿文育
乘單舫艇跳入碎艦斬碎仍率其艦而還賊衆大駭因留船蕪湖自丹陽步上時武帝拒嗣徽於白城適
與文育會將戰風急武帝曰矢不逆風文育曰事急矣當決之何用古法抽槊上馬而進衆軍隨之風亦
尋轉殺傷數百人嗣徽等移營莫府山文育徙頓對之頓戰有功最進爵壽昌縣公給鼓吹一部及廣州

刺史蕭勃舉兵踰嶺詔文育督衆軍討之時新吳洞主余孝頃舉兵應勃遣其弟孝勵守郡城自出豫章據于石頭勃使其子孜將兵與孝頃相會又遣其別將歐陽頎頓軍苦竹灘傅泰據壩口城以拒官軍官軍船少孝頃有舩艇三百艘艦百餘乘在上牢文育遣軍主焦僧度羊東潛軍襲之悉取而歸仍於豫章立柵時官軍食盡欲退還文育不許乃使人間行遣周迪書約爲兄弟并陳利害迪得書甚喜許饋以糧於是文育分遣老小乘故船舫沿流俱下燒豫章所立柵僞退孝頃望之大喜因不設備文育由閩道信宿達芋韶芋韶上流則歐陽頎蕭勃下流則傅泰余孝頃文育據其中間築城響士賊徒大駭歐陽頎乃退入泥溪作城自守文育遣嚴威將軍周鐵虎與長史陸山才襲頎禽之於是盛陳兵甲與頎乘舟而宴以巡傳秦城下因攻秦尅之蕭勃在南康聞之衆皆股慄其將譚世遠斬勃欲降爲人所害世遠軍主夏侯明徹持勃首以降蕭孜余孝頃猶據石頭武帝遣侯安都助文育攻之孜降文育孝頃退走新吳廣州平文育還頓豫章以功授開府儀同三司王琳擁據上流詔侯安都爲西道都督文育爲南道都督同會武昌與琳戰於沌口爲琳所執後得逃歸請罪詔不問復其官爵及周迪破余孝頃孝頃子公颺弟孝勵猶據舊柵擾動南土武帝復遣文育及周迪黃法蕤等討之豫章內史熊曇朗亦率衆來會文育遣吳明徹爲水軍配周迪運糧自率衆軍入象牙江築城於金口公颺僞降謀執文育事覺文育囚之送都以其

郜曲分隸衆軍乃捨舟爲步軍進據三陂王琳遣將曹慶救孝勦分遣主帥常衆愛與文育相拒自帥所領攻周迪吳明徹軍迪等敗文育退據金口熊曇朗因其失利謀害文育以應衆愛文育監軍孫白象頗知其事勸令先之文育曰不可我舊兵少客軍多若取曇朗人皆驚懼亡立至矣不如推心撫之初周迪之敗棄船走莫知所在及得迪書文育喜齋示曇朗曇朗害之於坐武帝聞之卽日舉哀贈侍中空諡曰忠愍初文育之據三陂有流星墜地其聲如雷地陷方一丈中有碎炭數斗又軍市中忽聞小兒啼一市並驚聽之在土下軍人掘焉得棺長三尺文育惡之俄而迪敗文育見殺天嘉二年有詔配享武帝廟庭子寶安嗣文育本族兄景曜因文育官至新安太守

寶安字安民年十餘歲便習騎射以貴公子驕蹇游逸好狗馬樂驅馳靡衣媮食文育之爲晉陵以征討不遑之郡令寶安監知郡事尤聚惡少年武帝患之及文育西征敗績繫於王琳寶安便折節讀書與士君子游綏御文育士卒甚有威惠文育歸復除吳興太守文育爲熊曇朗所害徵寶安還起爲猛烈將軍領其舊兵仍令南討文帝卽位深器重之寄以心膂精卒多配焉及平王琳頗有功周迪之破熊曇朗寶安南入窮其餘燼天嘉二年重拜吳興太守襲封壽昌縣公三年征留異爲侯安都前軍異平除給事黃門侍郎衛尉卿再遷左衛將軍領衛尉卿卒諡曰成子碧嗣位晉陵定遠二郡

侯瑱字伯玉巴西充國人也父弘遠累世爲西蜀酋豪蜀賊張文萼據白崖山有衆萬人梁益州刺史鄧陽王蕭範命弘遠討之弘遠戰死瑱固請復讎每戰先鋒遂斬文萼由是知名因事範範委以將節之任山谷夷獠不附者並遣瑱征之累功授輕車府中兵參軍晉康太守範爲雍州刺史瑱除馮翊太守範遷鎮合肥瑱又隨之侯景圍臺城範乃遣瑱輔其世子嗣入援都及城陷瑱嗣同退還合肥仍隨範徙鎮益城俄而範及嗣皆卒瑱領其衆依于豫章太守莊鐵鐵疑之瑱懼不自安詐引鐵謀事因刃之據豫章之地後降於侯景將于慶慶送瑱於景景以瑱與己同姓託爲宗族待之甚厚留其妻子及弟爲質遣瑱隨慶平蠡南諸郡及景敗巴陵景將宋子仙任約等並爲西軍所獲瑱乃誅景黨與以應義師景亦誅其弟及妻子梁元帝授瑱南兗州刺史鄆縣侯仍隨都督王僧辯討景恆爲前鋒旣復臺城景奔吳郡僧辯使瑱追景大敗之於吳松江以功除南豫州刺史鎮姑熟及齊遣郭元建出濡須僧辯遣瑱扞之大敗元建魏攻荊州王僧辯以瑱爲前軍赴援未至而魏剋荊州瑱頓九江因衛晉安王還都承制以瑱爲侍中江州刺史加都督改封康樂縣公及司徒陸法和據郢州引齊兵來寇乃使瑱西討未至而法和入齊齊遣慕容恃德鎮夏首瑱攻之恃德食盡請和瑩還鎮豫章僧辯使其弟僧愔與瑩共討蕭勃及陳武帝誅僧辯僧愔陰欲圖瑩而奪其軍瑩知之盡收僧愔徒黨僧愔奔齊是時瑩據中流甚強又以本事王僧辯雖

外示臣節未肯入朝初余孝頃爲豫章太守及瑱鎮豫章乃於新吳縣別立城柵與瑱相拒瑱留軍人妻
子於豫章令從弟齋知後事悉衆以攻孝頃自夏迄冬弗能尅齋與其部下侯方兒不協方兒下攻齋虜
瑱軍府妓妾金玉歸于武帝瑱旣失根本輕歸豫章豫章人拒之乃趨益城就其將焦僧度僧度勸瑱投
齊瑱以武帝有大量必能容己乃詣闕請罪武帝復其爵位永定二年進位司空文帝卽位進授太尉王
琳至柵口又以瑱爲都督侯安都等並隸焉天嘉元年二月王琳引合肥灑湖之衆舳舻相次而下瑱率
軍進獸檻洲明日合戰琳軍少却及夕東西風吹其舟艦並壞夜中有流星墜于賊營及旦風靜琳入浦
以鹿角繞岸不敢復出時西魏將史寧驍其上流瑱聞之知琳不能持久收軍却據湖浦以待其弊及史
寧至圍鄆州琳恐衆潰乃率船來下去蕪湖十里而泊明日齊人遣兵助琳瑱令軍中晨炊蓐食頓蕪湖
洲尾以待之將戰有微風至自東南衆軍施拍縱火定州刺史章昭達乘平虜大艦中江而進琳軍大敗
脫走以免者十二三琳因此入齊其年詔以瑱爲都督五州諸軍事鎮益城周將賀若敦獨孤盛等來攻
巴湘又以瑱爲西討都督大敗盛軍以功授湘州刺史改封零陵郡公二年薨贈大司馬諡曰壯肅配享
武帝廟庭子淨藏嗣尙文帝女富陽公主

侯安都字成師始興曲江人也爲郡著姓父掇少仕州郡以忠謹稱安都貴後官至光祿大夫始興內史

安都工隸書能鼓琴涉獵書傳爲五言詩頗達靡兼善騎射爲邑里雄豪侯景之亂招集兵甲至三千人陳武帝入援臺城安都引兵從武帝攻蔡路養破李遷仕剋平侯景並力戰有功封富川縣子隨武帝鎮京口除蘭陵太守武帝謀襲王僧辯唯與安都定計仍使安都率水軍自京口趣石頭武帝自從江乘羅落會之安都至石頭北棄舟登岸僧辯弗之覺石頭城北接岡阜不甚危峻安都被甲帶長刀軍人捧之投於女垣內衆隨而入進逼僧辯臥室武帝大軍亦至與僧辯戰于聽事前安都自內閣出腹背擊之遂禽僧辯以功授南徐州刺史武帝東討杜龕安都留臺居守徐嗣徽任約等引齊寇入據石頭游騎至于闕下安都閉門示弱令城中登陴看賊者斬及夕賊收軍還石頭安都夜令士卒密營禦敵之具將旦賊騎至安都與戰大敗之賊乃退還石頭不敢逼臺城及武帝至以安都爲水軍於中流斷賊糧運又襲秦郡破嗣徽柵收其家口得嗣徽所彈琵琶及所養鷹遣信餉之曰昨至弟住處得此今以相還嗣徽等見之大懼尋求和武帝聽其還北及嗣徽等濟江齊之餘軍猶據採石守備甚嚴又遣安都攻之多所俘獲明年春詔安都率兵鎮梁山以備齊徐嗣徽等復入至湖熟武帝追安都還拒之戰於耕壇南安都率十二騎突其陣破之禽齊儀同乞伏無芳又刺齊將東方老墮馬會賊騎至救老獲免賊北度蔣山安都又與齊將王敬寶戰於龍尾使從弟曉軍主張纂前犯其陣曉被創墜馬張纂死之安都馳往救曉斬其騎

士十二人取纂尸而還齊軍不敢逼武帝與齊軍戰於幕府山命安都自白下橫擊其後大敗之以功進爵爲侯又進號平南將軍改封西江縣公仍督水軍出豫章助豫州刺史周文育討蕭勃安都未至文育已斬勃并禽其將歐陽頎傅泰等唯余孝頃與勃子孜猶於豫章之石頭作兩城孝頃與孜各據其一又多設船艦夾水而陣安都至乃銜枚夜燒其艦文育率水軍安都領步騎登岸結陣孝頃俄斷後路安都乃令軍士豎柵引營漸進頻致剋獲孜乃降孝頃奔歸新吳請入子爲質許之以功加開府儀同三司仍率衆會武昌與周文育西討王琳將發王公以下餞於新林安都躍馬度橋人馬俱墜水中又坐觸內墜於槽并時以爲不祥至武昌琳將樊猛棄城走文育亦自豫章至時兩將俱行不相統攝因部下交爭稍不平軍至郢州琳將潘純於城中遙射官軍安都怒圍之未剋而王琳至舟口安都乃釋郢州悉衆往沌口以禦之遇風不得進琳據東岸官軍據西岸相持數日乃合戰安都等敗與周文育徐敬成並爲琳囚總以一長鑊繫之置于榻下令所親宦者王子晉掌視之琳下至盆城白水浦安都等甘言許賂子晉子晉乃僞以小船住榻而釣夜載安都文育敬成上岸入深草步投官軍還都自劾詔並赦之復其官爵尋爲丹陽尹出爲南豫州刺史令繼周文育攻余孝勵及王琳將曹慶常衆愛等安都自宮亭湖出松門躡衆愛後文育爲熊曇朗所害安都回取大艦遇琳將周旻周協南歸與戰破之禽旻協孝勵弟孝猷率部

下四千家欲就王琳遇見敗乃詣安都降安都又進軍於禽奇洲破曹慶常眾愛等焚其船艦眾愛奔廬山爲村人所殺餘眾悉平還軍至南皖而武帝崩安都隨文帝還朝乃與羣臣議翼奉文帝時帝謙讓弗敢當太后又以衡陽王故未肯下令羣臣不能決安都曰今四方未定何暇及遠臨川王有功天下須共立之今日之事後應者斬便按劍上殿白太后出璽叉手解文帝髮推就喪次文帝卽位遷司空仍授南徐州刺史給扶王琳下至柵口大軍出頓蕪湖時侯瑱爲大都督而指磨經略多出安都及王琳入齊安都進軍益城討琳餘黨所向皆下仍別奉中旨迎衡陽獻王昌初昌之將入致書於文帝辭甚不遜帝不擇召安都從容而言曰太子將至須別求一蕃吾其老焉安都對曰自古豈有被代天子愚臣不敢奉詔因自迎昌中流而殺之以功進爵清遠郡公自是威名甚重羣臣無出其右安都父捍爲始興內史卒於官文帝徵安都爲發喪尋起復本官贈其父散騎常侍金紫光祿大夫拜其母爲清遠國太夫人仍迎赴都母固求停鄉里上乃下詔改桂陽郡之汝城縣爲廬陽郡分衡州之始興安遠二郡合三郡爲東衡州以安都從弟曉爲刺史安都第三子祕年九歲上以爲始興內史並令在鄉侍養改封安都桂陽郡公王琳敗後周兵入據巴湘安都奉詔西捍及留異擁據東陽又奉詔東討異本謂臺軍自錢唐江上安都乃步由會稽之諸暨出永康異大恐奔桃枝嶺處巖谷間豎柵以拒守安都躬自接戰爲流矢所中血流至

蹀安都乘輿摩軍容止不變因其山隴爲堰屬夏潦水漲安都引船入堰樓船與異城等放拍碎其樓異
與第二子忠臣脫身奔晉安虜其妻子振旅而歸加侍中征北大將軍仍還本鎮吏人詣闕表請立碑頌
美安都功績詔許之自王琳平後安都勳庸轉大又自以功安社稷漸驕矜招聚文武士騎馭馳騁或命
以詩筆第其高下以差次賞賜之文士則褚玠馬樞陰鏗張正見徐伯陽劉柵祖孫登武士則蕭摩訶裴
子烈等並爲之賓齋內動至千人都官將帥多不遵法度檢問收攝則奔歸安都文帝性嚴察深銜之安
都日益驕慢表啟封訖有事未盡乃開封自書之云又啟某事及侍宴酒酣或箕踞傾倚嘗陪樂游觀飲
乃白帝曰何如作臨川王時帝不應安都再三言之帝曰此雖天命抑亦明公之力宴訖又啟便借供張
水飾將載妻妾於御堂歡會帝雖許其請甚不懌明日安都坐於御坐賓客居羣臣位稱觴上壽初重雲
殿災安都率將士帶甲入殿帝甚惡之自是陰爲之備又周迪之反朝望當使安都討之帝乃使吳明徹
討迪又頻遣臺使案問安都部下檢括亡叛安都內不自安天嘉三年冬遣其別駕周弘寶自託於舍人
蔡景歷并問省中事景歷錄其狀奏之稱安都謀反帝慮其不受召明年春乃除安都爲征南大將軍江
州刺史自京口還都部伍入於石頭帝引安都宴於嘉德殿又集其部下將帥會于尙書朝堂於坐收安
都囚于西省又收其將帥盡奪馬仗而釋之因出景歷表於朝乃下詔暴其罪明日於西省賜死尋有詔

宥其妻子家口葬以士禮初武帝嘗與諸將宴杜僧明周文育侯安都爲壽各稱功伐帝曰卿等悉良將也而並有所短杜公志大而識暗狎於下而驕於尊矜其功不收其拙周侯交不擇人而推心過差居危履險猜防不設侯郎傲誕而無厭輕佻而肆志並非全身之道卒皆如言太建三年宣帝追封安都陳集縣侯子亶爲嗣

歐陽頎字靖世長沙臨湘人也爲郡豪族少質直有思理以言行著於嶺表父喪哀毀甚至家產累積悉讓諸兄廬於麓山寺傍專精習業博通經史年三十其兄逼令從官梁左衛將軍蘭欽少與頎善故頎常隨欽征討欽南征夷獠禽陳文徹所獲不可勝計大獻銅鼓累代所無頎預其功還爲直閣將軍欽征交州復敗頎同行欽度嶺而卒頎除臨賀內史啟乞送欽喪還都然後之任時湘衡界五十餘洞不賓敕衡州刺史韋粲討之粲委頎爲都督悉皆平殄侯景構逆粲自解還都征景以頎監衡州臺城陷後嶺南互相吞併蘭欽弟前高州刺史裕攻始興內史蕭昭基奪其郡以兄欽與頎舊遣招之頎不從謂使曰高州昆季隆顯莫非國恩今應赴難援都豈可自爲跋扈及陳武帝入援都將至始興頎乃深自結託裕遣兵攻頎武帝援之裕敗武帝以王懷明爲衡州刺史遷頎爲始興內史武帝之討蔡路養李遷仕也頎助討平之梁元帝承制以始興郡爲東衡州以頎爲刺史封新豐縣伯侯景平元帝徧問朝宰使各舉所知羣

曰未對元帝曰吾已得一人矣歐陽頎甚公正本有匡濟才恐蕭廣州不肯致之乃授武州刺史尋授郢州欲令出嶺蕭勃留之不獲拜命尋授衡州刺史進封始興縣侯時蕭勃在廣州兵強位重元帝深患之遣王琳代爲刺史琳已至小桂嶺勃遣其將孫瑒監州盡率部下至始興避琳兵鋒頎別據一城不往謁勃閉門高壘亦不相戰勃怒遣兵襲頎盡收其貲財馬仗尋赦之還復其所復與結盟魏平荊州頎委質於勃及勃度嶺出南康以頎爲前軍都督周文育破禽之送于武帝帝釋而禮之蕭勃死後嶺南亂頎有聲南土且與武帝有舊乃授安南將軍衡州刺史封始興縣侯未至嶺頎子紇已尅始興及頎至嶺南皆懼伏仍進廣州盡有越地改授都督交廣等十九州諸軍事平越中郎將廣州刺史王琳據有中流頎自海道及東嶺奉使不絕永定三年卽本號開府儀同三司文帝卽位進號征南將軍改封陽山郡公初交州刺史袁曇緩密以金五百兩寄頎令以百兩還合浦太守龔鷺四百兩付兒智矩餘人弗之知頎尋爲蕭勃所破貲財並盡唯所寄金獨存曇緩亦尋卒至是頎並依信還之時人莫不歎伏之時頎合門顯貴威振南土又多致銅鼓生口獻奉珍異前後委積頗有助軍國天嘉四年薨贈司空諡曰穆子紇嗣

紇字奉聖頗有幹略龔父官爵在州十餘年威惠著於百姓宣帝以紇久在南服頗疑之太建元年徵爲左衛將軍其部下多勸之反遂舉兵攻衡州刺史錢道戡詔儀同章昭達討禽之送至都伏誅子詢以年

幼苑

黃法甌字仲昭巴山新建人也少勁捷有膽力日步行二百里能距躍三丈頗便書疏閑明簿領出入州郡中爲鄉閭所憚侯景之亂於鄉里合徒衆太守賀詡下江州法甌監知郡事陳武帝將踰嶺入援建鄴李遷仕作梗中途武帝命周文育屯西昌法甌遣兵助文育時法甌出頓新淦縣景遣行臺于慶來襲新淦法甌敗之梁元帝承制授交州刺史資領新淦縣令封巴山縣子敬帝卽位改封新建縣侯太平元年割江西四郡置高州以法甌爲刺史鎮巴山蕭勃歐陽頎來攻法甌破之永定三年王琳遣李孝欽樊猛余孝頃攻周迪且謀取法甌法甌援迪禽孝頃等三將以功授平南將軍開府儀同三司熊曇朗於金口害周文育法甌共周迪討平之天嘉三年周迪反法甌與吳明徹討平迪法甌功居多廢帝卽位進爵爲公太建五年大舉北侵法甌爲都督出歷陽於是爲拋車及步艦豎拍以逼之砲加其樓堞尅之盡誅其戍卒進兵合肥望旗降款法甌禁侵掠躬自勞撫而與之盟並放還北以功加侍中改封義陽郡公七年爲豫州刺史鎮壽陽薨贈司空諡曰威子玩嗣

澹于量字思明其先濟北人也世居建鄴父文成仕梁爲將帥位梁州刺史量少善自居處倬姿容有幹略便弓馬梁元帝爲荊州刺史文成分量人馬令往事焉以軍功封廣晉縣男侯景之亂梁元帝凡遣五

軍入援臺量預其一臺城陷量還荊州元帝承制以爲巴州刺史侯景西上攻巴州元帝使都督王僧辯入據巴陵量與僧辯并力拒景大敗之禽其將任約進攻郢州獲宋子仙仍隨僧辯平侯景封謝沐縣侯尋出爲都督桂陽刺史及魏尅荊州量保桂州王琳擁割湘郢累遣召量外雖與琳往來而別遣使歸陳武帝武帝受禪進位鎮西大將軍開府儀同三司天嘉五年徵爲中撫軍大將軍量所部將率多戀本土並欲逃入山谷不願入朝文帝使湘州刺史華皎征衡州且以兵迎量天康元年至都以在道淹留爲有司奏免儀同餘如故華皎構逆以量爲征南大將軍西討大都督總率大艦自郢州樊浦拒之皎平并降周將長湖公元定等以功授侍中中軍大將軍開府儀同三司進封醴陵縣公未拜出爲南徐州刺史太建元年進號征北大將軍給扶三年就江陰王蕭季卿買梁陵中樹季卿坐免量免侍中尋復侍中吳明徹之北侵也量讚成其事又遣第六子岑率所領從軍淮南尅定量改封始安郡公及周獲吳明徹乃以吳爲都督水陸諸軍事車騎將軍都督南兗州刺史十四年薨贈司空

章昭達字伯通吳興武康人也性倜儻輕財尙氣少時遇相者謂曰卿容貌甚善須小虧則當富貴梁大同中昭達爲東宮直後因醉墮馬鬢角小傷昭達喜之相者曰未也侯景之亂昭達率鄉人援臺爲流矢所中眇其一目相者見之曰卿相善矣不久當富貴臺城陷昭達還鄉里與陳文帝游因結君臣分侯景

平文帝爲吳興太守昭達杖策來謁文帝見之大喜因委以將帥恩寵超於儕等陳武帝謀討王僧辯令文帝還長城招聚兵衆以備杜龕頰使昭達往京口稟承計畫僧辯誅後杜龕遣其將杜泰來攻長城昭達因從文帝進軍吳興以討龕龕平又從討張彪於會稽剋之累功除定州刺史時留異擁據東陽武帝患之乃使昭達爲長山令居其心腹天嘉元年追論長城功封欣樂縣侯尋隨侯安都拒王琳昭達乘平虜大艦中流而進先鋒發拍中賊艦王琳平昭達策勳第一二年除都督郢州刺史周迪據臨川反詔昭達便道征之迪敗走微爲護軍將軍改封邵武縣侯四年陳寶應納周迪共寇臨川又以昭達爲都督討迪迪走昭達乃踰嶺討陳寶應與戰不利因據上流爲筏施拍其上壞其水柵又出兵攻其步軍方大合戰會文帝遣余孝頃出自海道適至因并力乘之遂定閩中盡禽留異寶應以功授鎮軍將軍開府儀同三司初文帝嘗夢昭達升台鉉及旦以夢告之至是侍宴酒酣顧昭達曰卿憶夢否何以償夢昭達對曰當犒大馬之用以盡臣節自餘無以奉償尋出爲都督江州刺史廢帝卽位改封邵陵郡公華皎之反其移文並假以昭達爲辭又頻遣使招之昭達盡執其使送都秩滿徵爲中撫大將軍宣帝卽位進號車騎大將軍以還朝遲留爲有司所劾降號車騎將軍歐陽紇據嶺南反詔昭達都督衆軍征之紇聞昭達奄至乃出頓堰口聚沙石盛以竹籠置於水柵之外用遏舟艦昭達居其上流裝艦造拍以臨賊柵又令人

銜刀潛行水中以斫竹籠籠箴皆解因縱大艦突之大敗紇禽之送都廣州平進位司空太建二年征江陵時梁明帝與周軍大蓄舟艦於青泥中昭達分遣偏將錢道戢程文季乘輕舟焚之周又於峽口南岸築壘名安蜀城於江上橫引大索編葦爲橋以度軍糧昭達乃命軍士爲長戟施樓船上仰割其索索斷糧絕因縱兵攻其城降之三年於軍中病薨贈大將軍昭達性嚴刻每奉命出征必晝夜倍道然其所尅必推功將帥廚膳飲食並同羣下將士亦以此附之每飲食必盛設女伎雜樂備羌胡之聲音律姿容並一時之妙雖臨敵弗之廢也四年配享文帝廟庭子大寶襲邵陵郡公位豐州刺史在州貪縱百姓怨酷後主以太僕卿李暈代之乃襲殺暈而反尋被禽梟首朱雀航夷三族

吳明徹字通炤秦郡人也父樹梁右軍將軍明徹幼孤性至孝年十四感墳塋未修家貧無以取給乃勤力耕種時天下亢旱苗稼焦枯明徹哀憤每之田中號哭仰天自訴居數日有自田還者云苗已更生明徹疑其給已及往如言秋而大獲足充葬用時有伊氏者善占墓謂其兄曰君葬日必有乘白馬逐鹿者經墳此是最小孝子大貴之徵至時果有應明徹卽樹之小子也及侯景寇都明徹有粟麥三千餘斛而鄰里飢餓乃白諸兄曰今人不圖久奈何不與鄉里共此於是計口平分同其豐儉羣盜聞而避焉賴以存者甚衆陳武帝鎮京口深相要結明徹乃詣武帝帝爲之降壇執手卽席明徹亦微涉書史經傳就汝

南周弘正學天文孤虛遁甲略通其術頗以英雄自許武帝亦深奇之及受禪授安南將軍與侯安都周文育將兵討王琳及衆軍敗沒明徹自拔還都文帝卽位以本官加右衛將軍及周迪反詔以明徹爲江州刺史領豫章太守總衆軍以討迪明徹雅性剛直統內不甚和文帝聞之遣安成王瑛代明徹令以本號還朝天嘉五年遷吳興太守及引辭之郡帝謂曰吳興雖郡帝卿之重故以相授廢帝卽位授領軍將軍尋遷丹陽尹仍詔以甲仗四十人出入殿省到仲舉之矯令出宣帝也毛喜知其詐宣帝懼遣喜與明徹籌焉明徹曰嗣君諒闇萬機多闕殿下親實周召德冠伊霍願留中深計慎勿致疑及湘州刺史華皎陰有異志詔授明徹都督湘州刺史仍與征南大將軍湛于量等討皎皎平授開府儀同三司進爵爲公太建五年朝議北征公卿互有異同明徹決策請行詔加侍中都督征討諸軍事總衆軍十餘萬發都緣江城鎮相續降款軍至秦郡齊大將軍尉破胡將兵爲援破走之秦郡降宣帝以秦郡明徹舊邑詔具太守令拜祠上冢文武羽儀甚盛鄉里榮之進尅仁州授征北大將軍進封南平郡公進逼壽陽齊遣王琳拒守明徹乘夜攻之中宵而潰齊兵退據相國城及金城明徹令軍中益修攻具又遏肥水灌城城中苦濕多腹疾手足皆腫死者十六七會齊遣大將皮景和率兵數十萬來援去壽春二十里頓軍不進諸將咸曰計將安出明徹曰兵貴在速而彼結營不進自挫其鋒吾知其不敢戰明矣於是躬擐甲宵四面疾

攻城中震恐一鼓而禽王琳等送建鄴景和懼而遁走詔以爲車騎大將軍豫州刺史增封并前三千五百戶遣謁者蕭瀆就壽陽授策明徹於城南設壇士卒二十萬陳旗鼓戈甲登壇拜受成禮而退六年自壽陽入朝輿駕幸其第賜鍾磬一部七年進攻彭城軍至呂梁又大破齊軍八年進位司空給大都督銜鉞龍磨尋授都督南兗州刺史及周滅齊宣帝將事徐兗九年詔明徹北侵令其世子慧覺攝行州事軍至呂梁周徐州總管梁士彥率衆拒戰明徹頻破之仍進清水以灌其城攻之甚急環列舟艦於城下周遣上大將軍王軌救之軌輕行自清水入灌口橫流豎木以鐵鎖貫車輪遏斷船路諸將聞之甚恐議欲破堰拔軍以筋載馬馬明戎裴子烈曰君若決堰下船船必傾倒豈可得乎不如前遣馬出適會明徹苦背疾甚篤知事不濟遂從之乃遣蕭摩訶帥馬軍數千前還明徹仍自決其堰乘水力以退軍及至清口水力微舟艦並不得度衆軍皆潰明徹窮蹙乃就執周封懷德郡公位大將軍以憂薨疾卒於長安後故吏盜其柩歸至德元年詔追封邵陵侯以其息慧覺嗣

裴子烈字大士河東聞喜人梁員外散騎常侍猗之子少孤有志氣以驍勇聞位北譙太守岳陽內史封海安伯

論曰古人云知臣莫若君書曰知人則哲觀夫陳武論將而周侯遇禍有以知斯言之非妄矣若不然者

亦何以驅駕雄傑而創基撥亂者乎故瑱頗並自奔囚翻同有亂甦量望風景附自等誠臣良有以也昭
達勤王之略遠符耿奔行己之方頗同吳漢既眇而貴亦黥而王吉凶之算豈人事也明徹屬運否之期
當關主之任才非韓白識暗孫吳知進而不知止知得而不知喪犯斯不韙師亡國感宜矣哉

南史卷六十六

南史卷六十六考證

杜僧明傳武帝頓豫章命僧明爲前驅○命陳書作會誤

周文育傳文育對曰母老家貧兄弟姊並長大○陳書無弟字

後監州王勣以文育爲長流深被委任○長流下陳書有令字

侯瑱傳是時瑱據中流甚強○甚強陳書作兵甚強

侯安都傳父捍少仕州郡○捍陳書作文捍

禽齊儀同乞伏無芳○伏閣本作扶又芳陳書作勞

放拍碎其樓○陳書樓字下有雉字

歐陽頎傳蘭欽弟前高州刺史裕攻始興內史蕭昭基奪其郡○昭陳書作紹

黃法甌傳日步行二百里○陳書步行日三百里

於是爲拋車及步艦暨拍以逼之○拋陳書作拍

章昭達傳眇其一目○眇監本訛眇今改正

吳明徹傳字通炤○炤陳書作昭

年十四感墳塋未脩○脩陳書作備

到仲舉之矯令出宣帝也毛喜知其詐○詐一本作謀

又過肥水灌城○又監本訛尺陳書云又進肥水以灌城今改正

南史卷六十七

唐

李

延

壽

列傳第五十七

胡穎

徐度

子敬成

杜稜

周鐵虎

程靈洗

子文季

沈恪

陸子隆

錢道戢

駱文牙

孫瑒

徐世譜

周敷

荀朗

周昺

魯悉達

弟廣達

蕭摩訶

子世廉

任忠

樊毅

弟猛

胡穎字方秀吳興人也偉姿容性寬厚梁末陳武帝在廣州穎深自結託從克元景仲平蔡路養李遷仕皆有功武帝進軍頓西昌以穎為巴邑令鎮大臯督糧運下至豫章以穎監豫章郡武帝率眾與王僧辯會白茅灣同討侯景以穎知留府事梁承聖初元帝授穎羅州刺史封漢陽縣侯尋除豫章內史隨武帝鎮京口齊遣郭元建出東關武帝令穎率府內驍勇隨侯瑱於東關大破之後從武帝襲王僧辯又隨周文育於吳興討杜龕武帝受禪兼左衛將軍天嘉元年除散騎常侍吳興太守卒官謚曰壯二年配享武帝廟庭子六同嗣

徐度字孝節安陸人也少儻不拘小節及長姿貌瓌偉嗜酒好博恆使僮僕屠酤為事初從梁始興內

史蕭介征諸山洞以驍勇聞陳武帝在交趾乃委質焉侯景之亂武帝剋廣州平蔡路養破李遷仕計畫多出於度侯景平後追錄前後戰功封廣德縣侯武帝鎮朱方除蘭陵太守武帝遣衡陽獻王往荊州度率所領從焉江陵覆亡間行東歸武帝東討杜龕奉敬帝幸京口以度領宿衛并知留府事徐嗣徽任約等來寇武帝與敬帝還都時賊已據石頭使度頓軍於冶城寺明年嗣徽等又引齊寇濟江度隨衆軍破之於北郊壇以功除郢州刺史兼領吳興太守文帝卽位累遷侍中中撫將軍開府儀同三司進爵爲公天嘉元年以平王琳功改封湘東郡公及太尉侯瑱薨于湘州以度代瑱爲都督湘州刺史秩滿復爲侍中中軍大將軍文帝崩度預顧命許以甲仗五十人入殿省廢帝卽位進位司空薨贈太尉諡曰忠肅太建四年配享武帝廟庭子敬成嗣

敬成幼聰慧好讀書起家著作佐郎永定元年領度所部士卒隨周文育侯安都征王琳於沌口敗績爲琳所繫二年隨文育安都得歸父度爲吳郡太守以敬成監郡光大元年爲巴州刺史尋領水軍隨吳明徹平華皎太建二年以父憂去職尋起爲南豫州刺史襲爵湘東郡公五年除吳興太守隨都督吳明徹北討出秦郡別遣敬成爲都督乘金翅自歐陽引埭泝江由廣陵齊人皆城守弗敢出自繁梁湖下淮剋淮陰山陽鹽城三郡仍進剋鬱州進號壯武將軍鎮胸山坐於軍中輒科訂并誅新附者免官尋除安州

刺史鎮宿豫卒諡曰思子敞嗣

杜稜字雄盛吳郡錢唐人也少落泊不爲時知頗涉書傳游嶺南事梁廣州刺史新渝侯蕭映映卒從陳武帝平蔡路養李遷仕皆有功梁元帝承制授石州刺史上陌縣侯侯景平後武帝鎮朱方以稜監義興琅邪二郡武帝謀誅王僧辯引稜與侯安都等共議稜難之武帝懼其泄已乃以手巾絞稜悶絕於地因閉於別室軍發召與同行及僧辯平後武帝東征杜龕等留稜與安都居守徐嗣徽任約引齊師濟江攻臺城安都與稜隨方抗拒未嘗解帶賊平以功除右衛將軍丹陽尹永定元年位侍中中領軍武帝崩文帝在南皖時內無嫡嗣外有強敵侯瑱侯安都徐度等並在軍中朝廷宿將唯稜在都獨典禁兵乃與蔡景歷等祕不發喪奉迎文帝文帝卽位遷領軍將軍以預建立功改封永城縣侯位丹陽尹廢帝卽位加特進侍中光大元年解尹量置佐史給扶太建元年出爲吳興太守二年徵爲侍中尋加特進護軍將軍三年以公事免侍中護軍四年復爲侍中右光祿大夫將軍佐史扶並如故稜歷事三帝並見恩寵末年不預征役優游都下頃之卒于官贈開府儀同三司諡曰成配享武帝廟廷子安世嗣

周鐵虎不知何許人也語音僞重膂力過人便馬槊事梁河東王蕭譽以勇敢聞譽爲湘州以爲臨蒸令侯景之亂梁元帝遣世子方等伐譽譽拒戰大捷方等死鐵虎功最及王僧辯討譽於陣獲之將烹焉鐵

虎呼曰侯景未滅奈何殺壯士僧辯奇其言宥之還其麾下及侯景西上鐵虎從僧辯尅任約獲宋子仙每戰有功元帝承制授潼州刺史封池陽縣子又從僧辯定建鄴降謝答仁平陸納於湘州錄前後功進爵爲侯陳武帝誅僧辯鐵虎率所部降因復其本職徐嗣徽引齊寇度江鐵虎破其水軍嗣徽平遷太子左衛率尋隨周文育拒蕭勃文育命鐵虎偏軍襲勃禽勃前軍歐陽頎又隨文育西征王琳於池口敗績與文育侯安都並爲琳所禽琳見諸將與語唯鐵虎辭氣不屈故琳盡宥文育之徒獨鐵虎見害贈侍中護軍天嘉三年文帝又詔配食武帝廟庭子瑜嗣

程靈洗字玄滌新安海鹽人也少以勇力聞步行日二百里便騎善游素爲鄉里畏伏侯景之亂據黟歙聚徒以拒景軍據有新安新安太守湘西鄉侯蕭隱奔依靈洗靈洗奉以主盟梁元帝授靈洗譙州刺史資領新安太守封巴丘縣侯後助王僧辯鎮防及武帝誅僧辯靈洗率所領來援其夜力戰於石頭西門武帝軍不利遣使招諭久之乃降帝深義之授蘭陵太守仍助防京口及平徐嗣徽靈洗有功除南丹陽太守封遂安縣侯後隨周文育西討王琳軍敗爲琳所拘尋與侯安都等逃歸累遷太子左衛率武帝崩王琳前軍東下靈洗於南陵破之虜其兵士并獲青龍十餘乘以功授都督南豫州刺史侯瑱等敗王琳于柵口靈洗逐北據有魯山徵爲左衛將軍天嘉四年周迪重寇臨川以靈洗爲都督自鄱陽別道擊

之迪又走山谷間遷中護軍出爲都督郢州刺史廢帝卽位進號雲麾將軍華皎之反遣使招靈洗靈洗
斬皎使以聞朝廷深嘉其忠因推心待之使其子文季領水軍助防時周將元定率步騎二萬助皎圍靈
洗靈洗嬰城固守及皎敗乃出軍躡定定不獲濟江以其衆降因進攻剋周沔州禽其刺史裴寬以功改
封重安縣公靈洗性嚴急御下甚苛刻士卒有小罪必以軍法誅之號令分明與士卒同甘苦衆亦以此
德之性好播植躬勤耕稼至於水陸所宜刈穫早晚雖老農不能及也妓妾無游手並督之紡績至於散
用貲財亦弗儉吝卒贈鎮西將軍開府儀同三司諡曰忠壯太建四年配享武帝廟庭子文季嗣

文季字少卿幼習騎射多幹略果決有父風靈洗與周文育侯安都等敗於沌口爲王琳所執武帝召隋
賊諸子弟厚遇之文季最有禮容深見賞文帝嗣位除宣惠始興王府限內中直兵參軍累遷臨海太守
後乘金翅助父鎮郢城華皎平靈洗及文季並有扞禦之功及靈洗卒文季盡領其衆起爲超武將軍仍
助防郢州文季性至孝雖軍旅奪禮而毀瘠甚至服闋襲封重安縣公隨都督章昭達率軍往荊州征梁
梁人與周軍多造舟艦置于青泥水中昭達遣文季共錢道戢盡焚其舟艦旣而周兵大出文季僅以身
免以功加通直散騎常侍太建五年都督吳明徹北討至秦郡秦郡前江浦通涂水齊人並下大柱爲柵
柵水中文季乃前領騎勇拔開其柵明徹率大軍自後而至攻剋秦郡又別遣文季攻涇州屠其城進拔

盱眙仍隨明徹圍壽陽文季臨事謹飭御下嚴整前後所克城壘率皆迨水爲堰土木之功動踰數萬置陣役人文季必先於諸將夜則早起迄暮不休軍中莫不服其勤幹每戰爲前鋒齊軍深憚之謂爲程彪以功除散騎常侍帶新安內史累遷北徐州刺史加都督後隨明徹北侵軍敗爲周所囚仍授開府儀同三司十一年自周逃歸至渦陽爲邊吏執送長安死于獄是時旣與周絕不之知至德元年後主知之贈散騎常侍又詔傷其廢絕降封重安縣侯以子響襲封

沈恪字子恭吳興武康人也深沉有幹局梁新渝侯蕭映之爲廣州兼映府中兵參軍陳武帝與恪同郡情好甚昵蕭映卒後武帝南討李賁仍遣妻子附恪還鄉尋補東宮直後以嶺南勦除員外散騎侍郎仍令總集宗從子弟侯景圍臺城起東西二土山以逼城城內亦作土山應之恪爲東土山主晝夜拒戰以功封東興侯及城陷間行歸鄉武帝討景遣使報恪恪於東起兵相應賊平後授都軍副及武帝謀討王僧辯恪預兵事武帝使文帝還長城立柵備杜龔使恪還武康招集兵衆及僧辯誅龔果遣副將杜泰襲文帝於長城恪時已出縣誅龔黨與武帝尋遣周文育來援長城文育至泰乃走及龔平文帝襲東揚州刺史張彪以恪監吳興郡武帝受禪時恪自吳興入朝武帝使中書舍人劉師知引恪令勒兵入因衛敬帝如別宮恪排闥入見武帝叩頭謝曰恪身經事蕭家來今日不忍見此事分受死耳決不奉命武帝嘉

其意不復逼更以盪主王僧志代之帝踐阼除吳興太守永定三年除散騎常侍會稽太守歷事文帝及廢帝累遷護軍將軍至宣帝卽位除平越中郎將都督廣州刺史恪未至嶺前刺史歐陽紇舉兵拒嶮不得進朝廷遣司空章昭達討平紇乃得入州兵荒之後所在殘毀恪綏懷安輯被以恩惠嶺表賴之後主卽位爲特進金紫光祿大夫卒諡曰光子法興嗣

陸子隆字興世吳郡人也祖敞之梁嘉興令父俊封氏令子隆少慷慨有志功名侯景之亂於鄉里聚徒時張彪爲吳郡太守引爲將帥仍隨彪徙鎮會稽及文帝討彪彪將沈泰吳寶真申縉等皆降而子隆力戰敗績文帝義之復使領其部曲文帝嗣位子隆力戰領甲仗宿衛封益陽縣子累遷廬陵太守周迪據臨川反子隆隨章昭達討迪迪退走因隨昭達討陳寶應晉安平子隆功最遷武州刺史改封朝陽縣伯華皎據湘州反以子隆居其心腹皎深患之頻遣使招子隆不從攻又不尅及皎敗於郢州子隆出兵襲其後因與大軍相會進爵爲侯尋遷都督荊州刺史荊州新置居公安城池未固子隆修立城郭綏集夷夏甚得人和號爲稱職吏人詣闕求立碑頌美功績詔許之卒諡威子之武嗣之武年十六領其舊軍後爲弘農太守乃隸吳明徹於呂梁軍敗逃歸爲人所害子隆弟子才亦有幹略從子隆征討有功除始平太守封始康縣子卒於信州刺史

錢道戢字子韜吳興長城人也父景深梁漢壽令道戢少以孝行著聞及長頗有材幹陳武帝微時以從妹妻焉武帝輔政道戢隨文帝平張彪于會稽以功拜東徐州刺史封永嘉縣侯天嘉元年爲臨海太守侯安都之討留異道戢帥軍出松陽以斷其後異平以功拜都督衡州刺史領始興內史後與章昭達討歐陽紇紇平除左衛將軍太建二年又隨昭達征江陵以功加散騎常侍後爲都督郢州刺史與儀同黃法甌攻下歷陽因以道戢鎮之卒官諡曰肅子邈嗣

駱文牙字旗門吳興臨安人也父裕梁鄱陽嗣王中兵參軍事牙年十二宗人有善相者云此郎容貌非常必將遠致梁太清末陳文帝避地臨安文牙母陳觀帝儀表知非常人賓待甚厚及帝爲吳興太守引文牙爲將帥從平杜龔張彪勇冠衆軍文帝卽位封臨安縣侯位越州刺史初文牙母卒時兵荒至是始葬詔贈臨安國太夫人諡曰恭太建八年文牙累遷散騎常侍入直殿省十年授豐州刺史至德二年卒贈廣州刺史子義嗣

孫瑒字德璉吳郡吳人也父修道梁中散大夫以雅素知名瑒少個儻好謀略博涉經史尤便書翰仕梁爲邵陵王中兵參軍事太清之難授假節宣猛將軍軍主王僧辯之討侯景也王琳爲前軍琳與瑒親姪乃表薦爲宜都太守後以軍功封富陽侯敬帝立累遷巴州刺史及陳武帝受禪王琳立梁永嘉王蕭莊

於郢州徵場爲少府卿仍徙都督郢州刺史總留府之任周遣大將軍史寧乘虛攻之場兵不滿千人乘城拒守周兵不能尅及王琳乘勝而進周兵乃解場於是盡有中流之地旣而遣使奉表歸陳天嘉元年授湘州刺史封定襄縣侯場懷不自安乃固請入朝徵爲侍中領軍將軍未拜文帝謂曰昔朱買臣願爲本郡卿豈有意授乎改授吳郡太守給鼓吹一部秩滿徵拜散騎常侍中護軍及留異反據東陽詔場督舟師進討異平遷鎮右將軍頃之出爲建安太守太建四年爲都督荊州刺史出鎮公安爲鄰境所憚居職六年以公事免及吳明徹軍敗呂梁詔授都督緣江水陸諸軍事尋授都督郢州刺史十二年坐疆場交通抵罪後主嗣位復爲邑歷位度支尙書侍中祠部尙書後主頗幸其宅賦詩述勳德之美遷五兵尙書領左軍將軍侍中如故禎明元年卒官諡曰桓場事親以孝聞於諸弟甚篤睦性通泰有財散之親友居家頗失於侈家庭穿築極林泉之致歌鍾舞女當世罕儔賓客填門軒蓋不絕及出鎮郢州乃合十餘船爲大舫於中立亭池植荷芰每良辰美景賓僚並集泛長江而置酒亦一時之勝賞焉常於山齋設講肆集玄儒之士冬夏資奉爲學者所稱而處已率易不以名位驕物時興皇寺朗法師該通釋典場每造講筵時有抗論法侶莫不傾心又巧思過人爲起部尙書軍國器械多所創立有鑒識男女婚姻皆擇素貴及卒尙書令江總爲之銘誌後主又題銘後四十字遣左戶尙書蔡徵就宅宣敕鐫之其詞曰秋風動

竹烟水驚波幾人樵徑何處山阿今時日月宿昔綺羅天長路遠地久靈多功臣未勒此意如何時論以爲榮場二十子第二子訓頗知名位高唐太守陳亡入隋

徐世譜字興宗巴東魚復人也世居荊州爲主帥征伐蠻蜒至世譜尤勇敢有放力善水戰梁元帝之爲荊州刺史世譜將領鄉人事焉侯景之亂因預征討累遷至員外散騎常侍尋領水軍從司徒陸法和與景戰於赤亭湖時景軍甚盛世譜乃別造樓船拍艦火舫水車以益軍勢將戰又乘大艦居前大敗景軍禽景將任約景退走因隨王僧辯攻郢州世譜復乘大艦臨其倉門賊將宋子仙據城降以功除信州刺史封魚復縣侯仍隨僧辯東下恆爲軍鋒景平以衡州刺史資領河東太守西魏攻荆門世譜鎮馬頭岸據有龍洲元帝授侍中都督江南諸軍事鎮南將軍護軍將軍魏尅江陵世譜東下依侯瑱紹泰元年徵爲侍中左衛將軍陳武帝之拒王琳其水戰之具悉委世譜世譜性機巧諳解舊法所造器械並隨機損益妙思出人永定二年遷護軍將軍文帝卽位歷特進右光祿大夫以疾失明謝病不朝卒諡曰桓

周敷字仲遠臨川人也爲郡豪族敷形貌眇小如不勝衣膽力勁果超出時輩性豪俠輕財重士鄉黨少年任氣者咸歸之侯景之亂鄉人周續合衆以討賊爲事梁內史始興蕃王蕭毅以郡讓續續所部有欲侵掠殺者敷擁護之親率其黨捍送至豫章時梁觀盍侯蕭永長樂侯蕭基豐城侯蕭泰避難流寓閩敷

信義皆往依之數愍其危懼屈體崇敬厚加給郵送之西上俄而續部下將帥爭權殺續以降周迪迪素無簿閱又失衆心倚數族望深求交結數未能自固事迪甚恭迪大憑仗之迪據臨川之工塘數鎮臨川故郡侯景平梁元帝授數寧州刺史封西豐縣侯陳武帝受禪王琳據有上流余孝頃與琳黨李孝欽等共圍周迪數助於迪迪禽孝頃等數功最多熊曇朗之殺周文育據豫章將兵襲數數大破之曇朗走巴山郡數因與周迪黃法蕪等進兵屠之王琳平授散騎常侍豫章太守時南江酋帥並顧戀葉窟唯數獨先入朝天嘉二年詣闕進號安西將軍令還鎮豫章周迪以數素出己下超致顯達深不平乃舉兵反遣弟方興襲數數大破之仍從都督吳明徹攻破迪禽方興再遷都督南豫州刺史迪又收餘衆襲東興文帝遣都督章昭達征迪數又從軍至定川縣與迪相對迪給數求還朝欲立盟數許之方登壇爲迪所害謚曰脫子智安嗣位至太僕卿

荀朗字深明潁川潁陰人也祖延祖梁潁川太守父伯通衛尉卿朗少慷慨有將帥大略侯景之亂據巢湖無所屬臺城陷沒後梁簡文帝密詔授朗豫州刺史令與外蕃討景景使儀同宋子仙任約等頻征之不能尅時都下饑朗更招致部曲衆至數萬侯景敗於巴陵朗截破其後軍景平後又別破齊將郭元建於踰山及魏尅荊州陳武帝入輔齊遣蕭軌東方老等來寇據石頭朗自宣城來赴與侯安都等大破

之武帝受禪賜爵興靈縣侯以朗兄昂爲左衛將軍弟晷爲太子右衛率武帝崩宣太后與會人蔡景歷
祕不發喪朗弟曉在都微知之謀率其家兵襲臺事覺景歷殺曉仍繫其兄弟文帝卽位並釋之因厚撫
朗令與侯安都等拒王琳琳平遷都督合州刺史卒諡曰壯子法尙嗣法尙少個儻有文武幹略禎明中
爲都督郢州刺史及隋軍濟江法尙降入隋歷邵觀縣豐四州刺史巴東敦煌二郡太守

周暹字文昭汝南安成人也祖強齊梁州刺史父靈起梁廬桂二州刺史保城縣侯暹少豪俠任氣有將
帥才梁太清元年爲弋陽太守侯景之亂元帝承制改授西陽太守封西陽縣伯以軍功累遷都督江州
刺史進爲侯陳武帝踐阼王琳擁據上流暹以州從之後爲侯安都所禽送都文帝釋之授定州刺史帶
西陽武昌二郡太守太建五年爲都督安州刺史改封龍源縣侯其年隨都督吳明徹北討所向尅捷一
月之中獲十二城敗齊尙書左丞陸騫軍進攻巴州尅之於是江北諸城及穀陽土人並誅其渠帥以城
降進號和戎將軍仍敕追暹入朝後梁定州刺史田龍昇以城降詔以爲定州刺史封赤亭王及暹入朝
龍昇以江北六州七鎮叛入于齊齊遣歷陽王高景安應之於是令暹爲江北道大都督總統衆軍以討
龍昇斬之盡復江北之地進號平北將軍卒於官贈司州刺史改封武昌郡公諡曰壯

魯悉達字志通扶風郿人也祖斐齊衡州刺史陽塘侯父益之梁雲麾將軍新蔡義陽二郡太守悉達幼

以孝聞侯景之亂糺合鄉人保新蔡力田蓄穀時兵荒都下及上川餓死者十八九有得存者皆攜老幼以歸焉悉達所濟活者甚衆招集晉熙等五部盡有其地使其弟廣達領兵隨王僧辯討平侯景梁元帝授北江州刺史敬帝卽位王琳據有上流留吳余孝頃周迪等所在蠶起悉達撫綏五郡甚得人和琳授悉達鎮北將軍陳武帝亦遣趙知禮授征西將軍江州刺史悉達兩受之遷延願望武帝遣安西將軍沈泰濟師襲之不能尅齊遣行臺慕容紹宗來攻鬱口諸鎮悉達與戰大敗齊軍紹宗僅以身免王琳欲圖東下以悉達制其中流遣使招誘悉達終不從琳不得下乃連結於齊齊遣清河王高岳助之會裨將梅天養等懼罪乃引齊軍入城悉達勒麾下數千人濟江而歸武帝帝見之喜曰來何遲也授北江州刺史彭澤縣侯悉達雖杖氣任俠不以富貴驕人雅好詞賦招禮賢才與之賞會文帝卽位遷吳州刺史遭母憂哀毀過禮因遭疾卒諡孝侯子覽嗣弟廣達廣達字徧覽少慷慨志立功名虛心愛士賓客自達而至時江表將帥各領部曲動以千數而魯氏尤爲多仕梁爲平南當陽公府中兵參軍侯景之亂與兄悉達聚衆保新蔡梁元帝承制授晉州刺史王僧辯之討侯景廣達出境候接資奉軍儲僧辯謂沈炯曰魯晉州亦是王師東道主人仍率衆隨僧辯景平加員外散騎常侍陳武受禪授東海太守後代兄悉達爲吳州刺史封中宿縣侯光大元年遷南豫州刺史華皎稱兵上流詔司空瀆于量進討軍至夏口見陵舟師

強盛莫敢進廣達首率驍勇直衝賊軍廣達墮水沉溺久之因救獲免陵平授巴州刺史太建初與儀同
章昭達入峽口招定安蜀等諸州鎮時周圖江左大造舟艦於蜀并運糧青泥廣達與錢道戡等將兵掩
襲縱火焚之仍還本鎮廣達爲政簡要推誠任下吏人便之及秩滿皆詣闕表請於是詔申二年衆軍北
伐略淮南舊地廣達與齊軍會於大峴大破之斬其數城主張元範進寇北徐州仍授北徐州刺史十年
授都督合州刺史十一年周將梁士彥圍壽春詔遣中領軍樊毅左衛將軍任忠等分部趣陽平秦郡廣
達率衆入淮爲掎角以擊之周軍攻陷豫霍二州南北竟晉等各自拔諸將並無功盡失淮南之地廣達
因免官以侯還第十二年與南豫州刺史樊毅北討寇郭默城尋授平西將軍都督郢州以上七州諸軍
事頓兵江夏周安州總管元景征江外廣達命偏師擊走之至德二年爲侍中改封綏越郡公尋爲中領
軍及賀若弼進軍鍾山廣達於白土岡置陣與弼旗鼓相對廣達躬擐甲胄手執桴鼓率勵敢死而進隋
軍退走如是者數四及弼乘勝至宮城燒北掖門廣達猶督餘兵苦戰不息會日暮乃解甲面臺再拜慟
哭謂衆曰我身不能救國負罪深矣士卒皆涕泣獻歎於是就執禎明三年依例入隋廣達追愴本朝淪
覆遘疾不療尋以憤慨卒尙書令江總撫柩慟哭乃命筆題其棺頭爲詩曰黃泉雖抱恨白日自留名悲
君感義死不作負恩生又製廣達墓銘述其忠槩初隋將韓擒虎濟江廣達長子世真在新蔡乃與其弟

世雄及所部奔擒虎遣使致書招廣達廣達時屯兵都下乃自劾廷尉請罪後主謂曰世真雖異路中大夫公國之重臣吾所恃賴豈得自同嫌疑之間乎加賜黃金卽日還營廣達有隊主楊孝辯時從廣達在軍中力戰陷陣其子亦隨孝辯揮刀殺隋兵十餘人力窮父子俱死

蕭摩訶字元胤蘭陵人也父諒梁始興郡丞摩訶隨父之郡年數歲而父卒其姊夫蔡路養時在南康乃收養之稍長果毅有勇力侯景之亂陳武帝赴援建鄴路養起兵拒武帝摩訶時年十三單騎出戰軍中莫有當者及路養敗摩訶歸侯安都常從征討安都遇之甚厚及任約徐嗣徽引齊兵爲寇武帝遣安都北拒齊軍於鍾山龍尾及北郊壇安都謂摩訶曰卿驍勇有名千聞不如一見摩訶對曰今日令公見之及戰安都墜馬被圍摩訶獨騎大呼直衝齊軍齊軍稍解去安都乃免以平留異歐陽紇功累遷巴山太守太建五年衆軍北伐摩訶隨都督吳明徹濟江攻秦郡時齊遣大將尉破胡等率衆十萬來援其前隊有蒼頭犀角大力之號皆身長八尺膂力絕倫其鋒甚銳又有西域胡妙於弓矢弦無虛發衆軍尤憚之及將戰明徹謂摩訶曰若殪此胡則彼軍奪氣君有關張之名可斬顏良矣摩訶曰願得識其形狀明徹乃召降人有識胡者云胡絳衣樺皮裝弓兩端骨弭明徹遣人覘伺知胡在陣仍自酌酒飲摩訶摩訶飲訖馳馬衝齊軍胡挺身出陣前十餘步發弓未發摩訶遙擲銑鏡正中其額應手而仆齊軍大力十餘人

出戰摩訶又斬之於是齊師退走以功封廉平縣伯尋進爲侯位太僕卿又隨明徹進圍宿豫擊走齊將王康德以功除晉熙太守九年明徹進軍呂梁與齊大戰摩訶率七騎先入手奪齊軍大旗齊衆大潰以功授譙州刺史及周武帝滅齊遣其將宇文忻爭呂梁忻時有精騎數千摩訶領十二騎深入周軍從橫奮擊斬馘甚衆及周遣大將王軌來赴結長圍連鑊於呂梁下流斷大軍還路摩訶謂明徹曰聞軌始鑊下流其兩頭築城今尙未立公若見遣擊之彼必不敢相拒彼城若立則吾屬虜矣明徹奮髯曰寧旗陷陣將軍事也長算遠略老夫事也摩訶失色而退一旬之中水路遂斷周兵益至摩訶又請曰今求戰不得進退無路若潛軍突圍未足爲恥願公率步卒乘馬輿徐行摩訶驅馳前後必使公安達京邑明徹曰弟計乃良圖也然老夫受賑專征今被圍逼慙實無地且步軍旣多吾爲總督必須身居其後相率兼行弟馬軍宜須在前摩訶因夜發選精騎八千率先衝突自後衆騎繼焉比旦達淮南宣帝徵還授右衛將軍及宣帝崩始興王叔陵於殿內手刃後主遂奔東府城摩訶入受敕乃率馬步數百趣東府城斬之以功授車騎大將軍封綏建郡公叔陵素所蓄聚金帛累巨萬後主悉以賜之改授侍中驃騎大將軍左光祿大夫舊制三公黃閣聽事置鷓尾後主特詔摩訶開黃閣門施行馬聽事寢堂並置鷓尾仍以其女爲皇太子妃會隋總管賀若弼鎮廣陵後主委摩訶禦之授南徐州刺史禎明三年元會徵摩訶還朝弼乘

虛濟江襲京口摩訶請率兵逆戰後主不許及弼進鍾山摩訶又曰弼懸軍深入斷壘未堅出兵掩襲必尅又不許及將出戰後主謂曰公可爲我一決摩訶曰從來行陣爲國爲身今日之事兼爲妻子後主多出金帛賦諸軍以充賞賜令中領軍魯廣達陳兵白土岡居衆軍南鎮東大將軍任忠次之護軍將軍樊毅都官尙書孔範又次之摩訶軍最居北衆軍南北亘二十里首尾進退不相知弼初謂未戰將輕騎登山望見衆軍因馳下置陣後主通於摩訶之妻故摩訶雖領勁兵八千初無戰意唯魯廣達田端以其徒力戰賀若弼及所部行軍七總管楊牙韓洪員明黃昕張默言達奚隆張辯等甲士凡八千人各勒陣以待之弼躬當魯廣達麾下戰死者二百七十三人弼縱煙以自隱窘而復振陳兵得人頭皆走獻後主求賞金銀弼更趣孔範範兵暫交便敗走陳軍盡潰死者五千人諸門衛皆走黃昕馳燒北掖門而入員明禽摩訶以送弼弼以刀臨頸詞色不撓乃釋而禮之及城平弼置後主於德教殿令兵衛守摩訶請弼曰今爲囚虜命在斯須願一見舊主死無所恨弼哀而許之入見後主俯伏號泣仍於舊廚取食進之辭訣而出守衛者皆不能仰視隋文帝聞摩訶抗答賀若弼曰壯士也此亦人之所難入隋授開府儀同三司尋從漢王諒詣并州同諒作逆伏誅年七十三摩訶訥於言恂恂長者至於臨戎對寇志氣奮發所向無前年末弱冠隨侯安都在京口性好獵無日不畋游及安都征伐摩訶功居多

子世廉有父風性至孝及摩訶凶終服闋後追慕彌切其父時賓故脫有所言及世廉對之哀慟不自勝言者爲之歔歔終身不執刀斧時人嘉焉摩訶有騎士陳智深者勇力過人以平叔陵功爲巴陵內史摩訶之戮也其子先已籍沒智深收摩訶屍手自殯歛哀感行路君子義之潁川陳禹亦隨摩訶征討聰敏有識量涉獵經史解風角兵書頗能屬文便騎射官至王府諮議

任忠字奉誠小名蠻奴汝陰人也少孤微不爲鄉黨所齒及長譎詭多計略旅力過人尤善騎射州里少年皆附之梁鄱陽王蕭範爲合州刺史聞其名引置左右侯景之亂忠率鄉黨數百人隨晉熙太守梅伯龍討景將王貴顯於壽春每戰却敵會土人胡通聚眾寇抄範命忠與主帥梅思立并軍討平之仍隨範世子嗣率眾入援會京城陷旋戍晉熙侯景平授蕩寇將軍王琳立蕭莊署忠爲巴陵太守琳敗還朝授明毅將軍安湘太守仍隨侯瑱進討巴湘累遷豫寧太守衡陽內史華皎之舉兵也忠預其謀及皎平宣帝以忠先有密啟於朝廷釋而不問太建初隨章昭達討歐陽紘於廣州以功授直閣將軍遷武及守軍廬陵內史秩滿入爲右軍將軍五年眾軍北伐忠將出西道擊走齊歷陽王高景安於大峴逐北至東關仍尅其東西二城進軍蘄譙並拔之徑襲合肥入其郛進尅霍州以功授員外散騎常侍封安復縣侯呂梁之喪師也忠全軍而還尋授忠都督壽陽新蔡霍州緣淮眾軍霍州刺史入爲左衛將軍遷平南將軍

南豫州刺史加都督率步騎趣歷陽周遣王延貴率衆爲援忠大破之生禽延貴後主嗣位進號鎮南將軍給鼓吹一部入爲領軍將軍加侍中改封梁信郡公出爲吳興內史及隋兵濟江忠自吳興入赴屯軍朱雀門後主召蕭摩訶以下於內殿定議忠曰兵法客貴速戰主貴持重今國家足食足兵宜固守臺城緣淮立柵北軍雖來勿與交戰分兵斷江路無令彼信得通給臣精兵一萬金翅三百艘下江徑掩六合彼大軍必言其度江將士已被獲自然挫氣淮南士人與臣舊相知悉今聞臣往必皆景從臣復揚聲欲往徐州斷彼歸路則諸軍不擊而自去待春水長上江周羅暉等衆軍必沿流赴援此良計矣後主不能從明日歎然曰腹煩殺人喚蕭郎作一打忠叩頭苦請勿戰後主從孔範言乃戰於是據白土岡陣及軍敗忠馳入臺見後主言敗狀曰官好住無所用力後主與之金兩贖爲我南岸收募人猶可一戰忠曰陛下唯當具舟楫就上流衆軍臣以死奉衛後主信之敕忠出部分忠辭云臣處分訖卽奉迎後主令官人裝束以待忠久望不至時隋將韓擒虎自新林進軍忠率數騎往石子岡降之仍引擒虎軍共入南掖門臺城平入長安隋授開府儀同三司卒年七十七隋文帝後以散騎常侍袁元安能直言於後主嘉之擢拜主爵侍郎謂羣臣曰平陳之初我悔不殺任蠻奴受人榮祿兼當重寄不能橫屍云無所用力與弘演納肝何其遠也子幼武位儀同三司

樊毅字智烈南陽湖陽人也祖方興梁散騎常侍司州刺史魚復縣侯父文熾梁散騎常侍東益州刺史
新蔡縣侯毅家本將門少習武善騎射侯景之亂率部曲隨叔父文皎援臺城文皎於青溪戰歿毅赴江
陵仍隸王僧辯討河東王蕭譽以功除右中郎將代兄俊爲梁興太守領三州游軍隨宜豐侯蕭循討陸
納於湘州軍次巴陵營頓未立納潛軍夜至薄營大譟軍中將士皆驚擾毅獨與左右數十人當營門力
戰斬十餘級擊鼓申令衆乃定焉以功封夷道縣伯尋除天門太守進爵爲侯及西魏圍江陵毅率郡兵
赴援會魏尅江陵爲後梁所俘久之遁歸陳武帝受禪毅與弟猛犇兵應王琳琳敗奔齊太尉侯瑱遣使
招毅毅率子弟部曲還朝太建初爲豐州刺史封高昌縣侯入爲左衛將軍五年衆軍北伐毅攻廣陵楚
子城拔之擊走齊軍及呂梁喪師詔以毅爲大都督率衆度淮對清口築城與周人相拒霖雨城壞毅全
軍自拔尋遷中領軍十一年周將梁士彥圍壽陽詔以毅爲都督北討前軍事十三年爲荊州刺史後主
卽位改封逍遙郡公入爲侍中護軍將軍及隋軍濟江毅謂僕射袁憲曰京口采石俱是要所各須銳卒
數千金趨二百都下江中上下防捍如其不然大事去矣諸將咸從其議會施文慶等寢隋兵消息毅計
不行臺城平隨例入關卒

毅弟猛字智武幼儼儻有幹略及長便弓馬膽氣過人青溪之戰猛自旦訖暮與侯景軍短兵接戰殺傷

甚衆臺城平隨兄毅西上梁南安侯方矩爲湘州刺史以猛爲司馬會武陵王紀舉兵自漢江東下方矩遣猛隨都督陸法和進軍拒之猛手禽紀父子三人斬於觴中盡收其船艦器械以功封安山縣伯進軍撫定梁益還遷司州刺史進爵爲侯陳永定元年周文育等敗於沌口爲王琳所獲琳乘勝將事南中諸郡遣猛與李孝欽等將兵攻豫章進逼周迪軍敗爲迪所執尋遁歸王琳琳敗還朝天嘉二年授承陽太守太建中以軍功封富川縣侯祿散騎常侍荊州刺史入爲左衛將軍後主卽位爲南豫州刺史隋將韓擒虎之濟江猛在都下第六子巡攝行州事擒虎進軍攻陷之巡及家口並見執時猛與左衛將軍蔣元遜領青龍八十艘爲水軍於白下游突以禦隋六合兵後主知猛妻子在隋懼有異志欲使任忠代之令蕭摩訶徐喻毅毅不悅摩訶以聞後主重傷其意乃止禎明三年入隋

論曰梁氏云季運屬雲雷陳武帝杖旗掃難經綸伊始胡穎徐度杜稜周鐵武程靈洗等或感會風雲畢力驅馳之日或擢自降附乃贊興王之始咸得配享清廟豈徒然哉沈恪行己之方不踐非義之迹子隆持身之節無失事人之道仁矣乎錢道戢駱文牙孫瑒徐世譜周敷荀朗周昺魯悉達廣達蕭摩訶任忠樊毅等所以獲用當年其道雖異至於功名自立亦各因時當金陵覆沒抑惟天數然任忠興亡之義無乃致虧與夫蕭魯所行固不同日持此百心而事二主欲求取信不亦難乎首領獲全亦爲幸也

南史卷六十七

南史卷六十七考證

胡穎傳吳興人也○一本吳興東遷人也

徐敬成傳起家著作佐郎永定元年○陳書無佐字又元諱爲九

程靈洗傳遣使招諭久之乃降○諭監本訛兪今改从陳書

子文季傳秦郡前江浦通塗水○塗陳書作塗

齊軍深憚之謂爲程彪○彪一本作虛

駱文牙傳駱文牙字旗門○陳書無文字

文牙母陳觀帝儀表知非常人○陳監本訛陵今改从閣本

魯廣達傳太建初與儀同章昭達入峽口招定安蜀等諸州鎮○招陳書作拓

時周圖江左○一本周字下有氏將二字

初隋將韓擒虎濟江廣達長子世真在新蔡乃與其弟世雄及所部奔擒擒遣使致書招廣達○各卷或

稱擒或稱擒虎此則兩行內亦有異同皆後人或加或刪而未盡者也

蕭摩訶傳一句之中水路遂斷周兵益至○陳書無水路遂斷四字

南史卷六十七考證